

**KHANGCING SABBATH SCHOOL  
LAISIANGTHO SINNA**

***Pasian' Itna leh Thutanna***

***John C. Peckham***

ရေးသားသော

***God's Love and Justice***

စာအုပ်အား

သိက္ခာတော်ရမ္မဆရာ ဦးမိုးခိုင်ငိုခေါ်နန်မှ  
တီးတိန်ချင်းပြန်ဆိုသည်။

**January, February, March  
2025**

Sabbath School Lesson

တီးတိန်ချင်းဘာသာ

ပုံနှိပ်သူ

ဦးဖုန်းနိုင် (၀၀၃၅၄)

မန်နေဂျာ

ကင်းစောင့်ပုံနှိပ်တိုက်

၂၀၆ ရွှေသစ္စာလမ်း၊ ရန်ကင်းမြို့နယ်

ရန်ကုန်မြို့

ထုတ်ဝေသူ

ဦးဖိုးဖိုးလှ (၀၀၅၈၉)

ဥက္ကဋ္ဌ

မြန်မာပြည်သတ္တမနေ့ဥပုသ်အသင်းတော်

၆၈ ဦးဝိစာရလမ်း၊

ရန်ကုန်မြို့

အုပ်ရေး - ၁၂၀၀

ဓမ္မဒါန

ပထမအကြိမ်

## ASUNG A OM THUTE

<b>01. Pasion in Manngenlo in hong It</b> (Dec. 28-Jan. 3) .....	<b>7</b>
<b>02 Kithukimtuah Itna</b> (January 4-10) .....	<b>17</b>
<b>03 Pasion Lungdamsaknang</b> (January 11-17) .....	<b>27</b>
<b>04 Pasion Khasiabaih Hehpihbaih</b> (January 18-24) .....	<b>37</b>
<b>05 Itna Hangin Pasion' Hehna</b> (January 25-31) .....	<b>47</b>
<b>06 Pasion in Thutang It</b> (February 1-7) .....	<b>57</b>
<b>07 Gitlohna Hangin Buaina</b> (February 8-14) .....	<b>67</b>
<b>08 Deihteelna, Itna leh Pasion' Vaihawmna</b> (February 15-21) .....	<b>77</b>
<b>09 Vantung Leitung ah Kidona</b> (February 22-28) .....	<b>87</b>
<b>10 Nasepna Thukhunte</b> (March 1-7) .....	<b>97</b>
<b>11 Bang Hihsakbeh Theilai Ding Kahiam?</b> (March 8-14) .....	<b>107</b>
<b>12 Itna leh Thutang: A Lianpen Thukham Nihte</b> (March 15-21) .....	<b>116</b>
<b>13 Itna in Thukham Picingsak</b> ( March 22-28) .....	<b>126</b>

## Itna leh Thutanna Pasion

Pasion in itna hi. 1 John 4:8 leh 16 in cih. Laisiangtho buppi in tuathu teci pang hi. Christian upna zong Pasion hong itna nasep teng bulphuh hi. Itna pen Pasion ahihna laigil, eite' upna laigil, eite sep leh bawl khempeuh' laigil hiding hi. Itna eima' teldan tawh kizui in eima upna leh sepna hong piang hi. Eima hoihna manphatna tawh Pasion hong itna tha-lawh zo dingin i up peuhmah leh; mawhneite peuhmah Pasion' itna angh dingin kilawm kisa lo ding hi. Midangte tawh kizopna ah ahihle, hoihna tawh itna thalawh ding pen – lauhuaina hi zawsop hi.

Tua bangin, Pasion hong itna eima teldan tungtawn in upna leh gamtatna a nam tampi hong piangkha hi. Tua ahihle itna i cih bang a hiam? Itna gentel ding mi sawm cial lecin dawnna tuamtuam hong om ding hi. Christian lak mahmah ah Pasion hong itna telkhih zia nam tampi om ziazua hi.

Christian te in dawnna tuamtuam a piak dotnate enpak leng:

*Pasion in itna piakhia bek a sang ngeilo hiam? Pasion hong itna pen pumpi ki piak khatna maw, aihke'h Pasion in mihing ading hong kipia nuam tanghial maw? Pasion' hong itna in lawp deuh hun nei maw? Pasion in mihing hong awlmawh taktak maw? Pasion hong itna kinial thei ki pampaih thei maw? Pasion in a bawlsa nate tawh itna ki it-thuk thei maw? Hehna in itna tawh tuiton thei hiam? Itna leh thumaanna koibang in tonkhaum thei hiam? Pasion pen itna hi cinapi hang a, banghang in Leitung ah gitlohna tampi om lel thei hiam? Pasion hong it bangin mihing in zong hong it thei diam? A hihtheih leh koibang daan aitam?*

Hih dotna teng a dawn kikna teng pen kitelcian mahmah lel ding hinapi, Christian te lakah Pasion hong itna kinial ngiatngiat uhhi. Tua a kitelcian mahmah lel dawnna tampi takmah pen, a thukzaw deuh dingin pheet uh a, Laisiangtho bang tawh kingeihlo sakzo liang uhhi.

Hih dotna teng tu tadih in enpah naikei ni in, hihteng banah dotna dang tuamtuam zong tua quarter sung teng hun la in kisin ding hihang.

Tua hileh Pasion hong itna pen ei upmawh peuh sangin na lianzaw tham cih mu ding hihang. Tulai leitung in "*itna*" a cihcih uh sangin, Laisiangtho sung a Pasion hong itna in, na tungnung zawtham ding hi. Kaal masalam tengin, Laisiangtho sunga om, a kilang veva Pasion hong itna pawlkhat telsin mahmah ding hihang.

Sin tohtoh kawmin Pasion hong itna leh thumaanna in ki kai-ok cip a hihlam mu ding hihang. Laisiangtho Pasion itna thumaan deih hi (*Isa. 61:8*). Laisiangtho in acih mah bangin, Pasion' itna in thumaan tawh ki tuiton a, khat lalosa in khat kaikhia theilo ding hiteh.

Pasion in itna a hihman mahin, hih leitungah thumaanlo takin thuaksiatna te tungah lunglut mahmah a, piansak sate in abawl uh gitlohna hang a natna dahna nenniam thuakte thuakpih mahmah hi. Amah ngiat in tam thuakpen zawtham a, gitlohna in a bawlsiat pipen in Pasion mah hipah zawsop hi.

Laisiangtho sung tawntung ah, Pasion in mimalkim hong itna pen ei upmawh sangin na lianzaw tham ahih manin hong thuakpih ngeungau kinken hi. Jerusalem leh a mite a dingin Zeisu' kahna kammalte sungah Pasion'

hong itna a thukzia muthei ding hihang: "*Jerusalem, Jerusalem aw, kamsangte na that a, Pasion sawl kamtaite na denglum hi. Akpi in a kha tawh a note a huai mahbangin na mite ka huai nuam tawntung a, ahi zongin na ut kei hi.*" (*Mate. 23:37*) ci hi.

Itna ahi Laisiangtho Pasion pen, a itna kinial ahih manin lungsim kitam in dah ci in ki pulak tawntung hi. Laisiangtho sunga Pasion pen vannuai a itna kiu teng leh a khaang teng puahpha dingin ki pulak hi. Tua quarter sinna thulu pen hih khengval lai hi.

*John C. Peckman pen Adventist Review endik pawl ah khat ahi hi. Hih lai a gelh laitak in, Andrew University Theological Seminary ah Theology leh Christian Philosophy Professor khat ahi hi.*

**Lesson 1**

December 28-January 3

**PASIAN IN MANNGENLO IN HONG IT****SABBATH NITAKLAM**

**Tukalsung Simding:** *Pai. 33:15-22; Hosea 14:1-4; Mang. 4:11; John 17:24; Mate. 22:1-14; John 10:17, 18.*

**Kamngah:** **“Ka mite tungah heh nawnlo kahih manin, Ka kiangah Ka mite Ka samkik ding a, lungsim takpi tawh Ka mite ka itding hi”** (*Hosea 14:4*).

Peter in *Mate 26:34* sunga Zeisu’ genkholhsa mah bangin, thumvei nial hitaleh tua nialna tetawh a tangthu tawpsak nailo hi. Zeisu in a thawhkik khith ciangin Peter kiangah *“Hih mite sangin nong itzaw hiam?”* ci in dong hi. Peter in zong *“Topa kong it a, kong it zong theilel teh”* ci’n dawng hi. Zeisu in *“Ka tuuno te kem in aw”* cihi. Khatvei Zeisu in *“Nong it hiam?”* ci in dongkik leuleu a, Peter in *“Topa kong it a, kong it zong theilel teh”* ci leuleu hi. Tua ciang Zeisu in *“Ka tuute cing in aw”* ci leuleu hi. Khatvei mah a thumvei na Zeisu in Peter kiangah *“Nong it hiam?”* ci in dong leuleu ahih manin; Peter in *“Nong it hiam”* cih thumvei dong liang zawzen cihpen lungsim nasa ahih manin, *“Topa aw, na khempueh na thei hi. Kong it zong na thei lel hi”* ci in dawngta hi. Tua ciangin Zeisu in zong *“Ka tuute kem in aw”* (*John 21:15-17*) ci leuleu hi. John in thumvei sitset Zeisu na nial ahih manin, Zeisu in zong a sihkhauih mahmah dotna *“Nong it hiam”* ci in thumvei sitset mah dongpha kik hi.

Eima dinmun pen Peter tawh kibang keiphial taleh, a thukhun paipi kibang peuh hi. Peter tungah Zeisu in a dot dotna thupi mahmah pen mah bangin: Pasion in zong eite eimau hun tawh kituak in hong dong hi **“Nong it hiam?”**

Na khempueh eima dawnna tungah kinga khin hi.

**SUNDAY**

December 29

**Eima lam-etna te Galkhat ah**

Pasion in *“Nong it hiam”* cih hong dong beklel hilo a, Manngenlo in mimal kim hong it hi. Eite’ ngaihsut phakzah galkhat pek ah nang leh kei Manngenlo in hong it hi. Amah in manngen hetlo takpi in nang leh kei banah mikhempeuh ngaihsut phakloh in hong it hi. Tua hong itna zong Ama’ mite tangthu sunga Ama’ sepna te tungtawn in telthei hi hang.

**Paikhiatna 33:15-22 sim inla, a sung a thu om leh kihona teng koibang hi nasa hiam? A diakin taang 19 in Pasion deihna leh a itna na koici muh hiam?**

.....

Israel te in sal panin a lamdang Pasion hotkhiatna tawh Egypt khut sungpan a suahtak khith sawt nai hetlopi in, tuateng mangngilh mansuah in bawngno’ lim biakpiakna tawh Pasion langdo pah uhhi. Mualtung pan Moses hong tuaksuk in, amaute’ gamtatna teng a muh ciangin, Thukham sawm teng a kigelhna suangpeek tawh deengsuk pah in, amaute kithehthang sak hi. Ki thutuahna tungtawn in Pasion in a Manngenlo in a piak ding thupha teng khempueh saan theihna ding dinmun teng taisan nusia uh hi tase leh, Pasion in amaute tawh ki thutuahna

thupha teng mah tawh amaute kilawm hetlo hi tase leh manngen lo in amau mah teel teitei hi.

Paikhiatna 33:19 sungah “*Keima’ hoihna na mai ah ka paisak ding a, namai ah Keima’ min ‘Topa cih ka pulak ding hi. Ka dik nop mite tungah ka dik ding a, ka hehpih nop mite ka hehpih ding hi’* a cihpen: telkhialhna tawh Pasion in thupaipi bang omlo in Ama hehpih ding mite Ama’ deihsang in teel lel hi ci uhhi. A thupaipi taktak bel, Pasion in Ama’ hoihsakte hehpih in a dangte mudah cihna hituanlo hi. Tulai pawlkhat te upna bangun, Pasion in mi pawlkhat pen tawntung beina sungah a mangthang dingin sehkhin cihbang in Pasion nasem lo hi.

Hiteng ah Pasion in bang a cinuam hiam? Pasion in na khempeuh Piangsakpa hi a, a kilawm lo pen khat mah zong thupha piaktheihna thu nei ahihna pulakna ahi hi. Tuamah bangun, bawngno’ lim a biak khith nangawn in zong kilawm hetlo pimah ahi Israel mite hehpih teitei lai hi. Hipen eite’ lam-et zah khengval in Ama’ itna Pasion in hong lahna tampi lakah khat ahi hi.

**Pasion in nangma lam-et loh zah dong Ama’ itna koibang in hong lak zelzel hiam?**

**MONDAY**

*December 30*

**Loh Ngeiloh Itna**

Pasion in a puk mihing a it teiteina Hosea’ tangthu sungah om hi. Pasion in kamsang Hosea’ kiangah, “*Hih gam mite Kei tungah citaklo in pasian dangte bia uh ahiah manin, nang zong hong tulpih loding numei paktat khat tenpih inla, tuanu tawh ta nei in’*” (Hos. 1:2) cih sawl hi. Hosea leh a citaklo a zi pen, tualai in khalam a paktat Israel mite a dingin Pasion itna lim nungta khat ahi hi. Pasion’ itna in

a kilawm hetlo mite tungah zong man ngenlo in hong luang cihna ahi hi.

Pasion in cihtakna tawh it hinapi, mite in langdo zelzel uhhi. Laisiangtho in Pasion pen a citaklo zi nangawn a it tentan pa cih hong lak hi. Amah in bel a mite itna citak tawh it hinapi, amaute in ahiehleh pasian dangte biaksan in simmawh bawl in, a kipuahpha thei nawnlo ding zah in kizopna sutat uhhi.

**Hosea 14:1–4 simin. Hih munteng in a kipkho Pasion’ itna bangteng lak hiam?**

.....

A mite’ langdo kinken khith ciang nangawn in Pasion in; “*Amau’ nungtolhna teng ka damsak ding a, lungsim takpi tawh amaute ka itding hi’*” ci hi. “Lungsim takpi tawh” a cihpen Hebrew pau *nedabah* a kiletkhia hi a, piaknopna taktak, manngen lo cihna ahi hi. Biakbuk sunga piaknopna piakkhiat sumpi a cihna tawh Akibang ahi hi.

Hosea’ laibu sunga kihona sungah, Pasion in a mite tungah a kipiakna leh veiina lamdang lak hi. Amaute un lawmngaih dang neihsan zel in kizopna sutat in puahphat theih ding bang zong ahiah nawnlo in thuciam palsat hitaleh; Pasion in Ama’ deihsak itna mah tawh it tentan lai hi. Mite in Pasion’ itna tawh kilawm loliang dingin, amau’ gam teng nusia in nial uhhi. Tua pipi mah in Pasion in amaute’ nolh hetlo in itna luan tawntung hi. Hihteng bek hilo mun tuamtuam ah zong Pasion hong itna pen manngen lo leh lungsim takpi tawh itna hong luan ci hi.

**Mi tampi in Pasion pen a gamlapi panin khauhtak in mihing ukcip cihbang in ngaihsun uh hi. Hihteng ah a**

**citaklo zi khat tungah beitheilo in it teitei cihthu na muh ciangin; Pasion na muhna koibang in hong kilamdang hiam? Tua thu in Pasion na muhzia leh Amah tawh na kizopna koibang in khel thei hiam?**

**TUESDAY**

*December 31*

**Itna Khawnkhang in Hongpia**

Pasion in a langdo Israel mite manngen lo in it bek hilo in, mawhna a dim eite zong manngen lo mah in hong it hi. Pasion hong itna tawh bel kilawm hetlo hang a, zong thalawh zo selo ding hihang. Lehgen leng, Pasion in eite hong kisapna om selo hi. Laisiangtho Pasion in kisap bangmah neilo hi (*Sawl. 17:25*). Pasion in nang, kei leh mi khempeuh a itna pen Ama' lungsim suak hilel hi.

**Mang. 4:11 leh Late 33:6 enkak in. Pasion leh Ama' piansak sate koibang in suakta takin kizom uh hiam?**

.....

Pasion in manngen lo in leitung bawl hi. Tua hang mahin, Pasion in minthanna, pahtawina leh vangliatna tawh kilawmpen hi. Leitung a pianma pek panin, Pasion lutang Pasion teng kikhawlhna sungah lungnuam khinzo hi.

**John 17:24 simin. Leitung pianma pek panin Pasion in hong bangci it ci hiam?**

.....

Pasion in a it dingin piansak nate kisam hetlo hi napi, itna a hihna dungzui in, leitung bawl in, a piansak sate tawh ki-itna sungah hong lut hi. Pasion in Ama' itding in hih leitung piangsak bek hilo lai in, mihing zong

manngen hetlo in hong itlai, Eden ah mawhna a tuk khit, tu mahmah in mimal mawhnei te zong hong itlai hi.

Adam leh Eve in Eden ah hong puk uh ciangin Pasion' itna saan theih na'ng thu nei nawnlo ta uhhi. Ahihhang "*na khempeuh Ama' kammal tawh a kipsak*" (*Heb. 1:3*) Pasion in itna, lainatna leh hehpihna lianpi tawh amaute nungta sak kenkon in, mihing in Ama' itna sung hong zuankik ding in lampi honsak hi. Tua lampi honsakna sungah eite zong hong huamsak hi.

**Pasion in pukna gitlohna te kheng in leitung ah itna hong luansak denna hang in Pasion hong itna tawh a nasep bang peuh hong musak hiam? Hih thumaan in koibang in Pasion hong it-thuk saktei naci hiam?**

**WEDNESDAY**

*January 1*

**A Sapmi Tam, A Teelmi Tawm**

Pasion in lungsim takpi tawh hong it ciangbek hilo, Amah it-thuk dingin hong samlai hi. Tua hang mahin Pasion in hong itna sang ding nial ding cih suakta tak in teel theih thu hongpia hi cihpen Christ in mopawi thu gentehna leh mundang dang ah zong om hi.

**Mate 22:1-14 simin. Hih thu gentehna a khatna bang hiam?**

.....

Christ' thu gentehna mopawi sungah, kumpi khatin a tapa' mopawi hongpai dingin "*a nasemte sawlkhia in a sapsa mite va zawnsak hi napi, amaute hong pai nuamlo uh*" hi (*Mate 22:2, 3*). A nasemte paikhia sak in khatvei sang tamzaw zawnsak zel mahleh, amaute un awlmawhlo in, a nasemte manin that uhhi (*Mate 22:4-6*).

A nasemte pawlkhat a ki thahlup sak khith ciangin, kumpipa in a nasemte kiangah “*Mopawi a baihsa in omkhin a, ahi zongin ka sap mite in a ne dingin a kilawmlo mite a suak uhhi. Tua ahih manin lam lianpi ah vapai unla, mi na muh zahzah uh hong sam un*” (Mate 22:8, 9) aci hi. Tawlkhat khith ciangin mopawi puan a silhlo mikhat a pualam ah lawnkhia sak a cihpen in; tua mopawi kihel theih nadingin kumpipa kiangpan mahin mopawi puan ngah ding kisam cihpen khatna thukpi anei kammal “*a sapmi tam, a teelmi tawm*” (Mate 22:14) cih tawh Zeisu in thu khup hi.

Bang a cihnopna hiam? Mopawi ah kihel dingin a nunungpen Topa’ “*teelsa*” te “*teeltuam*” te ahi uhhi. “*Sam, cial*” a cihpen, Greek pau ah **kaleo** hi a; a nunungpen in aki “*teeltuam*” (*eklektos*) hi a, sapna cialna angah sitset sate ahi uhhi.

Tua pen Pasion in, mopawi ah mi khempeuh a sapna a cialna ahi hi. Hitei napi, Pasion’ hong itna kinial theilai hi. It theihna dingin suahtakna kipia hi. Pasion in Amah it dingin kuamah zawhthawh sawl lo hi. A dahhuai thu ah, Pasion tawh ki-it takin kikhohh ding nial thei lel hihang.

“*Teeltuam*” cihpen sapna cialna ngahte ahi uhhi. Pasion a it-mite a dingin, Pasion in, eite ngaihsut phakloh nalamdang tampi takmah bawlkhol zo hi.

**Tua ban ah, tua thute in itna leh itna pan ih luahsuk suahtakna sungah hong kigawmkhawm hi.**

**Sapna cialna sangsa na hihna mopawi puan zong silh khin na hihlam nangma nuntakna in hong lak hiam?**

**THURSDAY**

*January 2*

**Eite a dingin Kikhai**

Pasion in itna sungah Amah tawh kikhawl dingin mimalkim hong sam hinapi, lungsim takpi tawh a sang mite bek in tawntung nopsakna ngah ding uhhi. Mopawi thu gentehna sungah, kumpipa sapmi tampi om hinapi “*hong pai nuamlo uhhi*” (Mate 22:3).

Christ in a kikhai madeuh in a kahtam kammal sungah “*Jerusalem, Jerusalem aw, kamsangte na that a, Pasion sawl kamtaite na denglum hi. Akpi in a kha tawh a note a huai mahbang in na mite ka huainuam tawntung a, ahi zongin na ut kei hi!*” (Mate 23:37) cih. Christ in huainuam mahmah napi, utlo uhhi. Tua “**ut**” cih pen Greek kammal **thelo** hi a, Christ in a hotkhiat nopna leh amau hotkhiat ding a ut lohna uh munnih ah kizang khawm hi (Mate 22:3 ah zong kizang lai hi).

Hinapi, Christ in tua mite a ding mahin singlamteh ah pai hi. A lamdang itna! Mihing’ mawhna in sihna bek thalawh hinapi, Pasion in Christ tungtawn in man hong piak sak a, vantung leh leitung kikal a kisiasa kizopna zong puahphat nading lampi hong honsak hi. Tuabang pipi mah in eite hong it teitei a, eitung ah bangmah hong baalo napi Ama’ lungsim sungtawng panin hong piang tawm ahi hi.

**John 10:17, 18 simin. Galati 2:20 tawh enkak in. Eite a ding bang thupuak om hiam?**

.....

Pasion hong itna sangpen – singlamteh tungah Christ in Ama’ deih teelna tawh hong kipia hi. Christ in Ama’ nuntakna piakhia in hong “**bulpat sak**” hi. Kuamah

in Ama' nuntakna laksak lo hi; leitung pianma pek panin vantung ah thukimna omsa bangin, lungsim takpi tawh Ama' piakkhiat hizaw hi

*“Ei hong hotkhiatna ding vaipen a ki nung-ngaihsut hi hetlo a, Adam puk khit peuh khawng cianga ki geeltaum hilo hi. Tanglai panin a ki-iimcip thute tu ciangin a ki-pholak ahi hi (Rom. 16:25). Khang tawntung a Pasion tokhom' tawphahpi hong kipulak ahi hi. A kipatcil panmah in Satan' lampialna pen Pasion leh Christ in thei khin uh a, tua lampialna mah tawh mihing ana khemtuk ahi hi. Pasion in mawhna om theihna ding thu pialo hinapi, mukhol khin ahih manin, tua a phutna ding un nawh kigin mahmah uhhi. Leitung itlua a hih manin, a Tapa neihsun piak ding hong kamciam a 'Amah a ummi peuhmah kisia hetlo in tawntung nuntakna ngah hi” John 3:16.*—Ellen G. White, *The Desire of Ages*, p. 22.

**FRIDAY**

January 3

**Ngaihsutbeh Ding: Ellen G. White lai Christ's Object Lessons laimai. 405–421, “To Meet the Bridegroom” simin.**

*“Pasion i telkhialhna in leitung tuamcip in mialsak hi. Pasion' tatleh hekzia mite'n mansuah ta uhhi. Ki telkhial in ki pulakkhial gawp hi. Tua laitak in Pasion in hong hotkhiat ding a vangliatna pulak ding thupuak hong pia hi. Pasion tatleh hekzia pulaksak ding hi hang. A mialcip leitung ah Ama' minthanna, a hoihna, hehpihna leh thumaan khuavak taang sak ding hihang.*

*“Hihthu pen kamsang Isaiah in eite nasep ding cih a gualhna sungah, 'Jerusalem aw, mualsang dawn ah kahto in lungdamna thu kiko in. Zion aw nakpi takin awng inla, lungdamna thu tangko in. Nakpi takin kiko inla lau kei in. Judah gam khuapite tungah, 'Na Pasion uh hong paita hi' ci in genta un” Isa. 40:9, 10.*

*“Mopa hong pai ding a ngakte in mipi tungah a gen dinguh thu in “Na Pasion uh en un. Hong hehpihna khuavak, leitung a dingin Ama' hong itna hong itna hong pulakna a hihi. A tate in Pasion' minthanna kilangh sak ding uhhi. Amau' nuntakzia leh tatleh hekna sungah, Pasion in Ama' hong lainatna tawh hong bawlsaksa teng kilangh sak ding uhhi. Dikna Nitaang khuavak in gamtat hoihna sungah taang ding a – thumaan kammal leh siangtho gamtatna sungah kilangh sak ding uhhi” —Ellen G. White, *Christ's Object Lessons*, pp. 415, 416.*

**Kikup ding Dotnate:**

**1. Pasion in ei hong mudah hi cih ngaihsutna in; Pasion omlo hi cih ngaihsutna sangin siazaw hi? Tua thu in thumaan hi peuhmah leh, I leitung bangzah in a tuampi khat hong hi tammaw?**

**2. Tuni i leitung in nakpi takin Pasion telkhial uh cih banghang in umthei na hiam? Pasion omzia a kitelzaw in mipite na hilhcian theihna ding lampi zong in.**

**3. Tuni in i pulak ding Pasion' omzia thupuak in bang peuh a hi diam? Pasion hong itna tawh aki uitui nailo khatpeuh tungah koibang in hihthu telkheh thei ding nahi hiam? Pasion hong itna leh a nasepna nangma tungah bangpeuh a om hiam?**

**4. Pasion hong itna kikup pen thu khat hi a, midang tungah tua itna lengkik sak cih zong thu dangkhat mah ahi hi. “Bang siangthona” eite kiim leh paam tungah Pasion hong itna kilangh sak thei hiam?**



**Lesson 2**

January 4–10

**KI-THUKIMTUAH ITNA****SABBATH NITAKLAM**

**Tu Kalsung Sim ding:** *2Pet. 3:9; Thu. 7:6–9; Rom. 11:22; 1John 4:7–20; John 15:12; 1John 3:16.*

**Kamngah:** “**Kei hong itte in Ka thu zui ding uh hi; Ka Pa in zong it ding a, Ka nih un ama’ kiangah pai in, amaute tawh ka omkhawm ding uhhi**” (*John 14:23*).

**Mi** tampi in Greek laimal **agape** pen Pasion hong itna bek hi a, itna dangdangte a hihleh, **phileo** hi in, *agape* sangin a niamzaw hi ci uhhi. Pawlkhat leuleu in, it-thuk kikna a om ngeilo piakkhiat itna bek hi a, mihing’ it-thukna omhetlo itna hi ci uhhi.

Laisiangtho deihtak in encian leng hibang upna laang pen khial zawtham hi. Greek pau *agape* in Pasion hong itna bek hilo in, mihing ki-itna zong hi a, khatveivei ki-it khialhna zong hithei lailai hi (*2Tim. 4:10*). A *nihna*, Laisiangtho sung tawntung ah Pasion hong itna zong **agape** lo tawh a pulakna mun omlai hi. Gentehna pak in Zeisu in, “*Note in Kei nong it (phileo) mahbang un Pa mahmah note hong it (phileo)*” (*John 16:27*). Tua hi a, **phileo** cihpen a niamzaw a cingtaak lo itna hi tuanlo in, Pasion mahmah in hong itna zong hi veve hi.

Pasion hong itna pen lang-itna bek hilo in, kizopna thupi hi a, Pasion hong itna mihing in a thukkikna

T-2

tungtawn in kilamdang ahi zongin mihing in hong itna lengkik sak lo hiphial mahleh hong it veve cihna ahi hi.

**SUNDAY**

January 5

**Tawntung Pasion Hong Itna**

Laisiangtho kician lel ei: Pasion in mimalkim hong it ci. A minthang pen mun in John 3:16 hi a: “*Pasion in a Tapa neihsun a piak dongin leitung hong it a, A Tapa a ummi peuhmah kisialo in tawntung nuntakna ngah thei ding uhhi*” ci hi.

**Late 33:5 leh Late 145:9 simin. Hih munte in Pasion hong itna dikna, veiina leh hehpihna in bangzah ciang huam ci hiam?**

Pawlkhat in amah ithuai kisa lo in, Pasion in midangte a it hangin amau it lo ci in um uhhi. Laisiangtho in mimalkim mah hong it cizaw hi. Itloh tuam hong neilo hi. Mimal kim hong itman mahin mimalkim hong honkhia nuam hi.

**2Peter 3:9; 1Tim. 2:4, leh Ezekiel 33:11 simin. Hihmun tengin mimalkim Pasion in hong hotkhiat nopna thu bangci gen hiam?**

John 3:17 ah “*Pasion in a Tapa hi leitung ah hong sawlna pen mawhsak thukhen dingin hongpai sak hilo in, leitung mite a honkhia dingin hong paisak hizaw hi*” (*John 3:17*) cihhi. Pasion deihbang lian bek hileh, mimalkim in Ama’ itna sang ding uh a, hotkhiat hiciat ding uhhi. Tua pimah zong Amah itding in kuamah sawlngawh lo ding hi. Saan ding leh nial ding amau lungsim thu ahi hi.

Pawlkhath in nialphial mah taleh, Pasion in Ama' itna tawlnaga saklo hi. Jeremiah 31:3 sungah Amite tungah: "*Nang kong it tawntung a, tua ahiah manin nang tungah kong thumaan tawntung hi*" cihhi. Mundang dangah zong Pasion hong itna in kip tawntung cihhi (*Late 136*). Pasion hong itna bei ngeilo a, om tawntung hi. Eimah'n midangte it zolo ihih manin Pasion' itna telhak kisa hi. A mimal in hih Pasion itna eima a dingin ciamkha hipeuh mah leng – midangte tungah i hihdante bangzah in hong kilamdang ding hiam?

**Pasion in mimalkim hong it ahiah leh, a huathuai gamta mi tampite zong itding hi. Hibang mite zong Pasion in it a hihleh eite'n zong amaute koici bangin kizoppih thei ding ihi hiam?**

**MONDAY**

*January 6*

**Ki Thukimtuah Itna**

Laisiangtho in Pasion hong itna pen innkuan ki-itna, banah nupa ki-itna leh nu-hoih khat in a ta-ngeek a itna khawng tawh hong lak hi. Hih tehpihnate pen Pasion in a thukim-tuah mite tawh a kizopna tuam hisak phadiak hi. Tua in ki-thukimtuah itna acih pen hi a, Pasion in amite hong itna bek hilo, tua itna pen mite in zong sang ding a, mi khatleh khat zong ki-itding deih hi.

**Thuhilhikikna 7:6–9 simin. Hih munteng in Pasion hong bawl thukimtuah na leh Pasion' itna dikna koibang in kizomsak hiam?**

Thuhilhikikna 7:9 sungah Pasion in amite tawh thukimtuah itna leh amau' thumaan cihtakna tungtawn in kizopna cihte pulak hi. Pasion hong itna in a hun zui hilo napi, Amite tawh thukim-tuah itna ahiahleh hunzui ahi hi.

Thuhilhikikna 7:9 sunga "*itna kip*" leh "*hehpihna*" cihpen **hesed** hi a, tua pen Pasion itna sungah ki-thukimtuah na ahi hi. **Hesed** pen Pasion' liatna, hehpihna hoihna leh itna ahi hi. **Hesed** cihpen itna leh hoihna kip hi a, thuhkik ding a kisas itna sungah kizopna ahi hi. Hih itna pen, a langkhat lam panin zong itna thukikik ding a kisasme a cihna ahi hi.

Pasion' **hesed** cih in, muanhuai, kipkho leh om paisuak hi. **Hesed** pen a hunzui a pai hi a, Ama' mite in tua kizopna zom paisuak nuam maw nuamlo cih tungah kinga hi (*2Sam. 22:26, 1Kumpi 8:23, Late 25:10; 32:10, 2Khang. 6:14*).

A kipkho Pasion hong itna in itna sunga kizopna khempueh' tawphah hi a, tua itna pen eite'n baan zolo hi hang. Pasion in eite nuntak hun a khawnkhang in hong pia bek hilo, Ama' pumpi mahmah zong manngenglo in hong piakhia hi. "*Lawmte taang ding sih ngamna sang in lawmte itna a lianzaw itna om nawnlo hi*" (*John 15:13*). Pasion' hong itna lahkhiat na lian penpen in "*Amah hong kiniamkhiat tawm a singlamteh nangawn ah sih ding a ut hi*" (*Phil. 2:8*).

**Pasion' hong itna taktak nangma lungsim sungah koibang teng in kem khinkhian thei ding nahi hiam? Banghang in tuabang in hih ding thupi hiam?**

**TUESDAY**

*January 7*

**A Hunzui a Kizopna**

Pasion in mikhempeuh Amah tawh kinai takin kikhawl in ki it dingin hongsam hi (*Mate 22:1-14*). Tua sapna hohtak a dawng te in Pasion thukham mang ding, Pasion itding midang zong itding uhhi (*Mate 22:37-39*). Khatpeuh in tua Pasion tawh kikhawlhna sungah nuamsa

in a hamphat ding pen Ama' itna sang maw nial maw cih tungah kinga ahi hi.

**Hosea 9:15; Jeremiah 16:5; Rom. 11:22 leh Jude 21 simin. Hihmun tengin Pasion hong itna hangin hamphatna kinial thei ki nusia thei cihthu bangteng hong pulak hiam?**

.....

Hiteng leh mundang ah zong, Pasion tawh ki-itna sungah hamphatna pen, mihing mahin Ama' hong itna dawng thukkik daan zui hi cih pulak hi. Cihthei hang Pasion in hong itna tawlna saktei cih upkialhna peuhmah neilo ding hihang. Pasion' itna pen kipkho cih i theihsa ahi hi. Hosea 9:15 ah zong Pasion in Amite kiangah "*Amaute ka it nawnkei ding hi*" ci napi, a nungciang in tua laibu sungmah ah "*Ka lungsim takpi tawh amaute ka itding hi*" (Hos. 14:4) zong cileuleu hi. Hoses 9:15 in Pasion in amite a itna beisiang a cihna zong hi tuanlo hi. Pasion tawh itna sungah a kizom mite omzia khuahun zui hiding hi. Ama' hong itna koibang in ki dawngthuk hiam cih thupi hi.

*"Keima thupiakte sangin a zuite in Keimah hong it a hi uhhi. Kei hong it mite pen Ka Pa in zong itding a, Keimah in it in, amau tungah ka kilangh ding hi"* (John 14:21). Tua mahbang in Zeisu in zong "*note in Kei hong it in, Pa kiangpan hongpai ka hihna thu um na hih manun, Pa mahmah in note hong it hi*" (John 16:27).

Hibang tengin Pasion tawh kizopna hang manphatna sungah a kipkho nadingin Pasion hong itna a saan uh kul ding a, tua itna tawh a gamtang hiding uhhi. Hihthu in zong Pasion' hong itna tawlna paisuak hi a cihnopna hilo

hi. Ni in a taanna pen eite'n khawlsak theilo ihih hang, tua nitaang eite'n kipelh thei ahih mahbang in: Pasion' hong itna kip ki-tawlnak sak theilo ahih hang, Pasion tawh kikholh ding kinial thei a, Ama' hong piakte pelh in tawntung nuntakna kamciam zong kipelh thei hi.

**Pasion hong itna pen, it-thei maw/theilo phial mahleh; mihing in koibang in muthei in ki ciamkha thei ding hiam? Gentehna in, leitung in mawhna a neih khit nangawn in, koibang in Ama' hong itna pulak saktei ding hiam?**

**WEDNESDAY  
Hehpihna Taan**

*January 8*

Pasion hong itna in kipkho a, thalawh theih hilo hi napi mihing in kinial thei hi. Tua itna pen Pasion kiangpan manngenlo in hong it ahih manin, ki-sangthei, ki-nialthei a, tua itna kip in eite na khatpeuh ihih mapek in omkhin zo hi. Pasion i itna pen, bangmah i ngetma in Amah in hong it masakna thukkikna ahi hi.

**1John 4:7-20 sim inla, taang 7 leh 19 na bulphuh phadeuh in. Pasion hong itna mah masak den ding cih bangteng hong hilh hiam?**

.....

Pasion in hong it masa den hi. Amah'n hong it masa keileh eite'n zong it-thuk theilo ding hihang. Pasion in hong bawl lai in it-theihna leh a ki itding in hong bawl hi a, Pasion mahmah in itna khempeuh bulpi ahi hi. Eite'n saan ding leh eima' nuntakna sungah lengkik sak ding cihpen eima teeltheih ahi hi. Hihthu mah pen Mate 18:23-35 sungah mawhna a maisak nuamlo nasempa gentehna sung ki telcian mahmah hi.

Tua gentehna sungah, nasempa in a topa tungah a leibaa pen cikmah in lohzo ngeilo ding hi. Mate 18 cihna bang ahiehleh nasempa in a topa tungah *talent* 10,000 baa hi. *Talent* khat ciangin *denarii* tulguk ahi hi. *Denarii* khat mikhat ii nikhat thaman cih (*Mate 20:2*). Nasem mi khat in ni 6,000 a sep ciangin *talent* khat ngahpan hi. Tawngakni teng dok khin leng, kumkhat in ni 300 nasem leh *denarii* 300 thalawh ding hi. Nasem mikhat in *denarii* 6,000 apha *talent* khat a lohna ding in  $(6,000 / 300 = 20)$  kum sawmni sawt ding hi. Tua a hih manin *talent* 10,000 a lohna ding in kum 200,000 sawt ding hi. Tomgen leng nasempa in lohzo ngeilo ding hi. Hinapi, a topa in hehpih mahmah ahieh manin lungsim takpi tawh tua leibaa lianpipi maisak hi.

Tua hinapi, hih maisakna a ngah nasempa in ama' tungah a leibaa themcik *denarii* 100 bek pen maisak zolo in, a naseppih leibaa neipa thong sungah koih ahieh manin, a topa in ama' maisaksa teng thu lumlet kik cih. Tua nasempa in a topa itna tawh maisakna awlmawh nawnlo hi. Pasion hong lainatna beingeilo citateu zong in, kinial kha thei a, ki mangngilh thei hi.

**Nang hong kimaisak teng leh, tua hong maisakna dingin Zeisu in man bangzah pia cih ngaihsun in. Midangte zong maisak theih ding bangthu peuh hong hilh hiam?**

THURSDAY

January 9

**Manngeno in Ngah; Manngeno in Piakhia**

Nasempa in a topa tunga a leibaa a loh zawh loh mahbang in, Pasion tungah loh zo ngeilo ding hihang. Pasion' itna zong thalawh zo ngeilo ding hang. "eite mawhnei ihieh laitak in eite a dingin Christ hong si ahieh manin Pasion in

*eite hong it mahmah na thu hong lak khinzo hi*" (*Rom. 5:8*). A lamdang itna! 1John 3:1 in, "Pa Pasion in eite bangzah takin hong itna thu thei un. Ama' hong itna lian mahmah ahieh manin, eite pen Ama' tate hong ci hi" cih.

Eite hihtheih sun leh hih ding pen, midangte muhna ah ihieh theih zah in Pasion' itna lengkik sak ding ihi hi. Hih zahta in a lian lainatna leh maisakna ngah ihieh ciangin, midang te tungah lainatna leh maisakna bangzahta in piak huai nasa hiam? Nasempa in a topa lainatna leh maisakna teng a lawm naseppih pa a piak sawn ding mangngilh cihthu phawk in. Pasion it takpi ihiehleh, tua hong itna midang tungah lengkik sak hamtang ding hihang,

**John 15:12; 1 John 3:16; leh 1 John 4:7 sim in. Hih munte in Pasion itna, eite'n Pasion ih itna leh eite'n midangte ih itna cihteng a kizopna bang hong gen hiam?**

"Na lunggulhnate, na nopnate, na dahnate, na lungkham nate leh launate Pasion kiang tun in. Amah vangik suan theilo ding; amah gimsak theilo hihang. Na luzaang a samzang teng zong a simkhinpa in A tate haksatna zong simkhin zo hi. "Topa in dikna leh hehpihna nei hi" James 5;11. Hong itna lungtang in eite' dahnate leh thuumna te in sukha mahmah hi. Na lungsim hong subuai khempueh Ama' kiangah paipih in. Ama' aa dingin a puak-haklua a lianlua bangmah omlo a, vannuai leitung khempueh Amah'n uk hi.

Eima' lungnopna khatpeuh Ama' theih zawhloh dingin neulua cih omlo hi. Eima phutkhak thute Ama' aa dingin khuamial lua cih omlo; Ama siansuah dingin lungkhamna lianlua omlo hi. Ama' tate a neupen zong a tuksak zo buaina bangmah omlo a, bang lungkhamna peuhmah in kha-lausak

zolo; bang nuamna peuh in zong Amah nuamsak zo tuanlo, lungsim taktawh thungetna a theih zawhloh leh a phawk khakloh bangmah omlo hi. ‘Amah in lungsim kitamte damsak a, a meima-te tuamsak hi’ Late 147:3. Mimal khat sim leh Pasion kikal a kizop zia pen, leitung ah Pasion in a kep ding A Tapa a piak khat ding kha dang khat peuhmah a om nawnlo bang liang zah in kinai in kician mahmah hi.”—Ellen G. White, *Steps to Christ*, p. 100.

### **Kikup ding Dotnate:**

1. **Atunga laigual teng lungngai kik lecin:** “*Kha-mal khat sim leh Pasion kikal a kizop zia pen, leitung ah Pasion in a kep ding A Tapa a piak khat ding kha dang khat peuhmah a om nawnlo bang liang zah in kinai in kician mahmah hi.*” Pasion in nang hong awlmawh mahmah cih natheih manin, bang lungnopna hongpia a, koibang in nuntakpih thei ding na hiam?
2. **Tukalsung sinna tungtawn in Late 103:17, 18 pen koibang in na telcian hiam? Pasion hong itna in kipkho hi cih koibang in hong lak a; Pasion leh eimah kizopna tungtawn in hamphatna peuhmah pen, Hong itna eima’ saandan tungah kinga cih koibang in hong hilh hiam?**
3. **Pasion tawh na kizopna koibang in hong ki lamdang sak cih bangci theih nahiam? Midang te’ dahna khawng koibang in hong lainatpih sak thei hiam?**

### **Lesson 3**

January 11–17

### **PASIAN LUNGDAMSAK**

#### **SABBATH NITAK LAM**

**Tukalsung Simding:** *Luka 15:11–32; Zeph. 3:17; Eph. 5:25–28; Isa. 43:4; Rom. 8:1; Rom. 5:8; Maku 9:17–29.*

**Kamngah:** “**Topa na Pasion un note hong ompih a, Ama’ vangliatna in hong gualzo sak hi; Note tungah Amah lungkim ding a, Ama’ hong itna tawh hong thakbawl ding hi. Note hangin Topa lungdam in lasa ding hi**” (*Zephaniah 3:17*).

A tunga thupiang lungngai inla: kum nga bek apha pan tano khat in aki gina-tuam mello Pa’ Ni letsong khat tawi in hong pai hi. A pa tungah piakhia hi.

A pa in hibang in cileh, “*Ka ta aw, na letsong thupisa ke’ng. Kei lungdam theihna ding nang hong piaktheih bangmah omkei. Nang nong piak banglel te ke’n zong leithei lel, keimah’n kong piaksa sum teng mah tawh nalei hi peuh lomaw! Nangmah’n tangkik zaw inla, bangbang hitaleh hong it veve ing mau*”.

Maww aw! A pa’ dawnna na koici ngaihsut a le? Lunglut mello, om ngeungau, nuamna mel theilo. Pasion in hong tuacih hiam? Pasion i lungdam sakthei takpi diam? Mi puksa, mawhna kidim, gilo lailai ihih manin, ngaihsut haksa – aihhang, Pasion ki lungdam sakthei takpi hi! Thukhat panin Pasion in, naupangpa’ pa bangin, eimah hong en selo, eima’ letsong ken en selo hi. Pasion ki

lungdam sakthei i cita zong in, Christ tungtawn bekmah ahi hi.

**SUNDAY**

*January 12*

**Nang Ngaihsutzah Sangin na Manphazaw**

I sinna teng sungah, mawhnei penpen a gilo pente zong Pasion in a itloh kuamah omlo ci hihang. Pasion in ei' ngaihsutzah sangin mihing na manpha sakzaw a, mawhna in ei tungah bangteng hong bawlsia cih thei ahih manin mawhna hangin lungdam theilo hi.

**Luka 15:11-32 simin. Tapa phengtatpa thu gentehna sungah Pasion hong lainatna leh itna koici hong lah hiam? Inn ah a om khinkhian tapa dang tawh a kibang mite a ding bang vauna hong pialai hiam?**

.....

Hih tangthu sungah, Zeisu in, tua tapa in a pa' innkuan leh a pa mahmah nial in, ama' gamh ding ngen baih mahmah cihi. Tua tapa phengtatpa in, a gamh teng thaangzat ziahziah ahih manin, zawna leh gilkialna sung tung a, vok' ankuang sungpan vok' an nangawn haza liang cihi. Apa' inn sunga nasem lelte in zong amah sangin annek kicing zaw cih a phawkkik ciangin, inn ah ciahkik ning in, sila khat peuh hong koih lai khak leh cita hi.

Hong piang thu bel khauhpai ei! Pa pawlkhat khawng hileh, "*Na gamh na la khin zo a, ka inn panin na taikhia zo hi. Hitak ah nang inn om nawnlo hi.*" ci ding uhhi. Zo ngeina bang hileh cihhuai lel nasa uh hia le? Pate zong mihing hiphot lel ihih manin, tua tapa phengtatpa zong inn tawh kigamla luata lel ding hi.

Tua thu gentehna sungah, a Pa in Pasion' limpua hi a, tuabang dan in dawng hetlo hi. Tua sangsik in "*a Pa*

*in gamlapi panin tapa phengtatpa hong ciah amuh ciangin laina mahmah ahih manin, delhphei in, a ngawng ah kawii in nam hi"* (Luke 15:20). Mikhat tawh kimu dingin innkuan lutangpi khat tai panpan liang cih khawng vangneu huai phial taleh, a Pa inbel, lainatna lianpi tawh, a tapa dawn ding in vatai liang, bek thamlo, innkuan-lai sungah khum kik, banah, pawikhah sak lailai: tuateng in, Pasion hong mi vakthap lel khat hong lainatna lianpi leh inn hong ciahkik mimal khatsim a ding lungdam ahihna hong lak hi. Pasion' limpukna lianpi hi.

**A u pa in a dawnthukna lunglut huai lua. Mihing khat in thumaan takin liangko kikim in hihbang in a dawnthuk lel pen tazaa lel nasa hiam? Hih unau tegel' tangthu in tulai mihingte liangko kikim takin om ding ngaihsutna in, Pasion hong itna lungdamthu a thukna tawh ki tehkak thei vetlo hi.**

**MONDAY**

*January 13*

**Lungdamna sungah Nuam mahmah**

Ngaihsut hak a kisa mahmah thu, Pasion in mimalsim in, tehpih zawhloh in hong manphasak a, kha khatbek hotkhiatna sung nangawn ah nuam mahmah hi.

**Zephaniah 3:17 simin. Hihmun in tapa phengtatpa gentehna tungah bang khuavak hong taan naci hiam?**

.....

Zephaniah 3:17 in, hotkhiat mite tungah Pasion nuam mahmah cihi. Hebrew pau in lungnopna, lungdamna cihte, hih tangkhat sungah kikoih a, Pasion lungdam lungnuam cihi. Tuani a Pasion lungdam lungnop ding zia pulakna dingin lei kammal khat zong picing zolo cih ding hilel hi.

Zephaniah 3:17 in, Pasion in Amite “*lakah*” koimun santak ah om cih hong lak hi. Pasion hong kihelna pan kipan in, kizopna ki puahphat kikna hong kipan lian hi. A Pa in gamlapi ah a tapa hong ciah amuh ciangin hong taiphei – Pasion zong Amite’ lakah tuabang lianmah ahi hi.

Isaiah 62:4 sungah zong, mopawi thu om hi. Isaiah 62:4 cih dan hileh, Pasion’ mite pen “**Hephzibah**” ‘*tua nu sungah ka lungkim*’ cihtheih dinmun hi a, amau tenna gam zong “**Beulah**” ‘*aki tenpih zi*’ cihtheih ding ahi hi. Banghang hiam? A Laisiangtho kammal in “*Nang tungah Topa lungkim a, na leitang pen a ki tenpih zi tawh kibang ding hi*” cih. Pasion lungdamna sangpen a khuumdawn in, ki puahphat kik ni, Ama’ mite sangin eitung ah a lungdam ni, a pa in a tapa phenngtatpa tungah a lungdam ni ahi hi.

**Eph 5:25–28 simin. Eite’n zong i lahkhiat ding itna pen koibang dan itna hiding ci hiam?**

.....

Hih mun ah pasalte in zite itding hanthawn a, “*Christ in a pumpi pawlpi a ding a kipiak dong in it hi*”, tua mahbang in, pasal in zong “*a zi ama’ pumpi bangin itding*” (Eph. 5:25, 28) cih. Hihmun ah Christ in Ama’ pumpi piakhia liang in Amite a it mahbang in, pasal in zong angkhual hetlo in zi itding a cihna ahi hi.

**TUESDAY**

*January 14*

**Pasion Lungdamsak**

Mihing lel sungah koibang a Pasion lungdam zo aitam maw; tuimal leh sazang thagui peuh kigawm khawm lel: genzawhloh a zai vannaui a leitung neucik khat tunga

om lel peuh khawng? Kisapna bangmah a neilo liang, vangliatna khempeuh a neipa pen, mihing lelpeuh in koibang in lungdam sakthei mawk ding hiam? Hih dotna pen thunih in kidawng thei hi. *Khatna*, Pasion mahmah koibang in ki Lungdamsak thei ding hiam? *Nihna*, Ama’ lungdamna dingin mihing in koibang in hih thei ding, mawhna kidim kihi leltak e? Dotna khatna pen tuni kisin ding thulu hi a, dotna nihna pen zingciang maw.

**Isaiah 43:4; Late 149:4; leh Paunak 15:8, 9 simin. Hiteng in Pasion, Amite tungah lungdam cih bangteng hong gen hiam?**

.....

Zanni in, Pasion pen mihing in lungdam sakthei cih sin kiau hang a, tua zong pen, amau’ hihtheih tawp in midangte don in a kemte Pasion in it hi cih.

A lehlam ah, Pasion in gitlohna bawlte tungah lungdam lo hi. Paunak 15:8, 9 in zong, Topa in migilote “*biakpiakna, gamtatna*” kihhuai sa a; “*thumaan mite’ thungetna thukim in it hi*” cih. Hihmun ah Pasion in gitlohna ah lungdam lo a, hoihna sungah lungdam cih. Pasion lungdamna leh itna in ki tuiton mahmah a, Pasion’ itna leh lungdamna in thuktak in kizopna nei cih hong lak hi.

Late 146:8 ah “*Topa in thumaan mite a it hi*”. 2Corinth. 9:7 in zong, “*Pasion in piaknopna lungsim tawh apia te it*” ci hi. Hihmun in a genloh thu khat phawk masa in. Pasion in midikte bek it ahi a, lungsim takpi tawh plate bek it ahi zongin cilo hi. Pasion in mi khempeuh it hi. A puatham pan enpak leng Pasion in “*midik*” leh “*lungsimtak tawh pia*” it cih ding mah hiphot hi. Paunak 15:8, 9 in zong

lampi hong honsak a: Pasion in hih a tung a tegel leh a dangte zong Amah a lungdamsak khempeuh it cih.

**Vannuai leitung buppi a bawlpa Pasion in hong kinai kholhpih mahmah manin vantung leh leitung in naitak mahin kihenkop thei cih ngaihsun in. Hihthu na lungngaih ciangin, haksat hun na kantan laitak nangawn in bang lam-et theihna khawng hong neisak thei naci hiam?**

WEDNESDAY

January 15

**A Nungta Suangte**

Eite a puk mawhneimi lellel in, a siangtho Pasion lungdamsak zo ding maw?

**Rom. 8:1 leh Rom. 5:8 simin. Pasion' maiah koibang in ding hong ci hiam?**

.....

Mihing in a dawnthuk mapek in Pasion hehpihna hong luangsak hi. Bangmah a kigen a kibawl mapek in, Pasion in hong baan masa in hong itna saan theihna leh nial theihna hong pia masa zo hi. Rom. 5:8 in, *"eite mawhnei ihih laitak mahin eite a dingin Christ hong sihna tawh Pasion in eite hong it mahmah na thu hong lakkhin zo hi"* (Jer. 31:3 *etbeh lai in*) cih. Hong Honkhiapa hong sepsakna tungtawn in Pasion tawh ki lemtuah bek thamlo lungdamsak theilai ding hihang.

**1Peter 2:4-6 leh Heb. 11:6 enkak in. Pasion aki lungdamsak theihna ding bang peuh gen hiam?**

.....

Pasion hong lutvat lo hileh, mihing in Pasion' maiah na manpha bangmah keng zolo ding hi. Pasion' hong hehpihna mah tawh Christ in lampi khat hong honsak hi. A kician khat *"Christ tungtawn in Pasion saantheih biaknate pia ding"* (1Pet. 2:5) cih. *"Upna lo tawh kuamah in Pasion lungkimsak zolo"* (Heb. 11:6) a cihte hang, Christ in hong palaina hangin, Pasion in thu ummi khempeuh *"Ama' deihna bangin na a septheih nading un, a kizam thuhoih khempeuh note tungah hong guanin, Ama' lungkim bangin gamtat theihna dingin, Zeisu Christ in eite sungah na hong sem henla, Christ in a tawntung in minthanna ngah paisuak taken, Amen"* (Heb. 13:21).

Upna tawh Pasion a dawngthuk kik mi peuhmah, santacking dikna a nei Christ' palai sepna hangin midik in hong kisim hi. Amah tawh kibang dingin zong hong puahpha hi (1Cor. 15:51-57; 1John 3:2). Pasion hong hotkhiat nasepna pen *eite a ding* hibek lo, *ema' pumpi* sungmah ah hong sem hi.

**Christ in vantung tawh hong palaina hangin banghang in thangah thei tuam nahi hiam?**

THURSDAY

January 16

**A Ngahtaak Ngiimna**

Pasion hehpihna leh palaina nuaiah, Ama' itna a dawngthuk peuhmah a neupen nangawn zong Pasion lungdam hi. Khatbek a om a it-taak leh dikna a picingpa hangin, eite mimalkim zong midik in hong kisim a, Pasion in a it mi te, Ama' itna picing sungah om tawntung ding in hong sim hi. Tua pen Christ in vantung ah eite a dingin hong sepsak den eite lam-et lianpen hotkhiatna ahi hi.

*Kei ka kihel zo tammaw cihpeuh zong lungkham ding hiteh. Kei lah hoihlo a maw! Keima upna in a kicing zolo peuh ahi tam maw cikha ding hiteh.*



**Maku 9:17–29 simin. Tua tangthu sunga pasal pa Pasion in bangci dawnkik hiam? Upna bangzah ciangin upna kicing ahi tam?**

.....  
Nungzuite in dawi hawlkhia zolo uh a; cih na'ng thei nawnlo uhhi. Zeisu hongpai in a pa kiangah “A umte a dingin na khempeuh hithei hilo ahi hiam?” (Maku 9:23) cih. Tua ciangin a pa in zong nehno sa in “Topa aw, ka um hi, ka upna a kicin nading hong huh in” (Maku 9:24) aci hi.

Phawk ding in, Zeisu in “Na upna a kicin ciangin hong paikik in aw” cilo hi. “Ka upna a kicinna ding in hong huh in” cihziau zong kicing peuh hi.

Upna omlo in, Pasion ki lungdamsak zolo (Heb. 11:6) ahihhang, Zeisu in a neupen upna zong hong sang a, Christ' hong palaina hang mahin Pasion lungdam thei hi. Upna hangin Christ in eite a ding hong sepsakna tawh, Pasion ki lungdam sakthei a, tano khatin a pa ading bangmah manphatna a nei mello letsong hong paipih ciangin a pa a nuam mah bang hilel hi.

Tua mahbang in eite' ngiim ding pen Paul in “Pasion lungdamsak ding” (2Cor. 5:9, 10; Col. 1:10; 1Thess. 4:1; Heb. 11:5 enkak in) cih. Eima' lunglut nate zong eima itte a dingin a hoihpen ding temah lunglut dingin Pasion hong puahphat ding leh eite' itna in amaute a phakzawhna ding thungen ding hihang. “Unau lungsim ki itna nei unla, khat leh khat ki zahtak bawl ding lamsang kidem un. Thadah kei unla nakpi takin nasem un. Lam-etna na neihna hangun lungdam in om tawntung unla, na thuak uh ciangun lungduai takin thungen tawntung un. Na Christian pihte uh kisapna bangin na neihsa te uh hawm unla, lengla do siam mite nahi ta un” (Rom. 12:10–13).

**Pasion in Christ hangin eite hong saan mahbang in, eite'n mite bangzah saanhuai hiam? Nangma pumpi na it bangin vengte itding cihthu leh (Siam. 19:18; Mate 22:39) nang tungah hong kibawl ding na deih bangin mi' tungah zong bawl ding cih thukhun tungpan bang khuavak na muthei hiam?**

FRIDAY

January 17

**Ngaihsutbeh ding: Ellen G. White, *The Desire of Ages* lai. 662–680 “Let Not Your Heart Be Troubled” simin.**

“A mite amau leh amau tualniam a kisak uh manin Topa dah hi. Ama' teel tuamna gamh ngahna dingin man tampi a piaksa ahih manin, amau' manphatna theisak nuam hi. Pasion' deihna hi a, hikei peuhmah leh A Tapa sawl liang in, amau tatna dingin tua zah man tampipi piakhia loding hi. Topa minthan sakna dingin amau tungah a kikal amau' hihtheih zah ahihna tungtawn in Topa lungdam mahmah hi. Topa' kamciamna sungah upna kip peuhleh na lianpipi lam-et ding om hi.”

“Christ min tawh thungetna vanglian hi. Ama' gamtatna, Ama' lungsim leh Ama' sepnate sang ding hihang. Honpa' kamciamna pen eima' omzia tungah kinga hi. ‘Kei nong it uhleh Ka thukhamna zui un’. Topa in mawhna sungmah ah hong hon hilo a, mawhna sungpan in hong honkhia hi a; Amah a itte peuhmah in amau' itna uh itna mahleh thumanna tawh lahkha ding uhhi.”

“Thumanna diktak pen lungsim sungpan ahi hi. Christ tawh kop in lungsim nasep khopna hi. Eimah lungkim hipeuh leng, eima ngaihsutna leh ngiimna sungah Amah kilangh sak ding a, eima' lungsim pen Ama' lungsim tawh luang khawm sak in; Ama' thu manna sungah eima' sepnopna hong omsak ding hi. A kisiansuah eima deihna in, Ama' na sepna sungah

lungkimna sangpen ngah ding hi. Pasion i theihkhak hampaha i kisak ciangin, eima' nuntakna in thuman tawntungna nuntak hiding hi. Christ' gamtatna manphat sakna leh Pasion tawh kikhawlhna hangin mawhna pen hong huathuai mahmah ta ding hi."—Ellen G. White, *The Desire of Ages*, p. 668.

### **Kikupding Dotnate:**

**1. “Angkhuallo takin ngah” cihpen bang a cihna aitam? Piakkhatna leh ngahna tegel kizopna in vantung leh leithak ah koibang ahi tammaw?**

**2. James Webb Space Telescope vantung gamla etna lawngpi sangin a hatzaw thampek vantungte galkhat panin hongpaipa in—Daniel pen ki chamudot, “ithuai, deihhuai, manpha” thumvei sitset na cih. Daniel 9:23 ah, Gabriel in ki chamudot attah, “nakpi takin hong ki it hi” cih. Daniel 10:11 ah zong, vanmi khat (Gabriel hihtuak) in ish chamudot, “a ki it mahmah pa” ci a, Daniel (Dan. 10:19) ah zong omkik hi. Pasion tawh kisai bang kici a, eitawh bangzah hong nai-om cih ngaihsunpha in. Bang lam-etna hong guan naci hiam?**

### **Lesson 4**

January 18–24

### **PASIAN KHASIABAIH IN HEHPIHBAIH**

#### **SABBATH NITAKLAM**

**Tukalsung Simding:** *Late 103:13; Isa. 49:15; Hos. 11:1–9; Mate 23:37; 2Cor. 11:2; 1Cor. 13:4–8.*

**Kamngah:** “Nupi khat in ama’ nawi atEEP naungek mangngilh thei ding ahi hiam? Mangngilh kha thei mah ding hi; Ahi zongin Keimah in note kong mangngilh kei ding hi” (*Isa. 49:15*).

**Lungsim** phawktheihna pen pelhhuai hetlo kisaciat hi. Pawlkhat in tua phawktheihna pen pianpih zong hi khollo ahih manin, mi khat hoihna pen tua phawktheihna tawh khen ziau ding zong hituanlo a ci om uhhi. Tanglai Greek thupilna sungah “*theih theihna*” pen khasiatna lamah tung pahpah lo a, ama’ phawktheihna khawng a thulian lualo-te ah a kemcing zo tepen etteh huai ci uhhi.

Phawktheihna kamkaih kei leng buaina hong tun thei hi. Pasion in mihing hong bawl ciangin phawktheihna hong guan a, Pasion mahmah zong Laisiangtho sungah tua phawktheihna mah nei in phawk baih mahmah zaw hi. Laisiangtho in Pasion in zong tua phawktheihna thukpi mah nei ci ahih manin, a sia pianpih hetlo ding hi – Pasion pen hoihna picing leh pilna picing tawh kidim Laisiangtho in cih.

A thuk mahmah phawktheihna tawh a kidim Pasion hong itna panin kaihhop theih ding thumaan thu hoih tampi om hinapi; a kidophuai thu khat pen, Pasion hong itna in a picing itna ahah manin mihing in tua bang linlian neitheh lo ding cih thu ahi hi.

**SUNDAY**

January 19

**Nukhat Hong Itna Khengval**

Mihing a dingin itna lianpen in tano tungah nulehpa' itna ahi hi. Laisiangtho in zong nulehpa-tano kizopna pen, mihing tungah a lamdang mahmah Pasion in nakpi takin hong hehpihna tawh ki tehkak a, Pasion hong hehpihna hilhcian theihna dingin a kinaipen a thuk pen leh a hoihpen hilhcianna dingin a kizang ahi hi.

**Late 103:13; Isa. 49:15 leh Jeremiah 31:20 simin. Hihmun tengin Pasion hong hehpihna omzia leh a thukna bangteng hong lak hiam?**

.....

Hihmun tengah, Pasion in eite pen a it mahmah a tano te, nuhoih khat pahoih in a tano te a it bangin hong it cihhi. Hinapi, Isaiah 49:15 in mihing nu khatin "*a tano mangngilh*" ama' naubu sungpan in a piangkha tapa mangngilh phial mahleh, Pasion in a tano te mangngilh ngeilo, hong hehpihna kiam ngeilo hi (*Kahla 3:22*).

Hebrew kammal **raham** pen hehpihna ci in kizang a, mun dang tampi ah Pasion hong hehpihna kicing mahmah cihna in kizang hi. Tua kammal pen Hebrew pau in naubu **reham** panin hongpai hiding in ki um hi. Pasion hong hehpihna pen "**naubu bang nu-itna**" ci in laisiamte in tehkak liang uhhi. A taktak in cileng, mihing lel

khatpeuh hong hehpihna leh nu' khat in a tangeek a hehpihna sangin a lianzaw thampek ahi hi.

Jeremiah 31:20 ah zong, Pasion in a kamciam mite in Amah langdo den a lungkham sakden hinapi "**ka it Ka tapa, Ka ngaihno**" ciliang hi. Bek thamlo Pasion in "*amah ka lunggulh mahmah a, amah ka hehpih taktak ding hi*" cihhi. Hiteng ah "*hehpih*" a cihna pen Pasion hong hehpihna in a kizang **raham** ahi hi. Tua banah, "*Ka lunggulh*" a cihzong pen "*Ka sungkua haam in kiko*" zong kici hi. Hih kammal tepen Pasion' sungkua sungtawng pan in phawktheihna a cihna hi a, Ama' mite tungah a thuk mahmah Pasion hong hehpihna a pulakna ahi hi. Amau' cihtak lohna enlo in, amau' lam-etna khengval in Pasion in Ama' hong hehpihna lianpi hong luangsuk sakden hi.

**Pawlkhath bangin, Pasion hong hehpihna pen, nulehpa' itna thuk tawh kinai sak uhhi. Ahihteih hang, mi pawlkhath te, nulehpa' itna leh hehpihna a ngah ngei khalo zong om uhhi. Pasion hong hehpihna pen bang thudang peuh tawh a ki tehkak theilai tam maw?**

**MONDAY**

January 20

**Gilpi Gilzang Natlawh liang Itna**

Tehpihbei Pasion in mihing hong itna pen Hosea laibu sungah hong pulaak hi. Hosea kiangah Pasion in "*Hih gammite citaklo in pasian dangte bia uh ahah manun, Pai inla, hong tulpihlo ding numei paktat khat tenpih in*" (*Hosea 1:2*) ci in sawl hi. Hosea 11 in Pasion leh Ama' mite kizopna a pulakna ah pa in a tano a itna tawh pulaak hi.

**Hosea 11:1-9 simin. Hihmun ah Pasion in Ama' mite it in a khoina koibang in hong pulaak hiam?**

.....

Pasian in Amite hong itna pen nulehpa in a tano a lainatna mahbang ahi hi. Tua pen Laisiangtho in naupang khat lampai hihna; i it naupang khat pomna; a kizam bangbang kem in khoina cihte tawh lim hong lak hi. Pasal khatin “*a tano a tawi*” tawh zong lim hong laklai hi (*Thuhilhkik 1:31*). “*Ama’ itna leh hehpihna tawh amaute honkhia a, a beisa hun khempeuh ah amaute hoihtakin kem hi*” (*Isa. 63:9*).

A hoi dengdang ngeilo Pasian cihtakna pen, Ama’ mite pen citaklo den uh a, Pasian nawlkhiin uh ahih manun, Pasian khasiat liang dongin thukhenna thuak liang uhhi. Pasian pen hehpih thei mahmah ahihte hang, thukhenna sungpan pampaih pah tuanlo hi. Mailam a sinna te sungah itna leh thumaan tonkhawm i mu ding uhhi.

Na gilpi kitok gawp liang dongin naheh a suak ngei hiam? Tua mah pen Pasian in Amite’ tungah a lungsim puak hong lahna ahi hi. Hehpihna thosak cihpen (**kamar**) hi a, tuapen kumpi Solomon kianga hongpai, naungek khatpen kei aa hi a ci tentan nupi nihte gel tangthu sungah kizang hi. Solomon in tua naungek phelnih suah ding (naupang suksiat nopman hilo) acih ciangin, naupang’ nu taktak sunga hong piang lainatna a cihna ahi hi (*1 Kumpite 3:26; leh Pian. 43:30 enkak in*).

**Nulehpa ahi sa peuhmah in tua tangthu in bang gennuam cih tel peuhmah uhhi. Leitung ah tehkak theih ding itna dang om tuanlo hi. Pasian hong itna taktak, leh hong piaktheih lungnopna hih tungtang ah bang peuh omthei ding hiam?**

**TUESDAY**

*January 21*

**Zeisu Hong Hehpihna**

Pasian hong hehpihna limpua dingin Laisiangtholui in a zat tengmah Laisiangthothak in zangpha kik hi. Paul in Pa pen “*hehpihna a neipa leh kisapna khempeuh hong huhpa*” (*2Cor. 1:3*) naci hi. Paul mahin Ephet 2:4 sungah “*hehpihna lian mahmah*” ahih manin, “*hong itna lianpi tawh Ama’ it mite tankhia*” cihhi.

Gentehna dangah zong, Christ in awm sungpan, gilpi gilzang natlawh liangin itna tawh Pa Pasian hong hehpihna lim hong lak hi (*Mate 18:27; Luka 10:33; Luka 15:20*). Haksatna thuakte Zeisu in veii in a hehpihna pen Laisiangtholui leh a thak in a zat kammal teng mah Gospel laibu teng in zong zangkik uhhi.

**Mate 9:36; Mate 14:14; Maku 1:41; Maku 6:34 leh Luka 7:13 simin. Mate 23:37 simbeh in. Hihmun tengin Mihingte’ tuaksiatna tungtang ah Zeisu in koibang in veii hi ci hiam?**

.....

Mihingte haksatna leh kisapna sungah Christ in hehpih mahmah ahihlam Gospel laibu sungah ki pulak phapha hi. Hehpihhuai sak ciang bek hilo, amau kisap nate zong vaihawmsak lai hi.

Zeisu in Amite kahlai hi. Christ’ mit pan hong luang khitui pen khuapi a et manin a luang cih phawk ding hihang. “*Akpi in a kha tawh a note a huai mah bangin na mite kahuai nuam tawntung a, ahi zongin na utkei hi*” (*Mate 23:37*). Hiteng a Christ kahna kammal tengin, Laisiangtholui sung tawntung a Pasian mah hong

phawksak hi. Hih vasapi in a note huai cihpen, tualai nisuahna gamte in Pasion bekmah limpua in a zatzel uh ahi hi. Thuhilh kikna 32:11 sungah Pasion pen, a note tungah a kha a zap, a khate zak in a note a man, a kha tawh a note a pua muvanlai tawh limpuasak uhhi.

**Pasion hong hehpihna lian pen, itna lianpi hong lahkhiatna Zeisu longal bangmah dang tawh tehpih theih ding omlo hi. Ahihhang, Christ in Pasion' limpua picingpa bek hilo, mihing' limpua picingpa zong ahi hi. Eite'n zong midangte kisapna don in, Pasion hong itna tangko bek hilo kician takin hong itna lim ciing zaw in Christ nung zui dingin eima nuntakna koibang in puahpha thei ding ihi hiam?**

WEDNESDAY

January 22

**A Haza Pasion**

Laisiangtho Pasion pen “*hehpihna kidim Pasion*” ahi hi. Hebrew pau in Pasion pen **el rahum** (*Thuhilhkik 4:31*) ci uhhi. “**El**” cihpen “*Pasion*” hi a, **rahum** a hihleh, hehpihna **raham** panin kammal dangkhat ahi hi. Tua hi a, Pasion pen hehpihna kidim Pasion bek hilo in, a **haza** Pasion, **el qana** zong hilai hi. Thuhilhkikna 4:24 in zong “*Topa na Pasion uhpen “a kangtum thei meikuang, a haza Pasion ahi hi (el qana)” (Thuhilhkik 4:24; 6:15; Joshua 24:19; Nahum 1:2).*

**1Cor. 13:4 in zong “itna in hazalo” cihhi. Hithei ding maw, Pasion lah “a haza Pasion” cizel? 2Cor. 11:2 sim inla, Laisiangtho sung tawntung ah Pasion' mite cihtak lohna teng ngaihsun pha in (Late 78:58 enin). Hihteng panin Pasion “hazatna” tawh kisai bang khuavak na mu hiam?**

.....

Pasion’ “**hazatna**” kitelkhialsak den hi. Nupa kikal zi leh pasal kihazatna bangin ngaihsun le cin, ki zahtak tuahna in mu khollo ding hiteh. Hazatna cih limlim a hoihlo lamta in ki ngaihsun zaw tek hi. Laisiangtho leuleu in, hazatna peuhmah a hoihlo lamin zang hetlo hi. A thumaan itna nei pasal khat in a zi tawh a kizopna ah thudang bangmah a lutsak loh bang ahi hi.

Itna neite in hazalo (*1 Cor. 13:4*) ci hinapi; *2 Cor. 11:2* ah hazatna siangtho zong na omzel leuleu hi. Paul in tua hazatna siangtho pen “*Pasion hong hazatna*” (*2Cor. 11:2*) cihhi. Pasion hong hazatna bekmah thumaan hi tawntung a, hong hazatna itna cih ding hizaw hi.

Pasion’ hazatna (**qana**) pen Amite a lunggulh luatna ahi hi. Pasion in midang kihello in Amite tawh kizom nuam hi; amaute’ Pasion Amah bek hinuam hi. Pasion pen a ngaihnu a taai pahpah pa hi a, Ama’ itna pen Hosea bangin sum tawh liau a kul hetlo itna siangtho ahi hi (*Hosea 1–3; Jer. 2:2; Jer. 3:1–12*). Tua hi a, Pasion hong “*hazatna*” leh “*lunggulhna*” in hehna beisiang hi deklo a, mi ginalo te peuhmah amau tawh kituak thukkikna om ngiat hi. Pasion hong hazatna pen lunggulh hazatna hi a mihing’ hazatna bangin a sialam khat beek zong kihel kilkel lo hi. Deihgawhna om hetlo a, Amite’ mailam leh a hoihna dingin zawl kikal ah sial thawl sak nuamlo hi.

**Pasion in eite hong “hazatna” mahbang in eite'n midangte tungah koibang in haza siam thei ding ihi hiam?**

THURSDAY

January 23

**Hehpihbaih Khasiabaih**

Laisiangtho Pasion pen hehpihbaih in khasiabaih a, tuamah pen Zeisu Christ sungah nakpi takin hong kilak

hi. Pasion in hehpih siampa hi a (*Isa. 63:9; Heb. 4:15*), Amite' dahna hangin khakham veii in (*Thukhente 10:16; Luka 19:41*), amau' thumna za nuam, dawng nuam in hehnem nuam hi (*Isa. 49:10, 15; Mate 9:36; Mate 14:14*).

**1Cor. 13:4–8 simin. Pasion in hong hehpihbaihna leh hong itna tawh hong kizoppihna teng midang tungah koibang in lengkik saktei ding ihi hiam?**

.....

1Cor. 13:4-8 sunga om itna bang tawh midangte kizoppih nuam hihang. Tuabang mi ahi dingin bang tanvei ki hanciam ngei hiam? Lungduai theilo, migi theilo hihang; deihgawhna, kisaktheihna, ngongtatna leh angkhualna cihte vengsak zolo hihang. "*Lung kiatna, upna, lam-etna, lungduaina leh kipkhona cihte*" (1Cor. 13:7, 8) eima' lungsim sungah kaikhawm mahmah lo hi hang. Tuabang itna pen Kha Siangtho gah in eima nuntak na sungah kinei thei bek hi. Tua Kha Siangtho mahin, Christ sungah upna a nei mite sungah Pasion hong itna hong guansuk ahih manin Pasion phat hihang (*Rom. 5:5*).

Pasion' hehpihna leh Kha Siangtho vangliatna tawh; a dik a thutang den tawntung Pasion lungsim puak leh omzia taktak koibang in dawngthuk thei ding ihi hiam? *Khatna*, itna ahi tua Pasion tungah biakna pia leng a hoih pen dawnthukna hipah hi. *Nihna*, midang tungah hehpihna kidim leng tua Pasion' itna a dawngthuk mah ahi hi. Christian upna sungah lungnuam hithiat lelpeuh lo in midang te'n zong tua upna tawh a lungnop theihna ding hanthawn ding hihang. A nunungpen in, eima' lungsim eimah'n khel theilo hang a, Pasion bekma in hong khelthei cih phawk ding hihang.

Tua hi a, Pasion ading midangte a ding lungsim thak, a siangtho itna leh pumpi sung a buahbang teng a ki siansuah lungsim ngen ding hihang. Eima thungetna limlim zong "*Note khatlehkhat na ki itna uh leh mikhempeuh na itna uh hong liansak semsem taken la; i Topa Zeisu a misiangtho te khempeuh tawh hongpai ciangin, Pa Pasion' maiah kisuanna om hetlo in lungsim siangtho takin na omthei ding uhhi*" (1Thess. 3:12, 13).

**Hihbang itna lahkhiat theihna dingin, banghang in, eima lungguhna pianpih gitlohna teng sihsak phot tadihdih kulthei hiam? Eima' pumpi deihna sihsak phot dihdih nadingin bangteng teeltheih omlai hiam?**

FRIDAY

January 24

**Ngaihsutbeh Ding: Ellen G. White, *Thoughts from the Mount of Blessing* laimai. 6–44 ah "*The Beatitudes*" simin.**

"*Amou' kha zawng mahmah cih thei, amou' sung hoihna bangmah omloh lam a thei mite khempeuh in, Zeisu a etna tungtawn in dikna leh thahatna ngah ding uhhi. Zeisu in 'vangik pua a gim mite aw Kei kiangah hongpai un' (Mate 11:28) cih. Nomou' zawwna leh Ama' hehpihna sungah hauhna tawh khek dingin hong zol hi. Eite Pasion' itna ngah taaklo ihih teihang, eite' lungmuanna Christ in kilawm ahih manin, Ama' kiang hong pai mi peuh mah hong honkhia hi.*

*Hun beisa sunga bangpeuh nahi a, tu in zong lungkiathuai dinmun ah om ta lecin, thanem, huhpa neilo, lungkia in na om hang, nahih bangin Zeisu kiang nongpai nakleh; hehpihna kidim Honpa in gamlapi panin hong delh in dikna puan tawh hong tuam ding a, hong itna a khut tawh hong kawi ding hi. Ama' gamtatna hoihna puanpak tawh hong*

tuam in Pa kiangah hong pulaak in; Hih mawhneipa' dinmun Keimah' lakkiatsak zo ing ci ding hi. Hih a vakthap naupang en ke'na, Keimah hong en in ciding hi. Eima' khate langkhat ah Satan in kiko in hong mawhsak banah, ama' mite ci in hong huam nuam mahmah napi'n, Zeisu' sisan kikona in vanglian zawtham hi" —Ellen G. White, *Thoughts from the Mount of Blessing*, pp. 8, 9.

### **Kikupding Dotnate:**

**1. Eite pen a Pa kiangah hong ki-aap ding cih lungngai pha in. "Ama' gamtatna hoihna puanpak tawh hong tuam in Pa kiangah hong pulaak ding hi". Eima mawhna khialhna teng hangin, lungkiathuai mahmah phial taleh, Pasion in eite hong luansuk Ama' itna bang itna mi tungah lengkik sak zo kei zongin; Zeisu in "Ama' gamtatna hoihna puanpak tawh hong tuam in Pa kiangah hong pulaak" ahih manin, Pasion ing hong sang cih lungdamthu kiang banghang in zuankik zelzel ding hiam?**

**2. Solomon kiangah naupang khat ii nu dingin hong pai nupi nihte lakpan anu taktak dingin kingaihsun in. 1Kumpite 3:26 sunga kammal teng a paukhanu lungsim ding ngaihsun in. Hosea 11:8 sunga Pasion in Amite ading kampauna te tawh koibang hi nasa a, bang khuavak nangah lawh hiam?**

**3. Lungdamthu sungah Zeisu in Amite ki tangsapna teng veii mahmah hi. Amah'n bang hih hiam? Amite ki tangsapna teng vaihawmsak hi. Nangma mimal ahi a, SS khan bup na hi uh zongin tangsapna neite leh hehnep kisamte na koici huhthei ding hiam?**

### **Lesson 5**

*January 25–31*

### **ITNA HANGIN PASIAN' HEHNA**

#### **SABBATH NITAKLAM**

**Tukalsung Simding:** *Late 78; Jonah 4:1–4; Mate 10:8; Mate 21:12, 13; Jer. 51:24, 25; Rom. 12:17–21.*

**Kamngah:** **"Amah in hehpihna lungsim nei ahih manin, amau' khialhna te maisak in, amaute susia lo hi; Amah in a hehna ipp zelzel a, a hehna khempeuh phongkhia lo hi"** (*Late 78:38*).

**Pasion'** hong hehpihna icihcih teihang, Ama' hehna buaipih zellai hihang. Pasion in itna ahih manin hehna peuhmah pulak keileh ci uhhi. Tua ngaihsutna khial hi. Ama' hehna zong Ama' itna panmah in hong piang ahi hi.

Pawlkhath leuleu in Laisiangtholui Pasion pen a heh Pasion hi a, Laisiangthothak Pasion ahihle, itna Pasion ci uhhi. Pasion khatbek om a, alui athak a kibang hi. Itna Pasion in gitlohna tungah heh hinapi – tomgen leng Amah itna ahihman hizaw hi. Gitlohna tunga Zeisu' hehna in thuthuk taktak hi a, Laisiangthothak in zong midikte leh akul kizam bangin Pasion' hehna tamveipi pulak hi.

Pasion' hehna cihpen gitlohna leh thumaan lohna langkhat ah Ama' dikna leh itna tawh dawnthukna ahi hi. Pasion' hehna pen, Ama' hoihna leh itna hangin thumaan lungkim lohna hi a, piansaksa khempeuh tungah om ding hi. Gitlohna leh thumaan lohna a dawnthuk na ahi hi. Gitlohna in a matsa mite leh tua migilote in Pasion' hehna

thosak hi. Pasion' hehna icih in Lamkhat panin Pasion hong itna mah ahi hi.

**SUNDAY**

*January 26*

**Gitlohna in Dahsak**

Laisiangtho Pasion in thumaan it a gitlohna mudah hi. Mawhna leh gitlohna in Amah khasiasak a, tua khasiatna pen nenniam leh bawlsiat thuakte banah, mikhat' gitlohna in amahmah sukha kik lailai man ahi hi. Gitlohna in Pasion piansak sate susia a, tua a gilopa mahmah zong susia ahih manin Pasion in gitlohna mudah hi. Lasiangtho sungah, Pasion pen langdona in phin kinken cihhi.

Mihing in Pasion langdo in gilo uh, a lauhuai a mulkimhuai naupang biakpiakna khawng tawh Pasion' maiah kihhuaina bawl uhhi.

Pasion in mihingte khensatna ombang in nungkin hi.

Mihingte gamdang mite in nengniam uhhi

Mihingte in zong Pasion kiangah hotkhiat ding kiko uhhi.

Pasion in hehpihna lianpi tawh suahtak hi.

Mihingte in Pasion langdo leuleu uh a, nunga sangin suukzaw thamtham lai hi.

Hih mihingte langdona leengpei kipei sungah ngongtat, tatsia den uh a, Pasion in zong mihing' gitlohna bekbek phukha den hinapi; mongneilo cihetakna lungduai takin thuak tentan na, a lamdang hehpihna leh a thuk mahmah lainatna pia den zawsop hi.

**Late 78 simin. Amite' langdo kinken na pen Pasion in a dawn thukkikna hihmun in bangteng gen hiam?**

.....

Laisiangtho sungah, itna leh thumaanna in kihual khawm hi. Pasion' hehna cihpen gitlohna in a sukkhak Pasion in a itmi khatpeuh a dingin itna tawh dawnthukna ahi hi. Laisiangtho sungah thumaanlo pipi in Pasion a hehna munkhat zong omlo hi.

Pasion' mite Amah nusia in a khem zel uhen kum zalom tampi mah hi a, bangbang hitaleh thusia lasia tampi khangin Pasion in lungduai takin hehpihna plateitei (*Neh. 9:7-33*), bangmah tawh a kiteh theilo hong hehpihna leh thuak zawhna tawh itna honglak hi. Late 78:38 ah Pasion in, "*hehpihna lungsim nei ahih manin, amau' khialhnate maisak in, amaute susia lo hi. Tamveipi mah a hehna hemkhia in a sin sosak pahpah lo hi.*"

**Mite tungah gitlohna a kibawl peuhmah nahehsuak mahmah hi. Tua mahbang in gitlohna tungah Pasion a heh dingdan koibang in hong telsiam saktei hiam?**

**MONDAY**

*January 27*

**Pasion Hehhak**

Pasion in itna ahih manin gitlohna tungah heh hi. Pasion lungduai luat man leh a hehpih theih luat manin a taigawp Laisiangtho kamsangpa khat tungah Pasion in hehpihna lianpi mah pia hi.

**Jonah' tangthu lungngai inla, Nineveh mite tungah Pasion' hehpihna leh maisakna tungah, Jonah in a dawnthukna ngaihsun in, Jonah 4:1-4. Jonah, leh Pasion tangthu bangteng gen hiam? (Mate 10:8).**

.....



Jonah in Pasion' hehpihna lam nih tawh dawngkik hi. *Amasa* in Jonah' lungsim khauhna pulak masa hi. Assyria minamte in Israel mite tungah a ngongtatna teng hangin amau mudah mahmah ahah manin Pasion in tua mite a hehpih ding deih saklo hi. Ei a ding in pilhuai mahmah hi. Tuabang lungsim peuhmah neihkhak lohding kikep huailua hi. Pasion' hehpihna a sangsa mikhempueh in, ei thalawh tawh a hihetlo tua hehpihna peuhmah pen midang hawmsawn nuam hamtang ding hihang.

*Anihna*, Jonah' dawnthukna in, Pasion' lainatna leh hehpihna pen Ama' omzia cih hong lak hi. Jonah in Pasion hehpihna tawh ki tanau liang khinzo a, Pasion pen "*hehpihna tawh a kidim, a hehhak in a migi mahmah*" (*Jon. 4:2*) nahi hi cihhi. Pasion in Nineveh tungah thukhen na'ng pan kisik teitei ding cih Jonah in thei gige hi. Pasion in mikhempueh minam khempueh tungah thumaan leh hehpihna tawh thukhen hi.

Hebrew kammal panin a kilet "*hehhak, lungduai*" cihte pen "*naksau*" ci in let ding hi zawsop hi. Hebrew kamthuk sungah hehna pen nak tawh genteh uh a, naksau zahzah pen hehhakna ci uhhi. Pasion "*naksau*" a cihnak vualeh, Pasion hehhak in lungduai a cihna ahi hi. Mihing' hehna dingin hun tampi la khol hetlo lel ahihhang, Pasion pen lungduai in thuakzo khialua, hehpihna pen a khawnkhong in hong luangsak, siansuah nailohpi khawng mawhna hong muhmawh bawlsak mai hi. Bek thamlo, mawhna gitlohna siansuah nadingin singlamteh tungah lampi hong hon in, tua mipa a um peuhmah siangtho ding cihhi (*Rom. 3:25, 26*).

**Nang tungah hong khial khatpeuh hehpihna laklo in na omkha hiam? Pasion in nang hong hehpih**

T-4

**mahbang in, nang zong mi na hehpih theih ding nang tungah Pasion hong bawlsa teng koibang in phawkkik thei ding nahi hiam? Mawh theih na'ng thu pia ihih hetloh hang, mi tungah koibang in hehpihna lainatna lakthei ding ihi hiam?**

TUESDAY

January 28

**A Thumaan Lungkimlohna**

Hehna hoihlo tampi a omtei hang, Laisiangtho in zong "*a thumaan lungkimlohna*" zong pulak hi.

Nu khat in, kumthum a phapan a tanuno tualpi ah kimawl a et laitak in, papi khatin a tanuno hong galbawl pak dingin ngaihsun in. Tua nupi heh loding hiam? Hehmah e! Hehna pen itna panin hong piang dawnthukna namkhat ahi hi. Hih gentehna panin "*a thumaan Pasion' lungkimlohna*" telpha pah niteh.

**Mate 21:12, 13 leh John 2:14, 15 simin. Biakinn a ki thaangzatna hangin Zeisu' dawnthuk kikna tungtawn in; gitlohna tungah Pasion' hehna koibang in hong telsak hiam?**

.....

Hih tangthu sungah, a thumaan lungkimlohna tawh Pasion' biakinpi khawng "*guta buluhte kua*" suaksak a, meigong tagah leh mizawngte tungpan a meet bawlnuam te tungah, Zeisu in "*a siangtho lawpna*" a lahkhatna ahi hi (*Mate 21:13; John 2:16*). Biakinn nasep khempueh pen, Pasion hehpihna, maisakna, mawhneite siansuahna mun kimlai, mi zawngkhal pente zawhthawh bawlana mun peuhin kizang hi. Hih kihhuaina tungah Zeisu a heh ding mah hilo hiam?

Maku 10:13, 14 leh Maku 3:4, 5 cihte in Zeisu' a thumaan lungkimlohna dangte zong hong laklai hi. Mite in naupangte Zeisu kiang hong paipih ciangin “nungzuite in tua naupang hong paipihte taigawp” ahih manun; Zeisu a “hehsuak” a cihte - “**Lungkimlo**” cihna ahi hi. “Tua naupangte Ka kiangah hong paisak un” (Maku 10:13, 14) cizaw hi.

Mundang ah zong, Zeisu in Sabbath ni in cina a damsak manin, Sabbath palsat hi ci-in a mawhsak uh ciangun, Zeisu in zong, “Sabbath ni in a hoih maw asia bawl ding, honkhia ding maw that ding” (Maku 3:4) ci in dawngkik hi. Zeisu in “hehmai tawh akim apam teng en kawikawi in, ahihhang, amau' khialhna leh thu phawk theihlohna hangin khasiat huai saze” ahih manin, cinapa damsak sawm hi (Mark 3:5). Christ' hehna pen, amau' lungsim khauhna hang in khasiatna tawh kithuah hi a; itna hangin thudik hehna, Laisiangtholui sunga Pasion in itna pen gitlohna in a va sukkhak ciang in a hehna mahbang ahi hi. Itna in gitlohna tungah banghang in heh theilo tuan ding, itna in a itmi gitlohna in sukha mawk hiven?

**“A thumaan lungkimlohna” khawng zong selo dingin koici kikep theih ding hiam? Tuabang zon ding banghang in baihlam mahmah a, tua a khelmei thaang pan koibang in kikem thei ding ihi hiam?**

WEDNESDAY

January 29

**Pasion in Lungsim Tawngpan Hong Gawtlo**

Laisiangtho sungah, totcil leh nenniam thuakte a khasiatna leh tuabang in a tatsia mite tungah thumaan lungkimlohna lak den hi. Gitlohna omkei leh, Pasion zong hehlo ding hi. Ama' hehna peuhmah Ama' piansak sate a susiate tungah heh ahi hi.

Kahla 3:32, 33 sungah, Pasion in lungsim tawngpan hong Gawtlo (*lungsim takpi*). Gitloh gamtate thukhen nuam hetlo hinapi, itna thukhenna mah hong kal hi. Pasion in Amite maisak zelzel in kisikna tawh Ama' kiang hong zuatkik na'ng hunhoih pia zelzel main hih atung a thupen thumaan ahihna honglak den hi. Kamsang khatkhit khat tawh, Pasion in Amite samkik zel hinapi, amau un nialzel uhhi (*Jer. 35:14-17; Late 81:11-14*).

**Ezra 5:12 leh Jeremiah 51:24, 25, 44 simkak in. Babylon hunlai in, Jerusalem tungah a tung thukhenna koibang in hong telciansak nasa hiam? (2Khang. 36:16.)**

.....

Ezra 5 sungah, kisik vetlo in Pasion hehsak den uh ahih manin, Pasion nungkin liang in, Amite “*Babylon kumpipa' khutsungah pia*” (Ezra 5:12) cih. Tua zong Pasion' hehna a “*dam zawh nawnloh ciang*” (2Khang. 36:16) cipan lai a, tua nung ciangin, Pasion in Judah mite a bawlsia Babylon tungah thukhen hi (*Jer. 51:24, 25, 44; Zech. 1:15*).

Pasion in Amite tungah a thukhenna dang tampi takmah Laisiangtho sungah om a, galte' khutsungah Amite “*pia*” (*Thukhente 2:13, 14; Late 106:41, 42*) a, tua zong mite in Topa nusia in minamdangte “*pasiente*” biak ding a khensatna uhtawh kizui cilai hi (*Thukhente 10:6-16; Thuhilhik. 29:24-26*). Pasion' hehna pen gitlohna thuhilhna hi a, a tawpna ah gitlohna khempeuh ki susiasiang ding ahih mahbang in, tua hehna zong, mawhna, langdona leh gitlohna khempeuh a ki suksiat siangna ding, khua vannaui a hoihna dingin Pasion hong itna hong kilahna ahi hi.

**Pasian in mi khatpeuh tungah thukhen nuamlo cihthu hangin, Pasian hehna tawh kisai koibang in hong telcian saktuam hiam? Pasian zong hehhak ahiah manin, ei zong eima kimlehpam tungah thuakzawhna lungduaina neihhuai lomaw? Bawlsiat thuakte kepcin kawmin koibang in kidophuai nasa hiam?**

THURSDAY

January 30

**Hehpihna Lak**

Pasian' hehna pen "*lauhuai*" mahmah hinapi, ngongtatna cikziat lohna kihello hi. Laisiangtholui leh thak sungah gitlohna langkhat ah Pasian hehna peuhmah pen hong itna hang hizaw den hi. Guksim in a gamta den gitlohna tungah, hoihna sianthona tawh Pasian' hehna in lauhuai khia mahmah hi.

Pasian pen lo-thei-lo itna hi a, hehna bel kisamlo lel hi. Gitlohna leh diktat lohna a omlohna ah; hehna omlo pah hi. A tawp a banna ah Pasian' itna lianpi in vannuai panin gitlohna a hepkiat siang ciangin, hehna zong heemsiang tading hi. Tua pan kipan gitlohna leh thu diklohna in cikmah hunin piang ngei nawnlo ding hi. Tawntung lungnopna, itna picing leh thumaanna tawh kikhawl ding uhhi. Tualai ah Pasian' hehna kizam nawnlo ding hi. Lamdang taktak ei maw!

**Pawlkhat te'n Pasian hehle, mihing tungah thukkikna hong pia denkeei thei ding maw cih lungkham uhhi. Thuhilhikna 32:35; Paunak 20:22; Paunak 24:29; Rom. 12:17-21 leh Hebrew 10:30 simin. Hihmun tengin mihing phu kilak ding koibang in hong kemcing hiam?**

.....

Laisiangtho bangin, Pasian in thukhen theihna thu nei a, thu a khen ciangin zong, thumaanna picing takin khen hi. Laisiangtholui leh a thak in, thukkikna pen Pasian a ding in kikoih hi cih. Paul in Rom. 12:19 sungah "*Kong itte aw, na hehna uh kuamah tungah thukkik kei un. Pasian thukkik dingin koih lel un,*" Laisiangtho sungah, "PHULAKNA LEH THUKKIKNA KEI AA HI" (*Thuhilhikna 32:35*) cih.

Pasian in thumaan lohna leh gitlohna tungah thukhen ahiah manin, Christ in Amah a ummi a ding lampi khat bawlsak hi. "*Zeisu in hong tung ding Pasian hehna panin hong honkhia*" (*1Thess. 1:10; Rom. 5:8, 9*) cih. Pasian' geelna bang hileh: "*Pasian in Ama' hoihna a thuak dingin ei hong teel hilo a, i Topa Zeisu Christ hangin hotkhiatna a ngah ding in a hong teel ahi h?*" (*1Thess. 5:9*) cih. Pasian hehna pen a kimaw nawlkhin hilo; Zeisu a ummi peuhmah Christ hangin tua hehna panin suakta ding hi.

**Christ' hong thoihna in thumaan lamto kawmin, Pasian hehna pan hong khakhia hi. Nang mawhna khempeuh pampaih in, nang a ding tua zah hong vaihawm sak ahieh, nang zong midangte tungah bangzah hehpih siam thei ding nahi hiam?**

FRIDAY

January 31

**Ngaihsutbeh ding: Ellen G. White, *Patriarchs and Prophets* laimai 315-330, "Idolatry at Sinai" simin.**

Bawngno lim tawh kisai in, Ellen G. White in, "*Israel mite in amau hamphatna dingin Kumpipa in apiak thute lungkim takin thumang ding hi ung cih a kamciamsa pelhna tawh mawhna lianpi bawlkha uhhi. Pasian' ukna a kip nakleh thu palsat khempeuh thumaan in thukhen teitei ding hi. Tua kaumkal mahah Pasian hehpihna hong lailut hi. Thukham a kipsak laidak mahin, kisik theih ding hun deihteel theihna pia*

dihdih zen hi. A kisia miteng ahieh leh a langdo paisuak teng ahi uhhi.”

“Hih mawhna pen kigaam teitei ding a, kimlehpam minam dangte in milim biakna peuhmah, Pasion deihloh lam a theihna dinguh ahi hi. Mawhneite tungah thumaan thukhen na tawh, Pasion’ khutzatpa Moses in, amau’ mawhna nialna in mipi maiah laitawh ciamteh ding cih. A nungciang in Israel mite in amau vengte milim biak khawng mawhsak khaleh, a galte un zong; No zong Jehovah ka Pasion uh ci napi, Horeb ah nomau zong bawngno lim bawl nabia ta vevua leh ci ding uhhi. Tua thumaan a theihna dingun ki sawngawh phial hita mahleh, Israel tate in zong a mawhneite kigapna lahkha thei a, tua tungtawn in amaute mawhna ki tuamkoih tuan hetlo cih a theihna ding uh ahi hi.”

“Itna in thumaan sangin neuzaw tuanlo ahieh manin, hih mawhna thu kikhen teitei ding hi. Mi awntampi tungah thukhenna a tun lohna dingin mi tul tampi mahin thukhenna thuak kul hi. Tampi a hotkhiatna dingin a tawmzaw gawt kul hi.”—Ellen G. White, *Patriarchs and Prophets*, pp. 324, 325.

### **Kikupding Dotnate:**

**1. Pasion’ hehna tawh mi tampi lungsim abuai uhpem na bangci ngaihsut hiam? Bang in tuathu hong telsiam sak hiam?**

**2. Pasion in zong khatvei beek a zon ngeiloh thukkik na’ng hun na zonzon ciangin bang buaina piang zel hiam?**

**3. Israel mite’n bawngno’ lim tawh a langdona hangin thukhenna in, koibang in Pasion hehpihna hong phawksak hiam? Pasion’ thukhenna pen hong itna tawh nasepna mah ahiehna Laisiangtho mundang koiteng ah om hiam?**

## **Lesson 6**

February 1–7

### **PASIAN IN THUTANG IT**

#### **SABBATH NITAKLAM**

**Tukalsung Simding:** *Late 33:5; Late 85:10; Thuhilhikik. 32:4; James 1:17; Titus 1:2; Pai. 32:14; Mate 5:43–48.*

**Kamngah:** “**A kisatheite in, Keimah, leitungah migitna, thumaan leh thutang a zang kahihna, leh tuate sungah nuam a sapa kahihna thu hong theihna sungah kisathei uh hen. Topa in hihthu hong genkhin hi cih.**” (*Jer. 9:24*).

Tanglai Nisuahna lam a “*pasiente*” pen a kipmello pasiente, zualzang, theikhholna neilo, kihhuai lunggulhna naupang biakpiakna cihbang te kal uhhi.

Thuhilhikikna 32:17 ah, hibang pasiente’ nungah dawite om cih (*1Cor. 10:20, 21*). Amau’ biakpiakna peuhmah angkhuahna vive hi a, mipite ading khalam khua mialsak zawsop hi.

Laisiangtho Pasion ahiehleh tua daw’ thahatna tetawh hong kibanglo ding hi. Yahweh Pasion in hoieh a, kikhel ngeilo hi. Tua Pasion’ hoiehna kipkho hangmah in eite’n zong tawntung ading lam-etna neitheh hihang.

Tanglai a pasian diklo teleh, tuhun a “*pasiente*” tawh enkak leng, Yahweh Pasion in, gitlohna, thuaksiatna, thumaan lohna leh nenniamna cihte awlmawh mahmah a, a vekpi in mawhsak gai hi. Bek thamlo khatvei ciangin tuate khempeuh heemsiang ta ding hi.

SUNDAY

February 2

**Itna leh Thutang**

Laisiangtho sung tawntung ah, itna leh thutang tonkhawm den hi. itna diktak in thutang kal ngiat a, thutanna dik pen itna sung bekmah ah omthei hi. Hih tegel tawh kisai kuamah'n ki ngaihsun kha hetlo ahihhang, tua itna leh thutang peuhmah pen mihing te in thu-kawng hei ngiat uhhi.

**Late 33:5; Isa. 61:8; Jer. 9:24; Late 85:10 leh Late 89:14 simin. Hihmun tengah Pasion in thutang deih ahihna koibang in khuavak hong pia hiam?**

.....

Hihmun ah Pasion in thutang it cih (*Late 33:5; Isa. 61:8*). Laisiangtho sungah itna leh thutang pen a ki kai-ocip ahi hi. Pasion hong itna leh Pasion' dikna luangkawm den a, hih leitung ah zong dikna leh thutang om ding deih mahmah hi.

Tanglai kamsangte in zong thutang lote, thukhun hoihlo, tehna diklo, thumaanlo takin mizawng cimawh meigongte bawlsia nengniam cih peuhmah talsik in langdo sinsen uhhi. Mihing in gitlohna leh thutanglo vive zang uh hitaleh, Pasion bekmah "*leitung ah migitna thumaan leh thutang a zangpa hi*" (*Jer. 9:24*). Pasion' thukhenna in gitlohna bawlte leh mi a nengniamte tungah gapna pia ahah manin, Ama' tungah a citak mite in a thukhenna hoihsa uhhi.

Dikna leh thutang pen Pasion' ukna gam thu tawphahpi ahi hi. Pasion' itna gam ki ukna lungsim-puak pen thutang leh thudik hi a, leitung kumpite in thumaanlo

takin amau hoihna ding bek hanciam uh ahah manun Pasion gam tawh kibang theilo hi. Pasion sungah "*Itna-kip leh dikna kigawm in, thumaan leh kilemna kihual ding uhhi*" (*Late 85:10*).

Eite' lam-etna pen Pasion in ki telcian sak mahmah hi. "*Topa in note tungpan in hong kalh thu in: thumaan thutang sem ding a, itna-kip nei tawntung in, kiniamkhiatna tawh Pasion' thu man ding ahi hi*" (*Micah 6:8*). Pasion' omzia khatpeuh lengkik sakthei ding hileng; itna leh tua sungpan hong selkhia a thutanna, lainatna – hiteng pen a bulpi ding ahi hi.

**Mihing te'n thutang a pampaihna lahtheih ding bang peuh om hiam? Pasion' thutanna picing pen koibang in ngen thei ding ihi hiam?**

MONDAY

February 3

**Pasion Hoih Kicing in Thudik**

Pasion in thutang it ding leh itna tawh thutang ding in mi samziau hilo in, Pasion mahmah in kicingtak leh sawi hetlo in tuate hong lak hi. Laisiangtho in Pasion pen avek khawzang sangtho, citak, thudik in itna ahi hi.

**Thuhilhikna 32:4 leh Late 92:15 simin. Hihmun tegel in Pasion' Cihtakna leh Thudikna bangteng gen hiam?**

.....

Hite bek thamlo a dang tampi in Pasion thutang in itna ci a – "*Ama' sungah thumaan lohna omlo*" (*Late 92:15 leh etkak ding Late 25:8; Late 129:4*) cih. Pasion in "*thumaan lo in gamta ngeilo a, a thumaan lote in maizum theilo*" (*Zeph.*

3:5) cih. Pasion in a thumaan a gamtatna leh thumaan a itlote' gamtatna enkak dih in.

Pasion in mimalsim a ding a hoihpen thei a, mimalkim zong hoihsak nuam in, mi khempeuh kihelkim na tawh a hoihpen suaksak nuam hi.

**Late 9:7, 8 leh Late 145:9–17 simin. Pasion tawh kisai bang gen hiam?**

.....

Laisiangtho Pasion pen “*a thutang thukhenpa*” (Late 7:11), Ama' sungah gitlohna omlo hi (Late 5:4). 1John 1:5 in “*Pasion in khuavak hi a Ama' sungah khuamial omlo hi*”. Pasion in hoih kicing bek hilo, James 1:13 in “*Siatna tawh Pasion ki ze-et theilo*” cih (Hab. 1:13 enkak in). Tua hi a, Pasion' hoihna leh minthanna zong a kikai-okcip ahi hi. Milim tampi in vanglian teleh Pasion in vanglian kicing a, ahihhang Ama' vangliatna pen a thutang leh a ithuai te a ding bek ahi hi. Moses in kuama nget ngei hetloh, “*Na vangliatna hong lak in*” acih ciangin, Pasion in “*Keima hoihna khempeuh namai ah kapai sak ding hi*” (Pai. 33:18, 19) cih.

**Hizah ahoih kicing Pasion in banghang in hih leitungah gitlohna omding in phalthei hiam? Kikum un.**

TUESDAY

February 4

**A Kikhel Ngeilo Pasion' Omzia**

**Malachi 3:6 leh James 1:17 simin. Pasion' omzia bangteng gen hiam?**

.....

Malachi 3:6 sungah, Pasion in “*Keimah Topa Kahi a, Ka kikhel kei hi*” cih. Pawlkhat inbel Pasion pen bangbang

hitaleh kikhello ngiat ci-in a um zong om a, anuai simsuk suak leng Pasion kikhel thei cih thu: “*Jacob suan leh khakte aw, note na beimang kei uhi*” Azom lianah Pasion in Amite kiangah, “*Kei kaingah hong ciahkik un, Kei zong note kiangah kong kihei ding hi*” (Mal. 3:7 ZSV) cih.

Pasion in a piansak nate tawh kinai takin hong kikhawl a, tuabang in hong kinai kholh mahmah hang, Ama' omzia pen kipden hi. James 1:17 in zong tua thu kip-sak a, a hoih thu leh na khempeuh Pasion kiangpan hong pai hi a, kuamah deidan neilo hi. Pasion in gitlohna bul hilo hi.

Hihteng leh mundangte ah zong Pasion' gamtatna kikhel ngeilo ci hi. Tomgen leng Laisiangtho in Pasion' omzia kikhel lo cih. Tua hi a, Pasion in A piansak sa, Ama' itna leh thutang a sangte tawh kikhawl taktak thei hi.

**2Tim. 2:13; Titus 1:2; Heb. 6:17, 18 simin. Pasion' thu bang gen hiam?**

.....

Pasion Amah leh mah kinial ngeilo; zuau ngeilo; a kamciamte pelh ngeilo hi. Tua Laisiangtho Pasion pen singlamteh tung Christ sungah Amahmah hong kipiakhiapa mah ahi hi. A muanhuai Pasion hi a, bangmah siit neilo in, eite mailam a ding muanna leh lam-etna neih ding ahi hi. Hebrew 13:8 in zong, “*Zeisu Christ in zanni, tuni, a tawntung kibang hi*” cih.

**Nangma nuntakna sungah a sia penpen na tuahkhak ciangin zong Pasion' hoihna koibang in muang teitei theilai ding nahi hiam? Singlamteh tungah Pasion**

**lim a koipen in Ama' hoihna hong muangsak thei pen nasa hiam?**

**WEDNESDAY**

*February 5*

**A Kisik Pasion?**

Pasion “**kisik**” thei ding maw? Kisik ahiehleh zong bang a cihna aihia? Pasion omzia kikhel ngeilo lah i cikhin si a! Laisiangtho mun pawlkhat in bel Pasion “*kisik, kikhel*” peuh ci uhhi. Mihing tading in, kisikna pen hih khialhna khat peuh hang ahi hi. Tua ahiehleh Laisiangtho mun khatkhat ah Pasion “*kisik*” acih koici bang hiam?

**Pai. 32:14 Jeremiah 18:4–10 simkak in. Pasion in koibang in “kikhel” hiam?**

.....

Hiteng leh mundangdang ah, a kisik leh a kiplaisak mite a dingin Pasion a lungsim kikhel in thukhen nawnlo cihi. Mite in amau' gitlohna pan un, hong kiheikik peuhleh, Ama' ngiimna omsa thukhenna pan Amah kihei ding cih hong kamciam hi. A kisik mihing tungah thukhenna pan Pasion kihei cihthu pen Laisiangtho' thukhunpi ahi hi.

**Gam. 23:19 leh 1Samuel 15:29 simin. Hihmun te in Pasion “kisik, kikhel” cih a omleh omloh bang gen hiam?**

.....

1Sam. 15:29 ah Pasion in “*a kisik dingin, mihing hilo hi*” cihi. “*a zuau dingin Pasion in mihing hilo, a kisik dingin mihing' tapa hilo hi. Amah'n a genkhit leh a gensa bangin hih*

*ding hilo hiam? Amah'n a cihnak leh a cih bangin tangtung sak ding hilo hiam?” (Gam. 23:19).*

Hih munteng sim kawikawi khitteh, Pasion “*kisik*” vetlo cihna hi zawlo a, mihing bangin Amah “*kisik*” in lungsim “*kikhel*” ziauziau hilo cihna hizaw hi. Tua sangsik in Ama' kamciamte kem citak a, mihing' kisikna dungzui in Amah'n lampi khelsak thei a, tuate zong Ama' Thu leh Hoihna tawh hong hihsak ahi hi. Pasion in' thukhenna peuhmah kisikna tungtawn in “**kikhel**” in, tua zong Amah hoihna, dikna, itna leh hehpihna hang ahi hi.

**Laisiangtho in Pasion a “kikhelna” koitak ah kiteltak in gen hiam? Tuathu in, Pasion pen kipkho paisuak ahihthei hang, piak-leh-lak tawh hong kikhawhpih ahih manin, tua in Amah tumdangsak thei cih bang tawh hong lak hiam?**

**THURSDAY**

*February 6*

**Itna leh Thutang Lenkip in**

Laisiangtho in “*Topa na Pasion uh Amah bek Pasion hi a, Amah it in a thupiak a zuite tungah khang tulkhat dongin thuciamna leh itna kip len in a thumaan Pasion*” (*Thuhk. 7:9*) cihi. Ama' hoihna leh itna pen Zeisu in singlamteh tungah honglak khinzo hi (*Rom. 3:25, 26; Rom. 5:8*). Late 100:5 in zong “*Topa hoih a, hong itna kipkho tawntung in Ama' thumaanna a khang khangin kip*” (*Late 89:2 enkak in*) cihi. Tua hi a, Pasion muanhuai hi; A tate tungah ahoih khempeuh Amah' pia hi (*James 1:17; Luka 11:11–13 enkak*). Ama' gal dinmun a omte nangawn zong a hoihmah pia veve lai hi.

**Mate 5:43–48 simin. A lamdang Pasion' itna bang honglak hiam? Hih Zeisu thuhilhna khuavak tungtawn in midang tungah koi hihthei ding ihi hiam?**

.....

Mate 5 in Pasion' itna kicing honghilih hi. A kicinglo itna ahiehleh nang hong itte bekma it-thukna ahi hi. Pasion ahiehleh Amah a mudah te nangawn it a, Ama' gal dinmun a omte zong itlai hi. Ama' hong itna in kicing in hoihkim hi.

Pasion hong itna leh hehpihna in ei' lam-et sangin a saantham cin-na khatah, cikmah in thutang kheng ngeilo hi. Lehgen bilbel leng, thutang leh hehpihna hong tun hi (*Late 85:10*). Laisiangtho hong hanthotna NKJV ah "Hong hehpihna leh Ama' thutang zui unla, Pasion ngak tawntung un"; *ESV* leuleu in, "Itna leh Thutang Lenkip in" (*Hos. 12:6 leh Luka 11:42 enkak in*) cihhi.

A tawpna ah, Pasion in a picing thukhenna hong tun ding hi. *Rom. 2:5* in zong Ama' "thumaan thukhenna hong kilang ding" (*Rom. 2:5, ESV*) cihhi. A nunungpen in tatsa te in "A vanglian Topa Pasion aw, na nasepna te lamdang in lian mahmah hi. Khang tawntung a Kumpipa aw, na nasepna te ah thumaan in na thutang hi. Topa aw kua in Nang hong kihtalo ding a, Na liatna hong phatlo ding ahi hiam? Nang bek Na siangtho hi. Thumaan in na sepnate mi khempeuh in mu uh ahieh manin, minam khempeuh Nang kiangah hong pai in Na maiah hong bia ding uhhi" (*Mang. 15:3, 4; Mang. 19:1, 2*) ci in lasa ding uhhi.

**Isaiah 25:1 ah, "Topa aw Nang pen keima Pasion Nahi hi. Nangmah kong liansak ding a, Nangma min kaphat ding hi. A lamdang nate Na semkhin a, tanglai pek a Na geelnate a kip a kho takpi ahi hi."** cihhi. Hizah hun-siapi lakah Pasion phat thei ding maw? Eima' nuntakna pen Pasion ading phatna biakpiakna koibang

**in suakthei ding a, nangma huzaap in koibang in thutang hithei ding hiam?**

**FRIDAY**

*February 7*

**Ngaihsutbeh Ding: Ellen G. White, Steps to Christ laimai 9–15 "God's Love for Man" simin.**

"Pasion' kammal sungah a gamtatzia lak hi. Mong neilo hong itna leh hehpihna Amah tekin honglak khin hi. Moses in 'Na vangliatna honglak in' ci in a nget leh; 'Keima hoihna namai ah ka paisak ding hi' (*Pai. 33:18, 19*) cihhi. Tua in Pasion minthanna ahi hi. Topa in Moses' mai ah apai ciangin, "Topa, Topa, hehpihna nei akip Pasion, lungduai in itna kip tawh a kidim, mi tultampi a dingin itna kip anei, mawhna thu palsatna leh khialhna maisakpa" (*Pai. 34:6, 7*). Amah pen 'a hehhak, a migitna lian neipa' hi a, 'Amah hehpih siampa' (*Jonah 4:2; Micah 7:18*) ahi hi.

"Pasion in vantung leh leitung ah sim zawhloh token tampi tawh eite' lungtang hong hen hi. A piansak nate leh leitung in honghen theihna thukpen tetungah, eite tungtawn in Amah ki pulakkhia hi. Ahiehhang tuate limpuakna in Ama' itna lak kim zololai hi. Hizahtha thukip teng kawmkal ah, hoihna galpa in mihing lungsim humcip sak ahieh manin, amaute un Pasion pen kihtak ding bekin mu uh a; Amah pen a lipkaphuai mawh maisak theilopa ci in um uhhi.

Satan in Pasion' omzia pen a khauh mahmah thutangpa ci in musak a, a khauh, a hi gemgam, a hiteeltaal thukhenpa ci in mihing te in musak hi. Piangsakpa pen a piansak sate tungah, hazatna mittang tawh en giugiau in mawhna a muh phetleh thukhenna pia pahpah cihbang in musak hi. Mong neilo Pasion hong itna leitung ah lakkhia in, leitung ah Zeisu mihing lak ah hong teeng ahiehna pulak in a



tunga khuamial pen hepkiat ding ahi hi.”—Ellen G. White, *Steps to Christ*, pp. 10, 11.

**Kikupding Dotnate:**

**1. Pasion’ minthanna leh A hoihna tegel in ki henkop cih banghang in theihhuai hiam? A tunga thu in, Pasion pen itna bulphuh selo in Athu khel mengmeng cih upna koibang in hong puahphatsak hiam?**

**2. Pasion’ hoihna na lunghiang ngei hiam? Leitung gitlohna tawh kizui in Pasion nasepna khatpeuh hangin, Pasion’ hoihna a lunghiang mi khatpeuh namu ngei hiam? Tua dotna tungtawn in nangma a ding na bangcih a, midang Pasion’ hoihna a lunghiang khatpeuh a dingin na koici huhtheih ding hiam? Maikal sinna ah maw.**

**3. Monday’ dotna lakhia in kikum un. Kidona Lianpi omzia taktak in, tulai a gitlohna te koibang in hong telpha sak thei hiam?**

**Lesson 7**

*February 8–14*

**GITLOHNA HANGIN BUAINA**

**SABBATH NITAKLAM**

**Tukalsung Simding:** *Job 30:26; Mate 27:46; Job 38:1–12; Late 73; Pian. 2:16, 17; Mang. 21:3, 4.*

**Kamngah:** “**Amaute’ mit panin khitui khempeuh nulsak ding hi. Thu luisate maimang khin ding ahih manin sihna dahna leh nasa a kahna cihte om nawnlo ding hi.**” (*Mang. 21:4*).

**Christian** te’ thuak buaina lianpen in gitlohna mah hi a – ahoih kicing leh itna neipa Pasion pen tua gitlohna tawh koici leptuah theih ding cih ahi hi. Tomgen leng, Pasion pen hoih kicing a vanglian kicing napi, banghang in gitlohna tuazah beek thei veve hiam? Hih thu pen lai pilna theih zawh pak ding hilo a, Pasion hong itna theih zawhlohna dingin lungsim hong humcip thu khatmah hipah hi.

“*Mawhna kipatna bulpi pen mihing tampi tak ading in lungsim a ciakniak sak mahmah thu khat ahi hi. Gilopa’ nasepna pan hong piangkha suksiatna khempeuh muthei uh ahih manun; hih Khatbek a om vang lianpenpa, pilna kicing leh itna Pasion’ khut sungah hibang thusia koici piantheih hiam cih lungkham uhhi. Amau’ mukkiat zawhloh thuthuk khat bel om ngel h̄*”—Ellen G. White, *The Great Controversy*, p. 492.

Pasian omlo cih a umte in tuathu mah a uplohna thu bulpi ahi hi. Mai kallam a kizom in Laisiangtho Pasian hoih kicina i sin ciangun, gitlohna in bang zahta in leitung susia taleh Amah muangta ding hihang.

**SUNDAY**

*February 9*

**“Topa aw, Bangtan Sawtlai Ding Hiam?”**

Tua gitlohna pen khang tawntung in a om denden a, Laisiangtho in zong ciamteh sitset hi.

**Job 30:26; Jer. 12:1; Jer. 13:22; Mal. 2:17; leh Late 10:1 simin. Hihmun tengin gitlohna buaina pen mihing a dingin a sangpen buaina koibang in hisak hiam?**

Hihteng in tuni ciang dong mah in dotna omsak lai hi. A tawntung a hikei zongin a om zelzel mi tatsiate nuamsa in migilote in banghang in hampaha thei hiam? Midikte leuleu banghang in thuaksia hiam? Gitlohna a om laitak Pasian koi ah om hiding hiam? Gitlohna a pian laitak, banghang in, Pasian in a buu bang liangin hong gamlat thei hiam?

Hih gitlohna tawh kisai dotna teng khempueh gawmkhawm in ngaihsun lecin, tua *gitlohna tengpen neuseh luat ding hihetlo* hi. Gitlohna bangzah om a, bangzah pha cih tawh neubawl lua kei ni. Gitlohna in siahuai lua ahih manin – ei sangin Pasian in mudah zaw tham hi. Laisiangtho sunga gitlohna leh thutang lohna hangin kikona awging te, eite’n zong zawp ngeingai ding hihang: **“Topa aw, Bangtan Sawtlai Ding Hiam?”**

**Mate 27:46 simin. Hih Zeisu kammalte na teldan koibang hiam? Gitlohna in koibang in Pasian sugiaigiai cih hihmun in hong pulak hiam?**

Singlamteh tungah, Zeisu in zong tua dotna mah kiko in *“Ka Pasian, Ka Pasian aw, banghang in Kei hong nusia nahiam?”* (Mate 27:46) cih. Singlamteh tungah Christ hong thuakna leh a sihna hangin, Pasian mahmah zong gilopa in sugiaigiai cihna ahi hi.

Lam-etna omlai lel e. Singlamteh tungah Christ’ nasepna in gitlohna bulpipa, Satan, a bul abaal in lawnkhia khinzo hi. Late 22:1 sunga kammal te Zeisu in a zang kik hi a, Late a tawpna lamteng peuhmah gualzawhna ahi hi.

**Singlamteh a, Zeisu in A muhpak nailoh hun hong pai ding khat lam-en hi. Eite’n zong Ii muhbaan nailoh mailam hun khat ading koibang in lungmuanna nei thei ding ihi hiam?**

**MONDAY**

*February 10*

**“I Theihloh Na Tampi Omlai”**

Hun tawp ciangin gilopa tungah gualzawhna hita ding hi. Tua masiah inbel dot ding buaina tam lualai hi. Tua gitlohna buaina vai in eite noptuamna ding bang omthei ding hiam?

**Job 38:1–12 simin. Pasian in Job a dawna kammal in gitlohna tungah bang khuavak hong taan hiam? Eite’ theih phaklohna ah bangteng om cih bangzah thei maw theilo ihi hiam?**

Job in thuaksia lua lawmlawm ahah manin, hizah gitlohna in bang dingin ama' tung ah hong tung hiam cih dotna tampi pia hi. Ama' theih phaklohna mun vantung ah bangthu om cih theilo pipi khawng, ama' dotna teng a dawng dingin mipi leh Pasion to hi (*Job 1–2 simin*).

Pasion' dawnkikna bel khauhbak hi. Khat envat leng, Huihpi lakpan in Topa in Job dawngkik a: "*Kei' pilna hong nial dingin nang kua nahi hiam? Na theihlohlam a kilangsak nahi bek hi*" (*Job 38:1, 2*) cih. Letkhiatna khat leuleu ah "*Na theihna tawm mahmah a na gennop lah tamlua maw?*" (*Job 38:2, CEV*) cih. Tua banah Pasion in "*Leitung tawphah Ka phahlai in nang kaw'h om na hiam?, Pil na kisak leh hong genin*" cih.

**Job 42:3 simin. Job' dawnkikna in eima' dinmun tungah a phawkhuai bang khuavak hong taan naci hiam?**

.....

Pasion in Job a dawnna panin, Job in a theihloh leh a telloh thu tampi omlai cih telcian sak hi. Job mahbang in eite zong, Leitung ah thu tampi piang ngeingai napi, tuate nunglam ah bang om cih eite'n theilo hihang. Eima' dotna ading dawnna in bangteng cih i theihloh manin; nakhempeuh bawlphat ni ciangin ei a ding dawnna hoih om nawnlo cihna zong hi tuanlo hi. Tua ahah manin, lam tampi taktawh hong kilaksa Pasion hong itna muang ding hihang.

**Eite theihna a tawm luat lam ngaihsun in. Sinna a haksa penpen ahi gitlohna leh thuaksiatna tetawh kisai in dawnna i ngahloh dotnate koibang in nuntakpih thei ding ihi hiam?**

**TUESDAY**

*February 11*

**Pasion Up Phatlohna**

Isaiah 55:8, 9 sungah Pasion in "*Keima' ngaihsut nate nomau' ngaihsutna bang hilo a, Keima' paizia te nomau paizia bang hilo hi. Vantung pen Leitung sangin a sanzawk mah bangin Keima' paizia te nomau paizia sangin sangzaw a, Ka ngaihsut nate zong nomau ngaihsutna sangin sangzaw hi.*"

Pasion' ngaihsutna in ei a sangin sangzaw hi. Eima' tangthu dingin Pasion' ngiimna pen telhaklua mahmah hi. Thu tuamtuam a dingin Pasion in a sepding seploh ding cihte banghang in theihpih nuam sese ding ihi hiam? Eima' theihna neucik lel tawh tua gitlohna buaina i vawaw zel theihna khat pen, "*Pasion tungah lunghianna*" ahi hi. Pasion tungah lunghiang mi khat in; Pasion in nahoih semthei mah hi taleh, ciangtanh om eima pilna hang in, nahoih hong sepsakna ding a hang thute kithei zolo ci uhhi. Pasion tungah lunghiang mite in, hih Leitung' gitlohna tetawh a kisai Pasion' lungsim pen mihing in telcian zolo cih. Huihlak a lungno lengte eimah'n mutheilo ihih man peuhin kimlehpam huihlak ah lungno omlo peuh hi tuanlo hi. Pasion' ngaihsutna eima theihloh man peuh in, Pasion in eitung ah lungsim hoih hong pualo hi mawkmaww lo hi.

**Late 73 simin. Laphuakpa in ama' kimlehpam a gitlohna teng koibang in phu hiam? Ama' telzia pen a tuampi khat ahahna koibang in guang hiam?**

.....

Laphuakpa in Leitung' gitlohna hangin lunggim mahmah hi. A kimlehpam a et ciang in migilote daupai cih mu hi. Na khempeuh thutang lo thumaan salo hi.

Pasian upna leh biakna sangin kiman zawtham sa hi. Tua pen biakinnpi sung a et masiah ahi hi.

Biakinnpi in tua gitlohna thubuai phut theihna ding lampi honsak a – tua pen a thumaan Thukhenpa khat om a, thutang takin thukhen ding cih muta hi.

**Thukhenna leh biakbuk nasepna teng Adventist te telcian danin gitlohna tawh buaina tungah koibang in khuavak hong taan naci hiam? Theihnop dot ding tampi kawmkal ah, Pasian in thutang takin a thukhenna tangthu in nang a dingin bangzah thupi nasa hiam?**

WEDNESDAY

February 12

**Teeltheihna in Keem**

Eite'n Pasian' paizia leh Ama' ngaihsutna i tel zawhloh hang, Laisiangtho in gitlohna buaina tawh kisai pawlkhat hong lahsa om hi. Tua gitlohna buaina phut zawhna ding lampi khat pen teeltheihna in hong keem cih ahi hi.

Teeltheihna in hong keem cih muhna pen, gitlohna cih peuhmah teeltheihna zangkhial cihna ahi hi. Tua teeltheihna pen a hoihlam a zat dingin Pasian hong piak ahih manin, gitlohna tawh kisai Pasian i mawhsak ding hilo hi. Tua ahihleh Pasian in banghang in teeltheihna hong pia hiam?

**C. S. Lewis** in, “*teeltheihna' in gitlohna hong bawl saktei hi mahleh, itna, hoihna lungnopna cihte zong amah bek in hong neisak thei lai hi. Hih leitung ah a taangtaum thei kidim a – setvan gannung bangin taang vive kibawl ta hi. Mihing a ding Pasian limsuaih lungdamna pen suakta takin lungdam ding, Amah leh mi khatlehkhat ki pumkhat dingin*

*hong suaih ahi hi. Tua hileh amaute suakta ding uhh?*—*Mere Christianity* (New York: MacMillan, 1960), p. 52.

**Pian. 2:16, 17 simin. Hihmun te in Adam leh Eve tunga Pasian piak lungsim suahtakna koibang in hong lak hiam?**

Deihteelna neilo lah hilo bang dingin tuathu pia aitam? Adam leh Eve in thukham singgah hong nekpan kipan, hi leitung ah gitlohna hong dimta hi. Mihing' pukna tangthu teng khit, Piancil 4 sungah, a mawhna sulzui teng in zuipah a, Cain in a nau Abel a thahna hipah hi. Adam leh Eve pukna tangthu in deihteelna zatkhialh manin hih leitung ah gitlohna hong tung cih honglak hi. Laisiangtho mun tampi ah lungdeih teelna tampi om hi (*Pai. 7:12, 13; Josh. 24:14, 15; Late 81:11–14; leh Isa. 66:4*). Eima nisim nuntakna sungah, eima hihtheih ciangciang, Piangsakpa hong piaksa deihteelna kizang thei lel hi. Deihteelna lo tawh mihing kihi theilo ding hi. Setvan khawng peuh, set milim peuh tawh kibang ding hihang.

**Sony Corporation in set uilim khat bawl in Aibo minvawh hi. Ui taktak mah bang sam napi cina theilo, lii neilo, pet theilo, mitot kulselo, a mul kia selo hi. Aibo uilim lellel ading na taksa na sisan napiakhia nuam diam? Ahih keileh, nangma' teelna in deihteel theihna tawh Pasian in hong piangsak koibang in natel semsem zaw thei diam?**

THURSDAY

February 13

**Itna leh Gitlohna?**

Pasian in deihteel theihna hong piak pen it theih na'ng hi a; hih deihteelna zangkhial leng gitlohna piangpah

hi. Dotna tampi omlai e. Pasion in gitlohna (*tawlkhat*) phal a, hehsa pi in mudah in, tua omlo lehlah itna hong omlo zel a, susia baih zen lehlah, it theihna ding muanna kisia zel ding ahi hi.

*“Pasion telkhialhna tawh leitung khuamial in tuam hi. Khuamial liim teng tangsak in, leitung pen Pasion kiangah tungsak kik ding leh, Satan khem zawhna teng suktan ding ahi hi. Ki zawhthawh bawl theilo ding hi. Zawhthawh bawl na limlim Pasion’ ukna thukhun hilo a; itna tawh sepkhiat bek Amah’n deih a; zawhthawh thu leh ukzawhna tawh kizo theilo ding hi. Itna bek in itna phong thei hi. Pasion theihna zong Amah itna hi a; Ama’ gamtatzia limlim pen Satan gamtatzia tawh saikak kul limlim hi”*—Ellen G. White, *The Desire of Ages*, p. 22.

Deihteelna lotawh, itna om theilo, Pasion in itna ahih manin, Pasion in hong it nading a nial na’ng thu hilo in, itna hong omtheihna dingin suahtakna ahi hi. Mikhat in a patna pan a tawpna dong Pasion bangin theikhol thei hileh, eima suahtakna sungpan Amah pampaih nuam hetlo ding hi. Ki-itna om keeilo leitung ah kua teengnuam peuhmah ding hiam?

**Rom. 8:18 leh Mang. 21:3, 4 simin. Leitungah gitlohna bangzah tam teleh Pasion’ hoihna muantheihna dingin hih munteng in koibang in hong huhthei naci hiam?**

.....

E’n khuamial sung nangawn i muh theihloh hang, Pasion in a kipatcil pan a tawp dong mu thei hi. Zeisu sungah upna tungtawn in tawntung nopsakna zong hong

muhkhol sak hi. Rom. 8:18 sungah *“Tuhun a i thuakna tepen Pasion in a hong piak ding minthanna tawh ka ngaihsut khop ciangin gentham kasa hetkei hi”* cih. Hih a lamdang kamciamna upna leh muanna i nei beek hiam?

A siangtho mahmah, a bulkip mahmah itna, leh itna sungmah ah i luah suahtakna, eite a dingin a nialloh zawkna in, Zeisu in singlamteh tung tun ding a, thuaksia mahmah ding cih thei gige hi. Ama’ pumpi suplawh ding cih thei gige pi in, tua suahtakna mah hong pia teitei hi. Hih thuthukpi masuan tawntung ding hihang.

**Pasion in deihteel theihna hong pia cih lungsim sungah kemcing tawntung inla; na khempeuh Pasion deihna bangin piang hi cih upna pan koibang in hong kemthei ding hiam?**

FRIDAY

February 14

**Ngaihsutbeh Ding: Ellen G. White, *Patriarchs and Prophets* laimai 33–43, “Why Was Sin Permitted?” simin.**

*“Satan vantung pan a kihawlkhiat ciangin, mong neilo itna Pasion in amah susia pahlo hi. Pasion in itna bektawh Ama’ na aki sepding leh Amah aki biak ding deih ahih manin, a bawlsa te’n a thudikna leh a migitna a theihcian uh kul hi. Vantung leh leitung dang a teng khempeuh te in mawhna omzia leh mawhna thaman omzia thei zolo ahihman un, Pasion in Satan susia pah mawk leh, Pasion’ thudikna koi hiam cih theilo ding uhhi. Amah ki susia pah mawk leh, Pawlkhat in Pasion’ na pen itna omlo in kihtakna tawh sem ding uhhi. Tua hileh zuau khempa huzaap ki beimang sak zolo ding a, langdona lungsim zong beisiang zolo ding hi. Hong pailai ding sim zawhloh khang tampi sunga vanpi leh leipi hoih zawkna dingin Satan leh ama’ deihna teng picin sak kul hi. Tua hileh*

*Pasian' mi giitna a thudikna leh a thukham kikhel theihlohna pen cikmah hunin kuamah in mawhsak ngei nawnlo pan ding hi.*

*“Satan' langpanna pen vantung leitung ading in hongpai ding khang tawntung hun sungah theih den ding kihilhna thu khat ahi hi. Satan' deih thu in leimi leh vanmi a suplawh sak manin Pasian thukham ki pampaih leh bangci ding cih hong theihsakna ahi hi. Pasian' ukna a omlai siah a sunga omte'n lungmuang takin omthei uh cih kilangsak hi. Hih langpanna a ki picinsak manin, hong pailai ding hunah mi siangtho te'n mawhna bawlnuam nawnlo, langpang nuam nawnlo, mawhna thaman thuak nawnlo ding uhh?”—Ellen G. White, *Patriarchs and Prophets*, pp. 42, 43.*

#### **Kikupding Dotnate:**

**1. “Theodicy” cih kammal pen gitlohna lakah Pasian in mawhna hong maisakna cihna ahi hi. Gitlohna amah bel maisak theih hilo hi. Mikhat in vantung ah, “Zeisu aw, keima muhtang in ka innkuanpih te kibawlsia in a kithahna thu telcian zo ing. Lungdam ing Zeisu aw” ci in kiko hileh, Khatna neikei lua. Hih kidona lianpi sungah a tawpna a gualzo dingpa pen gilopa hilo, Pasian hi cih koibang in telcian thei ding ihi hiam? (Sinna kuana enin).**

**2. Job bangin na thuak ngei hiam? Nang leh na tanau itte' thuakna tawh kisai hilhcianna hoih om nawnlo cihbang liangin na khasia ngei hiam? Job in ama' phunkhiat tengpen a “telloh man” (Job 42:3) cih theikik a, tuathu in eimah leh i tanaute lungkhamna tungah koibang in khuavak hong taanthei hiam?**

#### **Lesson 8**

*February 15–21*

#### **DEIHTEELNA, ITNA LEH PASIAN' VAIHAWMNA**

##### **SABBATH NITAKLAM**

**Tukalsung Simding:** *Luka 13:34; Jer. 32:17–20; Heb. 1:3; Pai. 6:4, 5; Eph. 1:9–11; John 16:33.*

**kamngah: “Keimah tawh na kipawl manun lungnopna na neihtheih na'ng un hihthu a hong gen kahi hi. Leitung gimna natuak ding uhhi. Ahi zongin Keimah in leitung nate zokhin kahih manin lungnuam in om un” (John 16:33).**

**Pasian** in leitung ading vaihawm in hong sepsak hi. Pasian' vaihawmna tungah eima muhia in Pasian tawh kizopna, mitawh kizopna leh gitlohna tungah muhia hong tumdang sak hi.

Christian te in Pasian vaihawmna muhia tuamtuam nei uhhi. Pawlkhat in Pasian in Ama' vangliatna tawh na khempuuh a pian bangbang pen Pasian ciangtansa ci uhhi. Amah in hotkhiat leh mangthang ding zong teel khinzo ci uhhi! Tua muhia tawh hileh, Pasian sehse tungsia mihing in teeltheihna neilo hi. Tua bang upna neite in, mihing' lung gulhna zong Pasian' sehse vive mah hi ci uhhi.

A langkhat ah, Laisiangtho thupiangte panin Pasian in na khempuuh sehkol lo cih honglak hi. Tua sangsik in mihingte deihteel theihna pia zawsop a, vanmite

nangawn in Ama' deihna langpan in teelthei lai cih honglak hi. Mihing in mawhna leh gitlohna sung a pukna pen tua deihteel theihna mah zatkhialhna hang ahi hi. Hotkhiat na'ng ngiimna leuleu in deihteelna zatkhialhna hang a thupieng teng bawldamna hi leuleu hi.

**SUNDAY**

*February 16*

**Sangpen Eima Pasion**

*"Pasion sangpen hi"* ci in pastor khangno khat sangnaupangte hilh hi. *"Amah in a piang ding nakhempeuh uk hi"* a cihleh, naupang khatin dawngkik in *"Ka uikhawi a sihlai in Pasion mahin uk ding cileng, bang dingin ka ui hong thahsak hiam?"* cih.

Tua dotna khangno siapa in dawng a *"Thu haksa khat hi ei. Khatvevei Pasion in, i mailam ah a haksa zaw hunte a ding kisakkholna in haksatna hong kantan sakthei hi. Keima ui hong sihlai in zong na kasa mahmah hi. Tua ka kantan khit zawh ciang ahihleh, a haksa zaw kapi hong sih takciang in phadawm zawdeuh pah hi. Na sangthei hiam?"* a cih.

Tawlkhat a daihkhit ciangin, *"Kapi a thahni a ding kisakhol dingin Pasion in ka ui that masa aive maw"* cikik hi.—Marc Cortez, quoted in John C. Peckham, *Divine Attributes: Knowing the Covenantal God of Scripture* (Michigan: Baker Academic, 2021), p. 141.

Mi pawlkhat in nakhempeuh Pasion deihbang in piang dingin um uhhi. Leitung thu piang khempeuh pen a huam in Pasion deihna mah tawh piang ahi hi. Pasion pen vangliatna khempeuh neipa hi napi, bang dingin Ama' deihi lohpi khawng piang thei ding hiam? Bang thu piang a, bangzah siahuai taleh, Pasion' deihna mah ahi hi. Tua pen hih upna in a hilhcianna ahi hi.

**Late 81:11–14; Isa. 30:15, 18; Isa. 66:4; leh Luka 13:34 simin. Hihmun tengin Pasion' deihna peuhmah piang den hi cih koibang in honglak hiam?**

.....

Mi tampi in, Pasion' deihna peuhmah picing ding ci uh a, Laisiangtho genna leuleu a tuampi ahi hi. Laisiangtho in Pasion deihna picing mello cih gengen zel hi. Tua zong, Pasion' deihna langpang vive in piangzaw cihna ahi hi. Thu a piang tampi takte in Pasion' deihna langpang in piang cih Pasion mahin tamveipi telgen sitset hi. Amite a ding thu khat deihsak; A mite'n thudang khat teelzaw uhhi. Pasion' kah la *"Ka mite in Keima' thu hong ngailo uhhi ... Ka mite in Ka thu hong ngai uh henla, Keima' deihbang in gamta uh hileh maw! Amau' galte khempeuh Ka zawh sak pak ding hi"* (Late. 81:11, 13, 14) cih.

**Na khempeuh Pasion' deihna bang bekbek in piang hi cih upna lungngai pha in. Thuthuk buaina, a diak in gitlohna tawh kizopna ah tua bang upna in bang piangsak thei ding hiam?**

**MONDAY**

*February 17*

**Vanglianpenpa**

Laisiangtho sung tawntung ah Pasion' vangliatna kipulak den hi. Na lamdang lianpi tetawh Ama' vanglian a lahkhiatna tamveipi om hi. A tuate kawmkal mahah Pasion' deihloh thu tampi zong piang lailai hi.

**Mang. 11:17; Jer. 32:17–20; Luka 1:37; leh Mate 19:26 simin. Heb. 1:3 zong lungngai in. Hihmun tengin Pasion' vanglian koibang in pulak uh hiam?**

.....

Hihmun teng banah a dangdangte in zong Pasion pen vangliatna kidim a, hi leitung zong A vangliatna tawh kemcing cih. Mangmuhna in zong “*Vanglian Topa Pasion*” (*Mang. 11:17; 2Cor. 6:18; Mang. 1:8; Mang. 16:14; Mang. 19:15; Mang. 21:22*) ci a, tua vanglian pen (***pantokrator***) “*vangliatna khempeuh nei*” cihna ahi hi. Pasion in vangliatna khempeuh nei cihpen kammal bektawh zong hilo, thupiang tuamtuan, vangliatna tawh leitung ngeina palsat in Amite a hotkhiatna zong om liang hi.

Pasion in vangliatna khempeuh nei citateu zongin, nakhempeuh bawl pahpah samlo hi. Laisiangtho sunga Pasion in a bawl theihloh thukhat; 2Tim. 2:13 ah “*Amah leh Amah kikhem theilo*” cih.

Tua mahbang in, Christian tampi in Pasion pen vangliankim (Omnipotent) ci uh a, leitung paizia ngeina bang ahilo khat zong Pasion a dingin a ngeina pianzia khat mah bang hilel hi. Pasion in ahieh theihloh thu pawlkhat paizia tawh a kilehbulh om a, Gethsemane huan a Christ’ thungetna tua thute ahi hi. Christ in “*Pasion in nakhempeuh hihthei hi*” (*Mate 19:26*) ci in, singlamteh a zuatkuan in Pa tungah a thungetna ah “*Pa aw a hithei ding ahiehleh hih thuakna tawh hong kipelh sakin. Ahi zongin Keima deihna hilo Nangma deihna bang hizaw taken*” (*Mate 26:39*) cih.

Pa in ahiehleh singlamteh tunga thuakna pan Christ suahtak theilua zen hinapi, mawhneite hotkhiatna dingin tuabang hihlo hi. Khat teitei ahieh kulta hi.

**Laisiangtho in mikhempeuh Pasion in honkhia nuam citei napi** (*etpak ding, 1Tim. 2:4–6; Titus 2:11; 2Pet. 3:9; Ezek. 33:11*), **mikhempeuh hotkhiat hilo ding hi. Hihthu in deihteel theihna leh tua deihteelna tungah**

**Pasion vangliatna ki ciangtanna koibang in hong hihl naci hiam?**

**TUESDAY**

*February 18*

**Pasion It Ding**

Pasion in vangliankim citateu zongin a kilawm lopi khawng zong bawlpah cihna hilo hi. Pasion in, a hangthu khat omlo in mi khatpeuh in suakta takin Amah it cilo hi. Suakta takin nakhat sepna pen, tua na sem ding ngaihsun lopi in sem hileng, suakta takin nakhat sem kici theilo ding hi. Tomgen leng, Pasion in zawhthawh thutawh kuamah in Amah itsak lo hi; zawhthawh bawl hileh, itna hi nawnlo ta hi.

**Mate 22:37 leh Thuhilhk. 6:4, 5 simin. Hihmun tengin deihteelna koibang gen hiam?**

.....

A lianpen thukham, Pasion itding cihpen in, Pasion in Amah hong itsak nuam cihna ahi hi. Himahleh mikhempeuh in Pasion it tuanlo uhhi. Banghang; Pasion in Amah a itding in mikhempeuh bawlo maw? It theih ding, hong ki-it ding cihte suakta takin hihding vive ahi hi.

**Heb. 6:17, 18 leh Titus 1:2 simin. Hihmun te in Pasion’ thu bang gen hiam?**

.....

Gamlakvakna 23:19 sungah, “*A zuau dingin Pasion in mihing hilo*” cih. “*Pasion zuau ngeilo*” (*Titus 1:2*); Pasion in kamciam kip den in ciampeel ngeilo hi (*Heb. 6:17, 18*). Pasion in kamciam khat a piakkhiat khith nakleh, tuakhit a nasepna peuhmah tua kamciam bangin sempah hi.



Pasian in piansakna khempeuh deihteelna pia a, Pasian deihna khengval zong teel thei hinapi, tuabang a teel leh zong Pasian mawhpauk hituanlo hi. Pasian in a bawlsa te deihteelna piakhin ahiehleh, mihing in zong Pasian' deihna langdo in a telnop uhleh amau' suahtakna mah hizel hi. Mi tampi in amau' suahtakna tuabang in zang uh a, Pasian in a deih hetloh zong bawl uhi.

**Pasian in nang hih dingin a deih hetloh, nahih khak bangpeuh a om hiam? Hihthu in deihteelna panin hong piang a lauhuai sulzui bang peuh om ci hiam?**

WEDNESDAY

February 19

**Pasian Hong Lunggulhsakna leh Cidam na'ng Hong Deihsakna**

**Ephet 1:9–11 simin. Hihmun in sehkholna tawh kisai bang gen hiam? Mi pawlkhat hotkhiat ding leh pawlkhat mangthang dingin kisehkhoh hiam?**

.....

Greek kammal “*sehsa*” a kici pen, Laisiangtho sung a *prohorizo* hi a, Pasian in tangthu ding geelkhoh khin cihna hilo hi. Tua Greek pau in “*khensat khol*” cihna hipeuh hi. Nakhat peuhpeuh pen a masiah in kilang khensat khol thei a, ahieh keileh zong midang tawh zong kipawlkhawm in kikhensat khol thei hi. Pasian in a nunung zaw zang cih.

“*Sehsa*” (Rom. 8:29, 30) kammal pen *piansaksa tengin amau' deihteelna uh tawh a hih ding uh teng a theihkhoh manin Pasian in a ngimna teng* a cihna ahi hi. Tuabang in itna siangtho ahieh theihna dingin deihteelna a kisap kawmkal mahah, Pasian in mikhempeuh ading a hoizaw dingin tangthu pen Amah'n makai ngiat hi.

T-6

Ephesians 1:11 in zong, Pasian in “*Na khempeuh Pasian' deihna leh a geelsa bangin a piang hi*” cih. Tuapen Pasian in Ama' lunggulh bang bek in piangsak a cihna maw leh?

Ephet 1:9–11 in hih muhdan kipsak tuak hi. Hih letkhiatna pan bel mihing in “*Pasian' deihna nial*” thei cih pulak hi (Luka 7:30; Luka 13:34; Late 81:11–14). Laisiangtho in kikingkalh lo ahiehleh, hih munte in koibang in kibanglo thei hiam?

Hihmun teng panin Pasian in “***hong lunggulh sakna***” leh “***cidam na'ng hong deihsakna***” cih namnih om hi. Pasian “*hong lunggulh sakna*” cihpen Pasian' deihbang lian in gamtatna pan hong piang thu ahi hi. Pasian in “*cidam na'ng hong deihsakna*” ahiehleh, Pasian' deihna a tuamtuam leh piansaksa khempeuh' deihteel theihna hi a, khat veivei Pasian' kiangpan a pialkhia zelzel pen a cihnopna ahi hi. Ephet 1:11 pen Pasian in “*cidam na'ng hong deihsakna*” hihtuak zaw hi.

**Pasian in a theihkhohna pen vanglian mahmah a, mite teel ding zong theikhoh liang hinapi, Amah in “*nakhempeuh a hoizaw in piangsak*” cih. (Rom. 8:28). Hih thumaan panin bang lungnopna nangah thei hiam?**

THURSDAY

February 20

**Christ in Leitung Zokhin hi**

Pasian hong lunggulh sakna bangin nakhempeuh piang leh, gitlohna omlo ding a, itna leh ki thutuakna bek om ding hi. Hih vannuai buppi zongpen Pasian lunggulhna bang in ki puahpha kik ding hi. Tua kawmkal mahin Pasian in Ama' deihna pen piansak sate' deihteelna ngaihsut sak kawmin semkhia hi.

Khomun em kidemna sungah a kihel khempeuh in, hel ding teng khempeuh banah, amau' deihdeih zong hel in amau' emnop khomun nam em thei cihi. A tawpna ah, khomun empa khat in ama' em bangbang hilel ding a, a helnop helthei, hel noploh zong hello thei lel hi.

Tua mahbang in Pasion in Ama' piansak te' ki-it theihna'ng, suahtak na'ngin, leitung' tangthu ading Ama' teel hetloh, Ama' deihna a langpan natampi mah hong kihelkha hi.

Hi muhdan sungah, Pasion' vaihawmna in lampi khatbek zui ngeungau lo a, Pasion in na langsep hetlo in uk hi. Tua hi a, Pasion' vaihawmna pen lampi nih omthei hi. Hih leitung thu pawlkhat pen Pasion hangin piang hi napi, a dang teng ahihleh, piansak sate' deihna bangin gitlohna zong a piang ahi hi. Pasion deihloh thu tampi tak zong piang veve hi.

**John 16:33 simin. Gimna tampi kawmkal mahah, bang hong pia naci hiam?**

.....

Thuaksiatna tampi kawmkal ah, mihing te in umkhial uh ahah manun, a upna uh ki liing ding uh a, thuaksiatna pan ka suakta beek diam ci in lungkham ding uhhi. Zeisu in a tumdang mahmah tangthu khat hong gen a, Ama' nungzuite in thuaksiatna tampi thuak dinguh hi napi, Christ in leitung zokhin ahah manin, amau' ading lam-etna omveve cihi (*John 16:33*).

Thuaksiatna haksatna khawng aki phutphut pen Pasion hong lunggulh sakna bang hi lianlo hi. I lungsim sungah kidona lianpi phawkden ni. Hoihna dingin gitlohna

a kisam masa phot zong hilo napi, Pasion in tua gitlohna sungpan mahin hoihna zong hong piang khia sakthei lel hi. Pasion na muan nakleh, eima' thuaksiatna teng mah zong Amah tawh kinaih theihna ding leh midang zong lainat theihna dingin Pasion in zang thei veve hi.

**FRIDAY**

*February 21*

**Further Thought: Ellen G. White, *The Desire of Ages* lai. 19–26, “God with Us” simin.**

*“Ei hong hotkhiatna ding vaipen a ki nung-ngaihsut hi vetlo a, Adam puk khit peuh khawng ciang aki geeltaum hilo hi. Tanglai panin a ki iincip thute tu ciangin a ki pholak ahi hi (Rom. 16:25). Khang tawntung a Pasion tokhom' tauwphahpi hong ki pulak ahi hi. A kipatcil panmah in Satan' lampialna pen Pasion leh Christ in thei khin uh a, tua lampialna mah tawh mihing ana khemtuk ahi hi. Pasion in mawhna om theihna ding thu pialo hinapi, mukhol khin ahah manin, tua a phutna ding un nawh kigin mahmah uhhi. Leitung itlua a hih manin, a Tapa neihsun piak ding hong kamciam a ‘Amah a ummi peuhmah kisia hetlo in tawntung nuntakna ngah hi. John 3:16.”—Ellen G. White, *The Desire of Ages*, p. 22.*

**Kikupding Dotnate:**

**1. Pasion in Ama' deihna bang piang denkeei mawk leh, Leitung thupiang te nangma muhna koibang a hizaw thei diam? Pasion' deihna zong a kicing zolo pawlkhat om cih teelsiamna in bangteng hiding hiam?**

**2. Thursday sinna khomun emna enkih dihdih leng, “Pasion leh Christ in Satan langdona tetsitset” hinapi eite hong bawl ding khawlo in zom paisuak veve hi. Itna kihel hamtang ding a, tua itna in suahtakna hiding hi. A it theilo dingin hong bawl liang sangsik in, it thei ding**

mahin Pasion in hong bawl a, tuathu in Zeisu Calvary tun ngeingei ding cihzong thei gige hi. Itna bangzah in siangtho a, Pasion ukna a dingin bangzah in kisam a, tua suakta takin it theihna tawh hong nial lelpeuh lo in Christ in singlamteh tungah a thuaklawh liangna thu bang ahi hiam?

3. Hi leitung thuaksiatna hangin thuum in tau den hinapi hang a, tua thuaksiatna te hangmah in bang tanvei Pasion thuum in tau in om cih na ngaihsun ngei kha hiam? Pasion nangawn in hong thuaksiatpih cih na theih ciangin, tua thuaksiatna te na telcian zia bang hong kilamdang vat hiam?

## Lesson 9

February 22–28

### VANTUNG LEITUNG KITUKALH

#### SABBATH NITAKLAM

**Tukalsung Simding:** *Mate 13:24–27; Pian. 1:31; Ezek. 28:12–19; Isa. 14:12–15; Mate 4:1–11; John 8:44, 45.*

**Kamngah:** “Nang leh numei kikal, nasuan nakhakte leh, ama’ suan leh khakte kikal ah kilangneihna ka omsak ding hi. Amah in na lutang hong sunim ding a, nang in ama’ khetul na sunim ding hi” (*Piancil 3:15*).

**Laisiangtho** tangthu sungah Christ leh Satan kidona lianpi in thubulpi ahi hi. Hih vantung leh leitung a piansaksa a puksate in Pasion tawh a kitukalhna mah pen Laisiangtho thubulpi mah hipah a (*Mate 13:24–30, 37–39; Mang. 12:7–10*), Christian te’ ngeina leh Christian tapi in anial uhleh a pumpaih uh thu ahi hi.

Laisiangtho muhna bang hileh, tua vantung leitung kitukalhna pen, dawimangpa leh a vanmite in Pasion’ gam a langdona hi a, Laisiangtho kammal tapi takte tawh mawk pampaih thei ding hilo hi. Lungdamthu teng sungah Pasion a langdo dawimangpa leh a dawite thu tawh kidim in om hi.

Tukal pan kipan in, a nuai a dotna tengpen Laisiangtho tawh kituak in dawn sawm ding hihang.

(1) Pasion leh Satan kidona om cih bang Laisiangtho munin honghilh hiam?

(2) Laisiangtho in, tua kidona koibang in pulak hiam?

**SUNDAY**

*February 23*

**Galpa Hih Ahi hi**

**Mate 13:24–27 simin. Hih gentehna in leitung gitlohna koibang in hong telsiam sak hiam?**

.....

Zeisu in khaici hoih bekma a vawh lo neipa khat tangthu gen hi. Hi napi, mangbuh lakah tahum hong pokhia cidihdih hi. Tua amu lo neipa' nasemte in "*Sia aw, lo sungah khaici hoih bek vawh hilo na hiam? Koibang in tahum omthei hiam*" (Mate 13:27) ci in dong uhhi. Tuhun gitlohna buaina sungah tua dotna mahtawh a kibang: Pasion in hih leitung a hoih kicing in bawl hinapi, banghang in gitlohna omthei hiam? ci uhhi.

**Mate 13:28–30 pen Mate 13:37–40 sung Christ hilhcianna tawh enin. Hih in vantung leitung kitukalhna tungah bang khuavak hong taan naci hiam?**

.....

A topa un nasemte' dotna dawngin "*Galpa hih ahi hi*" (Mate 13:28) cihhi. "*Khaici hoih a vawhpa pen, Mihing' Tapa*" hi a, Zeisu Amah kici (Mate 13:37) in, "*Lo ahihleh leitung*" (Mate 13:38), "*tahum a vawh galpa*" ahihleh "*dawi gilo*" (Mate 13:39), cihbang in vantung leitung a Christ leh Satan kidona teng limsuai suk hi. Banghang in leitungah gitlohna omthei hiam? Tua gitlohna pen galpa tua topa a langdo (*dawimangpa*) nasepna ahi hi. "*Galpa sepna ahi hi*" (Mate 13:28).

Hih dawnna panin dotna khatmah hong omzel a, "*Kote kuan in tahum te kava bot ding uhhiam?*" Gitlohna ki lawnkhia menglo ding hiam? a cihna uh ahi hi. A topa in "*No*" cihhi. "*Tahum te bot le uhcin, mangbuh tawh na botkhaum kha ding uhhi. Anlak hundong a namnih mahun po-khaum phot taken*" (Mate 13:29, 30; Maku 4:29) cihhi.

A thu gentehna bang hileh, gitlohna pen a tawpna ciangin Pasion in hemsiang ding a, khankhin nailopi in bawhkhiat manin, a gei a om a hoichte nangawn suksiat khak ding lauhuai cihhi.

**Tuhun in mangbuh lak panin tahum te bawhkhiat theihna bang peuh a omthei diam? Tua banah, i galdo zel gitlohna ki theihloh bawlna peuh a hihlohna bang hiding hiam?**

**MONDAY**

*February 24*

**Leitungah Kidona a Bulpatna**

Hih gentehna sunga dotna mahbang in – a neipa in khaici hoih vawh napi khaici sia a om mahbang in – dotna dang khat omlai hi: Pasion in a hoih kicing in a bawl leitung ah, koibang in gitlohna omthei hiam?

**Pian. 1:31 simin. Piansakna a zawh siangna Pasion kammal in bang gen a, tua kammal banghang in thupi thei hiam?**

.....

Pian. 1:31 sungah, Pasion in leitung bawl a zawh siangna kammal "*hoihlua*" cihhi. Piansak 1 sungah, Pasion bawlsa leitung ah gitlohna themcik zong omlo hi. A koibang in gitlohna mihing sung hong tung thei hiam?

**Pian. 3:1–7 simin. Hihmun in gitlohna leitung hong tunsuk dan koibang ci hiam? Leitung kidona tungah bang khuavak hong taan naci hiam?** (*Mang. 12:7–9*).

.....

Hih kihona sungah Pasion' omzia gulpi, dawimangpa tektek gulpi in kithawi in, (*tanglai gulpi*) a zuaupi gen hi (*Mang. 12:7–9*). Pasion thupiak muanlah theihna ding tua thupiak lumlet phial in dotna khat gulpi in dong hi. Gulpi in Pasion' kammal tona khat ahi "*Na si taktak kei ding uhh?*" (*Pian. 3:4*) cih.

Khat zawzaw, gulpi maw Pasion in Eve khem a, tu in Pasion genna lam leh gulpi genna lam khat peuhpeuh a teel kulta hi. Hiteng leh mundang ah, hih kidona pen kua zaw um ding, itna mah tawh a kihelkhawm tuak cihthu ahi hi. Nang in zong mikhat na upna, na uppa' bangci mi, muanhuai maw huailo cihte pen; amah na itna bangzah in thuk cih tungah kinga a, hih munah Ama' gen thu ngaih kul hi.

**Pian. 3:15 simin. Pasion in gulpi tungah a thupiakna ah numei' suan acihpen, Messiah hi a, tua in gulpi' lutang sunim ding cihpen zong, Laisiangtho sungah lungdamthu masapen mah hipah hi** (*protoevangelium*). **Hih thu in langnih kidona omzia koibang in hong telpha semsak in tua kawmkal mahah bang lem-etna hong guan hiam?**

TUESDAY

February 25

**Vantung ah Kidona a Bulpatna**

Piancil 1–3 bekah Adam leh Eve Puk mapek in siatna omkhin cih. I saansa mah bangin "*siatna*" piang

khin a, "*sialehpha theihna singkung*" (*Pian. 2:9, 17*) minpua ahi hi. A zuau genpipa zaw gulpi in Pasion zuau gen minpua sak pongmawk hi. Gulpi om ahihna (*Mang. 12:9*), a zuau genna in tualai pekin siatna omkhin cih ahi hi. Eden huansung a Pukna masiah pek in siatna omkhin zo hi.

**Ezekiel 28:12–19 leh Pai. 25:19, 20 enkak in. Hih pukna omzia bangpeuh ahi diam?**

.....

Hihteng ah a genna bang ahihleh, siatna bulpi vantung leitung kidona pen vantung pan hong kipan ahi hi

Satan a kicipa in, a pukma in sathau a kinilh *cherub* ahi hi. Cherub cihpen a kitel zaw dingin "*a kicing etteh pha, pilna leh hoihna tawh a kidim*" hi a, "*Pasion' huan Eden*" (*Ezek. 28:12, 13*) ah zong omkhin zo hi. Tyre kumpipa cihpen mihing kumpi khat peuh tungah kici theilo hi. Hipen Lucifer a pukna lim hong lak ahi hi.

**Isaiah 14:12–15 simin. Hihmun in kidona lianpi bulpatna thu bang khuavak hong taan hiam?**

.....

Isaiah 14 sungah Lucifer in amah mah Pasion bangin ki lamto nuam hi. Hih mun mah pen Ezekiel 28:17 sunga "*na mel hoihna na kisaktheihpih kha h?*" a cih in amah a hoih dingin a bawpa Pasion phat ding cihnopna ahi hi. Amah hong kisathe ta hi. A suukzaw kanlai in a kisaktheihna tawh Pasion gensia in Pasion' munah om nuam hi. Hebrew pau in "*sumbawlina*" (*Ezekiel 28:16*) a cihpen in "*gensia*" ci a, Satan in eite leh Pasion langkhat pan hong langdona a cihnopna ahi hi.

**A puk Lucifer pen a cilai in “a kicing in a piang” hi a “gamtat siat ding a kipat ding a suaipan kipan in paubaanna khat beek neilo” (Ezek. 28:15) cih koibang in i tel hiam?**

WEDNESDAY

February 26

**Kei Nong Biak Leh**

Satan in Pasion tokhom a buluh nopna pen Mate 4 leh Luka 4 sungah kicianlua mahmah hi. Zeisu leh zuau khempa ki talsikna tengpen kidona sungah ki pulak hi. Tua sungah Christ leh Satan kidona lianpi omzia taktak teng omsuk a, a khauh mahmah leh kician takin kilak hi.

**Mate 4:1–11 simin. Christ leh Satan kikal a kidona lianpi hiteng ah koibang in ki pulak hiam?**

.....

Zeisu pen “*dawimangpa in a zia-et theihna dingin*” Khasiangtho in Zeisu gamlak ah “*paipih*” (Mate 4:1) hi. A kigeelsa galpa tawh a kimuhma in ni sawmli sung sitset Zeisu in an-ngawl in omkhin hi. Dawimangpa hong tun takciang in bel, Zeisu’ gilkialna mah matlak in, suangte khomun suaksak ziau dingin zia-et hi. Hi taleh Zeisu in hih zia-etna pen Laisiangtho tawh do ahiah manin, Satan’ thaang in guallel ta hi.

Tua ciangin, Zeisu in upmawhna peuh tawh a hihkhak leh ci in, dawimangpa in, biakinn dawn zumna pan lengsuk ding zia-et leuleu hi. Satan in, Laisiangtho kammal khut tung lumleh bangin hei in, Zeisu pen Pasion’ Tapa ahiah takpi leh bel, vanmite in Amah kem lel ding cih. Ahiahhang Laisiangtho kammal diktak in simna tawh Zeisu in tua zia-etna nawk suak theita hi.

A thumna zia-etna bel dawimangpa in ama’ hanciamna picing taktak dingin a ngiimna kician mahmah hi. Zeisu in amah biasak nuam hi. Pasion bekina a neih biakpiakna pen Satan in buluh sawmta hi.

A tua ding in, Satan in, leitung gamteng leh a minthanna teng lak in, “*kamai ah kunin hong bia hi lecin, hihte khempeuh Nangma khutsungah ka hongpia ding hi*” (Mate 4:8, 9) cih. Luka 4:6 sung a kammal in Mate sung a tawh a kibang hi a: “*Hihte khempeuh keima’ khutsungah hong kipia khin ahiah manin, ka piaknop peuhpeuh tungah kapia thei hi. Hih vangliatna leh hauhna khempeuh te nangma tungah ka hongpia ding hi*” (Luka 4:6) a cih. Khatvei kikmah Zeisu in tua zia-etna pen Laisiangtho kammal mahtawh nawkkhia leuleu ahiah manin, Satan guallel leuleu hi. A thumvei mahin Zeisu in Laisiangtho kammal zangin, galpa dona tengpan kidal hi.

**Ephet 6:12 sunga “Eite do pen leitung mite hilo a, vantung huihlak a om ukna aana neite, hih leitung khuamial a ukte tawh a kido ihi hi” cih hong phawksak hi. Lauhuaina sungah a ki omloh tei hang, eima kimkot teng mahah kidona om cih banghang in phawk den huai nasa hiam?**

THURSDAY

February 27

**Vantung Leitung Kidona Omzia**

Pasion leh Satan kikal kidona honpi khat mah mukhin hihang. Koibang in tuabang piangthei hiam? Vanglianpen Pasion khawng koici do theih uh hiam? Tua leitung vantung kidona pen aana kituhna ahiah nakleh, tua masiah pek panin a kipan khinsa hiding hi. A tuamdang khat hihtuak zaw hi. Laisiangtho in, Pasion’ omzia a nasepzia a kituhna panin a kido hizaw – Pasion

tengah cihtak theihlohna dingin mawhmatna hizaw a, Amah hoihkim lo in itna kicing neilo cihi. Tuabang mawhmatna pen thahatna leh vangliatna peuh tawh zawhtheih hilo a, amau nih hong kidem toto leh bekmah hithei hi.

*“Mawhna vai limlim pen, Pasion in dikna leh thumaanna bekmah zang hi. Pasion in a zatloh penpen – zuau khemna pen Satan in zang hi. Vantung mite’ maiah Pasion’ thu leh Ama’ ukna gam khialsak in, vanmite a ukna thukhun bawlna sungah Pasion thutang zolo; Ama’ bawlsa te in ukna sangin thumang ding cih khawang pen, Amah aki pahtawi nopna hilel peuh cihi. Tua ahih manin Pasion’ ukna gam leh a thukhamna in thutang thumaan ahihna vanmi khempeuh leimi khempeuh theihcian dingin pulaak khiat kulta hi. Satan in vannuai leitung bup a hoihtheihna ding bawl ding bangin kilangsak hi. Buluhna gamtatzia leh ama’ vanzat peuhmah pen mipi in theihintel mahmah kul hi. Ama’ gamtat siatna tengin amah hong pulaak khia ding hi” —Ellen G. White, *The Great Controversy*, p. 498.*

**John 8:44, 45 leh Mang. 12:7-9 enkak in. Hih mungel in dawi gilo gamtatna leh a paizia bang pulaak hiam?**

.....

Acil apat in dawi gilo ngiimna pen, Pasion pen thutang zo taktak lo, hong it zo taktak lo a, Ama’ thukham in zong mipi hong gawt bawlna hi ci in piansaksa khempeuh in umsak ding ahi hi. Zeisu in dawi gilo pen “zuau khempa zuau’ pa” (*John 8:44*) ana cihzong ahi ding mah ahi hi. A lebulh in Zeisu in “thumaan teci pang ding” (*John 18:37*) acih thu in Satan’ zuauthu pen talsik bak lel

in, dawimangpa’ vangliatna peuhmah suksiat siangsak sitset hi (*1John 3:8; Heb. 2:14*). Mang. 12:9, 10 in zong Satan pen (1) “**tanglai gulpi**”, (2) vantung ah omngei a Pasion’ mite a mawhsakpa (3) leitung khem in a uk gulpi cihi. Greek pau in “*daw*” a cihna pen “*khempa, zuaupa*” a hih manin, tanglai panin kidona pen; Pasion’ omzia a kihel upna kituhna ahi hi.

**FRIDAY**

*February 28*

**Ngaihsutbeh Ding: Ellen G. White, *The Great Controversy* pp. 492–504, “The Origin of Evil” simin.**

*“Mawhna hong lutna limlim pen Pasion vaipuak bangmah om vetlo ahihna sangin a kitelcian zaw thudang Laisiangtho sungah omlo; Pasion in hong hehpihna nungkin kik cihzong omlo; langdona a pian theihna dingin ukna bit zolo cihzong omlo hi. Mawhna pen hong pumlut hi a, a hangthu gen ding zong omvetlo hi. Theih zawhloh thu thukpi hi. Satan bang pen ki hemkhia vatlian leh, vanmi leimi leh leitung dang a ommi khempeuh in, itna kihello launa bek tawh Pasion’ maiah nasem ding uhhi. Zuau khempa huzaap teng beisiang nailo ding a langdona zong ki hemsiang theilo ding hi.*

*Gitlohna ki khankhin sak phot hi. A bei ngeilo khang tawntung in vantung leinuai buppi hoih theihna dingin, Satan in zong ama’ thukhun khangto sak ding a, Pasion’ ukna a mawhpaihna teng zong, piansaksa khempeuh in hong mukhia ding uh a: Pasion’ thutang leh hong hehpihna, Ama’ thukham kipkhona cihteng in dotna khempeuh vengsak ding hi” —Ellen G. White, *The Great Controversy*, pp. 492, 493, 499.*

**Kikupding Dotnate:**

**1. Lucifer in mawhna hong bawl masak theih pen mi tampi in lamdang salua uhhi. Banghang in mawhna in**

**“thuthukpi” leh “tel zawhloh” hithei hiam? Hih mawhna masa pen siansuah lopi in koibang in ki hilhcian thei ding ahi hiam? A bulpi hilhcianna mah in siansuahna banghang in hithei ding hiam?**

**2. Banghang in Pasion in Satan hemkhia pah ziau lo hiam? Banghang in gitlohna “ki khankhin sak” hiam? Banghang in hihthu in “vantung leitung buppi hoihna ding hithei hiam”?**

**3. Pasion leh Satan kikal a kidona pen ukna aana kituh hi zawlo, thudangpi khat a nahihna theihel ding banghang in thupi nasa hiam? Gamtatzia kituhna pen ukna aana kituhna ahilhloh theihna koibang hi nasa hiam?**

## Lesson 10

March 1–7

### NASEPNA THUKHUNTE

#### SABBATH NITAKLAM

**Tukalsung Simding:** *Dan. 10:1–14; Mang. 13:1–8; Job 1:1–12; Job 2:1–7; John 12:31; John 14:30 Maku 6:5; Maku 9:29.*

**Kamngah:** **“A kipatcil panin dawimangpa in mawhna bawl tawntung ahih manin, mawhna a bawl khempeuh zong dawimangpa’ mi ahi hi. Hih dawimangpa’ nasepna a beisak dingin Pasion’ Tapa a hongpai ahi hi.”** (1John 3:8).

**A vanglian** mahmah tangthu, vantung leh leitung kidona khat pen 1Kumpi 18:19-40 sungah om a, Carmel mualtung ah Elijah tungtawn in Pasion in *“namdangte’ pasian”* a pholaakna ahi hi. Tua *“pasiente”* nungah milim biate’ upna leh ngaihsutna om hi. Israel mite kimkot a minamte in amau’ biak pasian pen a omtaktak ding mahin ngaihsun uhhi.

*“Amaute un Pasion ahilo dawi ahi, amau zong un a theihloh pasian thakte, a pu a pa te’n zong a theihloh te bia uhhi”* (Thuhilhk. 32:17). Paul in *“Lawki te in gangawh biakna a piak uh ciangin dawi abia uh hi a, Pasion’ biakna hilo hi. Dawi biakna ah note na kihel dinguh ka deih kei hi”* (1Cor. 10:20) cihhi. Tua minamte’ *“pasiente”* pen dawi kimeelseel hipeuh hi. Tua milim teng leh pasian dang khempeuh tepen *“vantung leitung a kidona”* a omsak pen ahi hi.

Tuathu tawphah peuhleung vantung leitung kidona thu kitel siang lel hi. Tua thumaan mah in hih vantung



leitung kidona leh gitlohna buaina tungah khuavak hong taan hi.

**SUNDAY**

*March 2*

**Vanmi Khat Ki Ziakaisak**

I muhsa mahbang in namdangte' pasiante in daw kimeelseel hipeuh hi. Tua banah vantung a uk dawite mahmah in leitung kumpite nungah om khinkhian uhhi. Vanmite nangawn thupuak in hong paikhak ciangin galte in nado thei uhhi.

**Daniel 10:1-14 sim inla, taang 12 leh 13 awlmawh phadiak in. Hih mungel in vantung leitung kidona tawh a kibang bangthu gen hiam? Pasion in a sawl vanmipa pen ni sawmni leh khat sung "kinial" cihpen na bangcih diam?**

.....

Pasion in a sawl vanmipa pen kaalthum sung koibang in "kinial" hiam? Vanglian mahmah a, Daniel dotna dawng theilua ding hinapi vanmi sawl zaw hi. Amah'n hihnuam peuhleh, Daniel kiangah vanmi paisak ziau thei lel hi. Hinapi, Pasion in a sawl vanmipa pen, Persia gam a cing vanmipa in kaalthum sung nial keei hi. Bang a cihnopna hiam?

*"Gabriel in, Cyrus a huzaap nuam khuamial vangliatna tawh kaalthum sung sitset kilai hi. Pasion' mite a dingin vantung in a hihtheih khempeuh hih khinzo hi. A tawpna ah gualzawhna ngah hi. Galpa thahatna teng khempeuh zong Cyrus leh Cambyses khutsungah kikem cip h?"—Ellen G. White, Prophets and Kings, p. 572.*

Hibang kidona te ciang pholakna ding lel ahihle, Pasion in Ama' vang neizah saal khiat kul samlo hi. Galpa T-7

in zong suahtakna taktak ngakhka a, zong ki lakkhiat sakpah lo hinapi, ciangtanh khat bel om sam hi. Vantung leitung kidona sungah Pasion' vanmite nangawn panla uh ahih manun, ciangtanh a om ding mah ahi hi. Tua hi a, hong pailai ding sinna tengah zong "galphual kuante a ding thukhun" cihte hiding hi.

Hih ciangtanh teng tel peuh leng, Pasion in itna tungtawn in, aana zang hetlo Ama' gam ukna tawphah bawl cihpen telhak nawnlo hi. Pasion in itna thukhun tung bekah nasem cih theihtelna in kidona lianpi omzia hong telpha sakzaw hi.

**Itna thukhun sungah sawngawhna omlo in ciangtanna tawh nasepna naphawk kha ngei hiam? Tua vangliatna ciangtan om panin bang theihbehna nanei thei hiam?**

**MONDAY**

*March 3*

**Mangmuhna Gulpi**

Vantung leitung kidona sunga vantung huihlak a ukte' vangliatna teng Mangmuhna sungah kikhum sitset a, dawimangpa pen "gulpi" Pasion a langdo leh "leitung a khempa" (*Mang. 12:9*) kici hi.

**Mangmuhna 13:1-8 simin. Hihmun in gulpi' thuneihna bangteng hong lak hiam?**

.....

Gulpi Satan in Pasion langdo (*Mang. 12:7-9*) bek hilo, Ama' silate zong langdo lai (*Mang. 12:1-6*) a, khang tawntung a Pasion' mite a bawlsia kinken kumpite nungah ukpipa in omden hi.

Gulpi in, tuipi sungpan hong kahto sapi tungah “ama’ vangliatna, a tokhom leh aana lianpi” (Mang. 13:2; Mang. 13:5; Mang. 17:13, 14) apia hi. Tuipi pan hong kahto sapi tungah “kiphatsakna leh kam khel nono pautheihna ding kha sawmli leh nih sung aana zat theihna ding thu kipia hi” (Mang. 13:5).

Satan (*gulpi*) in vangliatna leh ukna aana sapi tungah pia (*leitung a biakna leh ukna aana*) hi. Hih vangliatna in Pasion bek tungah a om biakpiakna buluhna ding ahi hi. Sapi in Pasion’ min daisak; misiangthote, Pasion misiang te, tawlkhat sing do in zogawp lai hi. Hih leitungbup ukzawhna leh thuneihna pen gulpi in amah apiak hi a, leitung ukzawhna teng a buluhna ahi hi.

Ahihhang, Satan leh a khutzatte tungah ciangtan khat om a, tawmvei sung bek cih. “*Vantungte leh tuate sunga a teng khempeuh aw, lungdam un! Vantung panin dawimangpa hong kilawnsuk a, hun tomno bek neilai ahihlan thei ahih manin leitung leh tuitung ah omte a dingin lauhuai mahmah ding hi*” (Mang. 12:12) cih.

Satan in “*ama’ hun tom cih thei*” (Mang. 12:12), Mangmuhna sunga genkholna hunte pen hun saupi huam a, ciangtan lianlian in hih gitlohna vanglian a maan hun ding (Mang. 12:14; Mang. 13:5) honglak hi.

A tawpna ah, Pasion gualzo teitei hi. “*Pasion in amau mit panin khitui khempeuh nulsak ding hi; Thu luisa te maimang khinta ahih manin, sihna, dahna leh nasa in kahna cihte om nawnlo ding hi*” (Mang. 21:4) aci hi.

**Tu tadih in i muh theihloh hang, a tawpna ah hoihna in gitlohna tungah gualzo ding hi. Hih kamciam mangngilh loh ding banghang in thupi nasa hiam?**

**TUESDAY**

*March 4*

**Job’ Tangthu**

Job laibu sungah, kidona lianpi omzia taktak muhna thak hong kipia hi.

**Job 1:1–12 leh Job 2:1–7 simin. Kidona lianpi sungah bang thukhun lian hong pholaak hiam?**

.....

Hiteng panin zong thu kician pawlkhat kaikhawm theilai ding hihang. Amasa in, Pasion leh Satan bek peuh ahilo, vanmi tuamtuam tetawh kimuh khopna omtuak hi.

Anihna, kam kinialna zong omtuak, Job tungtang Satan’ muhna leh Pasion’ muhna kinial uhhi. Job koici ngaihsut nahiam? Tua dotna kiukiau panin thu zaipi khat hong suak hi.

A thumna, Pasion in Job paubaang lo, thutang, Pasion kihta ci a; Satan inbel, Pasion in amah kemcip ahih manpeuh in Pasion kihta tawh a kibang hilel cih. Tuapen Pasion leh Job omzia gensiatna ahi hi (Mang. 12:10 leh Zechariah 3 enkak in).

A lina, Pasion in Job a huutna in ama’ kiim ah dai a khan sak zong thutang hilo a, Job’ cihakna zong ki sittel theilo cih. Tuathu in Satan’ nasepna sungah ciangtanh kipia ahih manin, Job sukha theilo cihna ahi hi.

Satan’ mawhsakna teng pen Pasion in vantung kikhopna mipi’ maimah ah, Satan in Job sittel thei ding cinapi, ciangtanh khat pia hi. Job’ “*neihsa khempeuh*” tungah Satan nasep theihna ding phalna pia masa hinapi

“ama’ pumpi sukha theilo ding” (Job 1:12) cih. Anunung pen in Satan in, Job pen ama’ pumpi bek awlmawh hi acih sese lai ciangin Pasion in, ama’ pumpi zong sawk inla, a nuntakna sawk ke’n cita hi (Job 2:3–6). Tuabang in Satan in Job’ bangkua sungah thusia tampi tun hinapi, mawhsak theihna ding Satan bawl thusia khatsim tungah Topa’ min phat hi.

Hiteng panin zong vantung leitung kidona sungah thukhun mah om veve cih hong kilang sak hi. Vantung thukhenna sungah Pasion langdona te vengsak na dingin daai kikaai a, Pasion in itna tawh a khunsa thukhun te palsat theilo ding, tuate pen vantung leitung leh asung a teeng khempeuh a ukna thukhun ahi hi.

Job’ laibu sunga thupiang teng in, kidona lianpi omzia leh leitungah koibang kidona mainawt cih hong telcian sak hi.

**WEDNESDAY**

*March 5*

**Tawlkhat Sung Leitung Ukpa**

Nunga sinna sateng panin kidona lianpi sungah, Satan leh a pawlte pen, hih leitung tawlkhat sung uk dingin, daaikaih pawlkhat tawh phalna kipia cih muhsa ahi hi.

Hih thukhun tengin galpa’ dawimangpa leh a pawlte’ nasepna bek ciangtanh hilo in, Pasion’ nasepna mahmah zong galpa khutsungah tawlkhat om ahiah manin, kikhiam in neusak pah hi. Pasion in tua nasepna sung ading in a piaksa kamciamte peuhmah palsat lo ding a – dawimangpa ukzawhna dingin tawlkhat a kipia khin ahiah manin – Pasion in zong Ama’ vanglian kiamsak hetlo pimah in Ama’ nasep tawmkhat ciangtanh la pah hi.

**John 12:31; John 14:30; John 16:11; 2Cor. 4:4  
leh Luka 4:6 simin. Hihmun tengin leitung ukpa’  
tungtang thu bangteng gen hiam?**

.....

Laisiangthothak in kumpi nih kido, khuavak kumpi leh khuamial kumpi Satan leh a langdona thu hong pulakkhia hi. Christ’ nasepna khenkhat zongpen Satan’ gam suksiatna ding mah hi a: “Hih dawimangpa’ nasepna teng a beisak ding mahin Pasion’ Tapa hongpai ahi hi” (1John 3:8) cih.

Cihte hang, Pasion in Ama’ ukna thukhun tungah a kipkho te a ding ciangtanh “thukhun” bawlthei veve hi. Tua ciangtanh sungah (1) deihteel theihna (2) nasepna sungah kamciam thukhun tepen, ei’ kamkup theih zong hilo hi. Tua Pasion’ nasepna te awksak khak-hal na’ng ciangtanna te in leitung gitlohna vengsak nading Pasion’ lungsim thakhauh sak zawsop hi. Hinapi, gitlohna leh thuakna kizom toto in mitampi in Pasion hoihna leh Ama’ omlam a lunghiang bang zong om uhhi. Hih kidona lianpi leh tua gitlohna a maiphut ding dan na telcian nakleh, leitung thute hibang in a piantheihna thu zong na telcian pah ding a – a neupen in gitlohna tungah Pasion gualzo teitei ding cih nathei ding hi.

**Zeisu in, Satan pen leitung “ukpa” a cihthu in,  
tumah mah in leitung gitlohna koibang in hong telsiam  
saktei naci hiam? Tawlkhat sung bekmah cih na  
theihna in koibang in hong lungnuam saktuam nasa  
hiam?**

**THURSDAY***March 6***Ciangtante leh Thukhunte**

Vantung leitung kinalna pipen Pasion' gamtatzia, Pasion' hoihna, thutangna leh a ukzawhna tungah dawimangpa in a mawhmatna teng ahi hi. Vantung leh leitung kamciam thukham thu ahi hi. Vantung leitung a ding ki ukna thukhun ahi hi. Hibang thusia peuhmah pen vangliatna tawh kizo theilo a, sepkhatsak phot kul hi.

Mi khat' vangliatna tungah mawhmatna khat peuh a om ciangin, thu veng sakna dingin, hong mawhmat mite suakta tak leh thutang takin semkhia sak ding a, mipi muh in thu dawp ding hihang. Tua mawhsakna in ki ukna (*itna tawh*) lokzo phial ahihleh, amah ninbung sungah ki mawkpaih theilo hi.

Kidona lianpi telcianna in gitlohna buaina telcianna tawh koibang in kizom hiam? Pasion in kamciam apiak leh a palsat diam? Tuabang hilo hi. Pasion in a nasepna sungah thukhun om ding a thukim mahbang in, Ama' mailam nasepna peuh ah ciangtanna neipah ding hi. Tuabang ciangin, khuamial ukna nuai ah tawlkhat sung gitlohna omthei mah ding hi.

**Maku 6:5 leh Maku 9:29 simin. Hih munte in Pasion' nasepna peuhmah upna leh thungetna tawh ki sawhhel ding cih bangteng tawh hong lak hiam?**

.....

Hihmun tegel in, nasepna peuhmah ciangtan om hamtang ding a, thungetna leh upna tawh tonkhawm ding cihi. Mun khempueh ah thungetna in thu lamdangsak cih muhsa hi a, Pasion' nasep theihna ding lampi honsak maw ahiah keileh zong kisang zolo maw cih hipah hi. Ahihhang,

upna leh thungetna bekma tawh cih tentan tawh khialhna bawloh ding thupi hi. I Phawkkhak loh theih ding thu tampi mah omlai hi.

Hipen bel i muhsa ahi nasepna ading thukhun ahi hi. I nasepna ading thukhun te Pasion hong thukimpiah a omnakleh, Ama' mailam nasepna ah ciangtan zang pah ding hi. Tua mahbang in khuamial ukna gam sungah zong gitloh nasepna tawlkhat sungteng ompah ding hi.

**Rom. 8:18 leh Mang. 21:3, 4 simin. Hihmun te tungtawn in, ei theih khakloh thu tampi om a; Pasion in a hoihpen ding thei, a hoihpen zong deih pah a, gitlohna tawpsak in tawtung nopna sung hong tun ding cih bang lungmuanna ki neithe ci hiam?**

**FRIDAY***March 7*

**Ngaihutbeh Ding: Ellen G. White, Testimonies for the Church, vol. 1. Iaimai. 341-347, "The Power of Satan" simin.**

*"A puk mipa pen Satan' galmat ahi hi. Christ' nasep ahihleh, tuapa, galpa vangliatna pan hotkhiat ding ahi hi. Mihing pianpih limlim, Satan' deihna a zuisa ahi hi. Gualzo penpa Christ, ama' sungah hong omin ama' deihna makaih leh bek tua gal lauhuai dozo pan ding hi. Pasion bekin Satan' vangliatna ciangtan thei hi. Tua Satan leitung mun khempueh vak kawikawi hi. Hun themkhat zong mawk beisak lo a, kha te a suksiat khakloh ding lau mahmah hi. Tuathu Pasion' mite in telcian in, ama' thaangzaak pan suahtak kul hi. Satan in Pasion' mite hong khemna ding a nunungpen pilna in, amah ahihlam kuamah'n thei saklo hi. 2Cor. 11:14 sungah: "Tuapen lamdang sak ding hilo hi, Satan nangawn Pasion' vanmi tawh a kibang in ki bawltawm thei h" cihi.*

*Khem thuaksa kha pawlkhat in amah omlo ci uh a, tua zong ama' galmatna mah, amau' sungah tangzai takin nasem thei hi zawsop hi. Pasion' mite in Christ sungah a neih khinkhian uh thahatna pen Satan in telzaw thampek hi. Gualzo penpa tungah ki niangkhiat takin ki-aap tentan peuhleh, upna sungah a thanem penpa nangawn, Christ tungah kip takin om tinten leh, Satan leh a pawlte tungah gualzo thei veve hi. Satan in ama' zia-etna tawh hangsan tak, langtang tak leh pilvang takin hong paithei ahih manin: a lusu Christian te hong khanglo ding a, Honkhiapa thahatna tungah kinga thei ding uhhi. Theihloh kal in hong pai khilkhial a, ki melseelsa in Pasion um a kineih thumanglo mite tungtawn in na hong sem hi"—Ellen G. White, Testimonies for the Church, vol. 1, p. 341.*

#### **Kikupding Dotnate:**

- 1. “Satan’ galmat” cihteh bang a cihna hiam? Satan in mihing tungah ama’ sepnop bangpeuh semthei cihna maw leh? Ahih keileh zong, banghang hilo? Kidona lianpi sunga “nasepna ah thukhunte” cihtawh koibang in kizopna nei hiam?**
- 2. Tawlkhat sungbek a hitei ta zong in hi kidona sungah ukzawhna aana pen Satan tungah Pasion in banghang in pia hiam? Satan’ mawhmatna teng Pasion in koibang in dawn sawm hiam?**
- 3. Satan om takpi lohi aci Christian tampite tungah koibang in na dawng tammaw? Satan omtakpi cih lahtel theihloh hang, amah nakpi takin khemthuak ahihlahm bang tawh na lakthei tam maw?**

#### **Lesson 11**

*March 8–14*

### **BANG HIHSAKBEH THEILAI DING KAHIAM?**

#### **SABBATH NITAKLAM**

**Tukaalsung Simding:** *John 18:37; Rom. 3:23–26; Rom. 5:8; Isa. 5:1–4; Mate 21:33–39; Isa. 53:4; Rom. 3:1–4.*

**Kamngah:** **“Tuaciang in Pilate in, ‘Nang kumpi nahi hiam’ acih leh Zeisu in ‘Nangmah in Kumpi hi nong ci hi. Hih thumaan genkhia dingin mihing suak in leitung ah hongpai Kahi hi. Hih thumaan tawh a kizom mi peuhmah in Keima thugen hong zui uhhi’ aci hi.”** (*John 18:37*).

A beisa kum tawmno lai in, **Guide** magazine sungah naupang tangthu hoih khat hong suak hi. Hun laizang hunlai a innkuan khat in a kep tagah Denis kicipa’ tangthu ahi hi. Denis’ nulehpa cidamlo pipi in kumpipa’ galkapte in puakhia uh a, tuani pan kipan a nulehpa mu ngei nawnlo ahih manin, in amau’ gam kumpipa mudah lua mahmah hi. A nung ciangin, pulnatna panin a damlai leh a dam nawnlo te, kumpipa in a khen khatna ahihlahm hong theikhia hi. Tuathu in ama’ khang tawntung kumpipa tungah a hehna tengpan suakta sakta hi. Kumpipa in a mite a dingin itna takpi tawh nasem tawntung hi.

Tuni mahmah in zong Denis in kumpipa tungah a muhdan bang muhdan tampi om hi. Dawimangpa in Pasion muhdah theihna ding leh kikhen khat theihna ding vive bawl hi. Thuaksiat laitak in Pasion koiah om hiam? Pasion hoih nabi banghang in gitlohna tam hiam? Vantung leitung

kidona lianpi in bel khuavak hong taan mah hiven, dot ding zong tampi mah om veve lai hi. Eite' dawnna khempeuh lungkim huai zolo ahihhang, tu a hong ki dawng nailo dotna khempeuh tawh singlamteh tunga Zeisu en peuh leng Pasion hong muangsak pah ding hi.

**SUNDAY**

March 9

**Galzopa Christ**

Christ in, buluhna tawh "*leitung ukpa*" a cih mahbang in, Vantung leitung ukpa in Zeisu Christ om gige napi, galpa in zong na semsem hi. Zeisu in eite ading in galzo khin a, eite'n zong haksatna thuaksiatna sungah tua galzawhna neihpih theihna ding hong huh hi. Christ' nasepna in galpa' nasepna munteng ah talsik ding ahi hi.

Laisiangtho in dawimangpa thu hibang in gen hi:

(1) a kipatcil panin leitung bup a khempa (*Mang. 12:9 Mate 4:3; John 8:44; 2Cor. 11:3; 1John 3:8*).

(2) Vantung ah Pasion leh amite a mawhmat denkeeipa (*Mang. 12:10; Mang. 13:6; Job 1-2; Zech. 3:1, 2; Jude 9*).

(3) Leitung ukna a buluhpa (*John 12:31; 14:30; 16:11; Sawl. 26:18; 2Cor. 4:4, Eph. 2:2; 1John 5:19*).

**John 18:37 simin. Christ in galpa' khemna nasepna teng a talsikna hihmun in bangteng gen hiam? Zeisu in Kumpipa cih in bang khatna nei hiam?**

.....

Laisiangtho in Satan pen zuaukhempa, mawhcongpa, ukna buluhpa a cih mahbang in, Zeisu pen Satan tungah galzopa cihzong hong hilh lailai hi. **(1)** Zeisu

pen "*hih thumaan genkhia dingin hongpa*" (*John 18:37*) cih. **(2)** Singlamteh tungtawn in Zeisu in Pasion' kicinna, thumaanna leh itna hong lak (*Rom. 3:25, 26; Rom. 5:8*) a, dawimangpa' zuauthu tawh mawhmatna teng a manlohna zong honglak pah (*Mang. 12:10, 11*), **(3)** Atawpna ah Zeisu in dawimangpa' gam usia ding a, dawimangpa in zong "*hun tomno khatbek nei*" ahihlam phawk (*Mang. 12:12; Rom. 16:20*), Christ in "*a tawntung, tawntung in mang ding hi*" (*Mang. 11:15*) cih.

Atawpkhakna ah, Satan pen gallepa hita a, Christ' galzawhna zong eite aa hita ding a, singlamteh tungtawn in hunkhat khit hunkhat in hong kamciamsa Ama' kamciam te ei a hita ding hi.

**Kidona lianpi sungah koilam in zozaw cih theilel hihang. Nisim in eima' teelna in koilam ah pang cih koibang in hong lak hiam? Tumahmah in galzolah a om ihih lam koibang in telcian thei ding ihi hiam?**

**MONDAY**

March 10

**Thutang leh Thutangsakpa**

Munkim panin Christ' nasepna in dawimangpa' nasepna teng guaksuah hi. 1John 3:8 in zong "*Hih dawimangpa' nasepna teng a usia ding mahin Zeisu hong pai ahi hi*" hi a, Hebrew 2:14 ah zong "*sihna a uk dawimangpa a suksiat theihna dingin*" cih. Hinapi, galpa' ukzawhna a suksiat siang nading zong cialnih omlai hi. Khatna, Singlamteh tung tawnin, Christ in Satan pen mawhmat theipa ahihna pulak khia a, tua banah Satan leh ama' ukna gam ki usia ta ding hi.

**Rom. 3:23-26 leh Rom. 5:8 simin. Hihmun te in dawimangpa'n eite hong mawhmatna teng koibang in Christ in usia ci hiam?**

Galpa in, Pasion pen thutang cinglo itna picinglo ci in a mawhmat i theihsa ahi hi. Christ leh a Singlamteh tungtawn in Pasion in, Ama' dikna leh hong itna hong hawmkhia hi.

Zeisu a sihkhit ciangin “*Satan in ama' kimeelseel teng ki hawkkhiat sakta cih muta hi. Ama' ukna pen a puksa vanmite leh vantung leitung muh dingin ki hongkhia hi. Amah mi thatpa ahihlam hong kiphawk ta hi. Pasion' Tapa' sisan a luansak manin, vanmite veiina pan in amah kilawnkhia ta hi*”—Ellen G. White, *The Desire of Ages*, p. 761.

**Mang. 12:10–12 pen Piansil 3:15 lungngai in simin. Hihmun in Singlamteh tungah Christ' gualzawhna teng koibang in khuavak hong taan hiam?**

Tatkhiatna tangthu in, a tawpna ah na khempeuh a dingin a hoih in Pasion in hong vaihawmsak cih lungmuanna hong guan hi. Laisiangtho Pasion in a hoih nate bek hong bawlsak den a, kidona lianpi sung mahah Amah kiang zuat theihna ding lampi hong sialsak den hi (*Thlk. 32:4; 1Sam. 3:18; Late 145:17; Dan. 4:37; Hab. 1:13; Mang. 15:3; Pian. 18:25*).

**Hih vantung leitung kidona lianpi sungah Pasion' dikna leh a itna pulakkhiat ding banghang in thupi thei hiam? Singlamteh tunga Pasion' hong sepsak khempeuh khuavak lengsak kik ciangin, haksatna thuaksiatna kawmkal ah Pasion hong itna in koibang in lungmuanna hongpai naci hiam?**

**TUESDAY**

*March 11*

**Ka Itpa' La**

Hih kidona sungmah ah Pasion in, Ama' dikna leh a itna lamdang takin honglak hi. Hinapi, *Pasion in dawimangpa a daal nading in hih a sepsa teng banah a dang sepbeh lai a neilai tam maw* cikha ding uhhi. Vantung leitung kidona sungah Pasion in Amah leh mi kikal ah itna tawh kizopna a khantoh theihna dingin deihteelna ultung sakpen cih i muhsa uh ahi hi. Ama' itna lahkhiatna bek tawh a veng thei ding kidona sungah, mipite in amau' lungsim kizawhna tantan leh nasepna sunga thukhun te zuihna tungtawn in nasem bek hi.

**Isa. 5:1–4 simin. Hiteng ah kua pau hiam? Isaiah' in kua' thu gen hiam? Lenghuan leh lenghuan neipa cihte kua hiam? Lenghuan leh lenghuan neipa' nasepna a thupi bang om hiam? Bangthu piang hiam?**

Hihmun ah Isaiah in ama itpa, lenghuan' la sa hi. Lenghuan neipa pen Pasion mah hipah a, lenghuan ahihleh Pasion' mite ahi hi (*Isa. 1:8; Jer. 2:21*). A mawhna hong pulakna bel leitung ah Pasion' nasepna tangzai zaw sakthei ding hi. Hiteng ah lenghuan neipa Pasion in Ama' lenghuan hoihna ding a kiasm khempeuh bawlsak cih. Lenghuan in lenggah hoih a gah ding hinapi, “**gam lenggah**” gah mawk hi. Tua gam lenggah pen lailet dangte in “**a manneilo**” ci uhhi. A bulpi Hebrew pau sungah tua kammal pen “**gah-uih**” cihna ahi hi. Pasion lenghuan in **lengmuat** gah ta hi.

Isaiah 5:3 in, Pasion mah pausak a, Amah leh Ama' lenghuan kikal ah “**thukhen**” dingin mipite samsak hi. Isa. 5:4 in zong dotna phamawh pawlkhat dong sak a: “*Ka lenggui lo a dingin kahih nailoh kahih ding bang omlai hiam?*”

*Lenggah hoih a gah ding Ka lam-et laitak in, banghang in gam lenggah hong gah mawk hiam?*” cih. Topa in bang hihsak thei lai ding hiam? Ama’ nasepna thukhen dingin midang a sapliang pen in lungsim hong la mahmah hi.

**Singlamteh en lecin, ei’ mawhna tangin Amah hong kipiak khatna ah, Ama’ kammal “Ka lenggui lo a dingin kahih nailoh kahih ding bang omlai hiam?”—hihthu tawh kisai thu kician khat gen in.**

**WEDNESDAY**

*March 12*

**Christ’ Thugentehna Lenghuan**

Mate 21 sunga lenghuan neipa thugentehna sungah, Isaiah 5 in a nutsiat teng gen a, lenghuan neipa in Ama’ lenghuan sungah a sep teng hong behlap sak hi.

**Mate 21:33–39 pen Isaiah 5:4 sunga dotna lungngai sa in simin. A hihsa teng banah bangteng hihlai ding hiam?**

.....

Christ’ thugentehna a patna lam teng pen Isa. 5 sunga lenghuan leh lenghuan neipa’ thuteng sutkik phot hi. Lenghuan neipa in “*khawhlawhte tungah Ama’ lenghuan aap in, Amah gamdang ah pai*” (Mate 21:33) cih. Lenghuan neipa in Ama’ nasepna (*kamsangte*) ama’ ngah ding teng la dingin nihvei paisak in ahileh, saatgawp in Ama’ nasepna that uhhi (Mate 21:34–36). A nunungpen in Ama’ Tapa (*Zeisu*) sawl a, “*Ka Tapa zahtak buang sam unteh*” (Mate 21:37) ci in a paisak leh “*Hihpa gamluahpa hi ei, thatlum ni in, Ama’ gamh teng sut ding hihang*” ci in “*Ama’ Tapa lenghuan pualam ah kaikhia in thahlup sak uh*” (Mate 21:38, 39) cih.

Bang hihbeh theilai ding? Pa in hong itlua in A Tapa neihsun hongpia hiven (*John 3:16*). Vantung leitung kidona

pen tuabang lian ahieh nakleh, khankhin nailopi in, Pasion vangliatna tawh ki vengsak theilo ding a, Pasion gamtatna leh omzia lahkhiat limlim phot kul hi. Tuapen zong Christ hong sepsakna sungah kicing takin hong ki lakkhia hi (*Rom. 3:25, 26; Rom. 5:8*). Pasion in paulam zong hetlo in, Ama’ thutang leh hong itna tawh eite a dingin Christ hong sihsakna banah, bang dang ngetbeh lailai ding ihi hiam?

Mawhna leh gitlohna a beisiang nadingin, Pasion in kul leh kizam teng hong hihsak khinzo cih Singlamteh in hong lakkhia zo a, itna siangtho a khantoh theihna ding munteng hong suksiat saklo hi. Hih sangin a deihhuai zaw lampi dang om hileh, Pasion in teelkhin lo ding maw? Mihing in kidona lianpi sungah a thuaksiat laimah in, Pasion in eite sangin thuaksia kanlai hi. Singlamteh en peuhheng, Pasion tungah thuaksiatna bangzah in tung cih theipah lel hihang. Christ in eite mahmah zong Amah bangin thuakzo thei dingin itna tawh hong deihsak hi.

**Isa. 53:4 simin. Kuate’ “dahna” leh “gimna” teng Christ in singlamteh tungah thuak hiam? Hihthu in Pasion hong sepsak teng leh hotkhiatna in Pasion tungah bangzah man hiam cih bangteng tawh hong theisak hiam?**

**THURSDAY**

*March 13*

**Pasion’ Min Dikna Lahkhiatna**

Pasion min dikna pen lam tampi in ki lakkhia hi. Pa’ nasepna, Tapa’ nasepna, Tat khatna sungah Kha Siangtho’ nasepna ah Pasion’ dikna leh a itna pen, paubaanna om hetlo in lahkhiatna om khin hi (*Rom. 3:25, 26; Rom. 5:8*).

**Rom. 3:1–4 pen Isa. 5:3, 4 lungngaisa in simin. Hih kidona sungah Pasion mahmah a hoihna ki pulaksak ahiehna bangteng gen hiam?**



.....  
 Rom. 3 leh Isa. 5 sungah, Pasion in ciangtanna tawh Ama' nasepna thukhen dingin Ama' mai ah zong a ding zolo mi mawkmawk hong sam hi. Hun tawp ciangin "**laibute**" ki hong ding a, Pasion in thutang thudik mahmah cih kimu ding hi. Pilna anei piansaksa khem peuh maiah Pasion in Ama' dikna hong lahkhaia ding hi.

**Mang. 15:3 leh Mang. 19:1–6 simin. Ni tawpni in Pasion in Ama' dikna a lahkhiat ding thu bangteng gen hiam?**

.....

Lasiangtho sung tawntung ah, Pasion in Ama' min pulak den hi. Banghang? Na it melloh na theih melloh khat tawh itna thuk sungah kikhawl theilo ding hiteh. Na zi na pasal a lauhuaina a siatna vive hong ki gensak henla, mi'n um hileh, mailam ah na ki-itna uh ki tam thei ding ahih manin, nasia takin talsik in nahih ding dan ngaihsun in.

A tawpna ah, singlamteh ah tatkhiatna tawh Pasion' dikna ki pulakkhia hi. Kumkik ma a thukhenna sungah vantung leitung muhna ah Pasion' dikna ki lahkhaia hi.

Kumkik khit thukhenna, tatkhiat mite in "*vanmite*" nangawn a thukhenna ah (*1Cor. 6:2, 3*), tatkhiat te in, Pasion hihsak nakhempeuh ciamtehna leh Pasion thukhenna in kicing in thumaan leh itna om ahihna et-kik theih hun a ngah uh ciangun, Pasion' dikna kilangkhaia sak ding uhhi. Dawn ding a kilawm dotna tampi a neilo kuapeuh ki omkha hiam? Na khem peuh a ki zawhsiang ma in tua dotna teng hong kidawng khin ding hi (*1Cor. 4:5*).

Atawpna ah khuk khempeuh khukdin in leii khempeuh in Zeisu in Topa hi ci ding uhhi (*Phil. 2:10, 11*).

Tuapen Pasion omzia a hoihna kilatkhiatna pipen ahi ding hi.

FRIDAY

March 14

**Ngaihsutbeh Ding: Ellen G. White, Testimonies for the Church, vol. 9 lai. 285–288 "The Reward of Earnest Effort" simin.**

*"Pasion hong vaihawm sakna tawh kisai lungsim hong buaisak khempeuh pen leitung thak ciangin ki telkkeh mahmah ding hi. Tel zawhloh thute zong telta ding hihang. Pasion lainatna hehpihna eite mai ah kihong khia ding hi. Mihing pilna lel in lungbuai in kamicam a palsat na munah, a kicing a hoihkim lung kituahna kimu ding hi. Mongneilo itna in a haksapen mun ah nasem cih kimu ding hi. Na khempeuh ah eima' hoihna dingin Ama' hong kepcinna i phawk ciangin, genzawhloh in lungdam ding hang a, minthanna tawh kidim ding hihang"*—Ellen G. White, *Testimonies for the Church*, vol. 9, p. 286.

**Kikupding Dotnate:**

**1. Pasion vaihawmna thei nuamlua in na lungsim a buai ngei hiam? Atawpna ah tuateng khempeuh kilangkhaia ding cih na theihna in bangzah hong lungnuam sak hiam?**

**2. Christ in hih leitung a dingin a si dingin mihing hong suak cihthu ngaihsun in. Hihthu in Pasion itna hong pulakna leh Pasion muanhuai na hong gen hi. bang hihthei lai ding hiam?**

**3. Pasion' "min" tawh kisai bang thupi hiam? Christian a kici mite a dingin bang mawhna hong phawksak naci hiam? Christian te in koici bangin Christ' min khawng daisak thei a, eima kimkot a mite tungah Christ' nungzui hihna koibang in lakthei ding ihi hiam?**

**Lesson 12***March 15–21*

Itna leh Thutang: Alianpen Thukham Nihte

**SABBATH NITAKLAM****Tukaalsung Simding:** *Mate 22:34–40; Zech. 7:9–12; Late 82; Micah 6:8; Mate 23:23–30; Luka 10:25–37.***Kamngah:** “**Mi khatpeuh in, ‘Pasian ka it hi’ cinapi in a sanggampa a muhdah leh, a zuaupi ahi hi; a muhtheih sanggampa it-lo pipi in, a muhtheihloh Pasian koibang in itthei ding hiam?’**” (*1John 4:20*).

**A tawpna** ah Pasian in nakhempeuh mamsak ding cih lungmuanna kinei a, tuathu mahin tu a heksuk hektohna teng huzaap hi. Tu tadih in Pasian in a suksiat nailoh ding thu tanglo leh gitlohna tampi om mah taseleh, tuathu in eima thuaksiatna te kiamsak theilo ding cihna hipah lo hi. Tuabang ihih ding eima tavuan ahi hi. Itna leh thutang tonkhawm den cih theihsa hi a; amau gel kikhenkhia theilo hi. Pasian in thutang it hi. Tua hi a, eite’n zong Pasian i it nakleh, thutang zong it kul hi.

Tua mahbang in, Pasian i itleh khatlehkhath ki it kul hi. Khatlehkhath ki itna sungah kimlehpam deihsakna zong kihel hi. Mite zawanna, nenniamna leh thutanglo in simmawhna a thuakna uh phawksak ding hihang. Mi a ki nenniam ciangin ki muhmawh bawlo ding hi. Eima sepsak theih bang om cih zongin, a mimal ahi a, kipawlna tawh ahi zongin, Pasian’ itna leh thutang khangto sakin, hi a

kisia leitungah, Topa’ kicinna itna leh dikna mainawt sak ding hihang.

**SUNDAY***March 16***A Lianpen Thukham Nihte**

A mimal ihi a, kipawlna tawh ahi zongin, Pasian hong itna leh a a thutang a mainawt theihna ding in, Pasian mahin hong thupiak tengmah bulphuh in kipat kul ding hi.

**Mate 22:34–40 simin. Thukham siampa’ dotna Zeisu in koici dawn hiam?**

.....

Zeisu mahmah in “*amasa leh a lianpen thukham*” in “*Na lungsim khempeuh, na nuntakna khempeuh leh na pilna khempeuh tawh it in*” cih. Tua ciangin “*a nihna zong*” tuamah bangin “*Nangma pumpi na it mahbang in na vengte na it in*” cih. Hih thukham tegel in amau nihbek tuam om hilo a: “*Hih thukham nihte tung panin thukham dang khem peuh leh kamsangte’ thuhilhna khempeuh a hong mengkhia ahi hi*” (*Mate 22:37–40*) cih. Tuata khempeuh Laisiangtholui sungpan aki lakhia ahi hi.

**Mate 19:16–23 simin. A hau khangnopa’ ulianpa dotna Zeisu’ dawnna leh Mate 22 sunga thukham siampa dotna Zeisu’ dawnna koibang in ki zawitawn nasa hiam?**

.....

Bang teng piang hiam? Banghang in hih mipa tuaci dawn se hiam? Eima dinmun ngaihsun hetlohhsa in hihbang in hong kici guih leh bang i ci diam?

“Tua ukpa in Christian hoih khat a suah theihna ding kammal te Christ in pau hi. Ama’ kammalte khauh bang ahihhang pil kammal ahi hi. Sangthei in mangthei hileh tua ukpa in hotkhiatna lam-enthei bek ding hi. Ama’ zaliatna leh a hauhna in ama’ gamtatna tungah gitlohna tawh huzaap hi. Tuateng zawp khaleh ama’ sunga Pasion’ omna mun luahpah ding hi. Pasion kiangpan neucik khat nungkin leh Pasion in ama’ lungsim thahatna ding a piak ding teng khawlsak ding a; hih leitung nate in muanhuai lo bangmah cihtaklo hinapi, tuateng mahin huupcip pah ding hi”—Ellen G. White, *The Desire of Ages*, p. 520.

**Ahau ulianpa bangin neihsa khempeuh zuak ding hong kicih lianloh hang, nangmah na let tentan, na khahkhiat keileh tawntung siatna hong tunthei bangpeuh omthei ding hiam?**

**MONDAY**

*March 17*

**Mawhna Lianpen Nihte**

Zeisu mahmah in a lianpen thukham nihte in Pasion itna leh khatlehkhat ki-itna ci khinzo hi. Hih thupiakte zuihna in midangte itna lahna hi a, Zeisu’ khekph zuihna zong ahi hi.

A lianpen thukham nihte in Pasion itna leh mi itna ahihleh, a lianpen mawhna nihte bang hiding hiam?

**Late 135:13–19 simin. Hihteng ah Laisiangtho sung tawntung ah a omden mawhna in bang hi ci hiam?**

Laisiangtholui mahmah in na khempeuh tungsiyah ah Pasion it (*Thulk 6:5*) ding cih. Hihmah pen milim biakna tawh kinai mahmah a, Pasion itna tawh a kilehbulh hipah hi.

**Zechariah 7:9–12 simin. Hihmun ah kamsang Zechariah in, Pasion in bang deihlo ci hiam? Hihthu leh milim biak mawhna in a lianpen thukham nihte tawh koibang in kizom hiam?**

Itna tawh hehsuak in Pasion in a taai gawp pen milim biakna hang bek hilo a, Amite un Amah a mimal a nambup un a telkhialhna uh hang hipen hi. Pasion in itna ahih manin thutanlohna ah a heh suak hi.

Laisiangtholui in a lianpen mawhna nihte pen, a lianpen thukham nihte zuihlohna tawh kizomsak a: Pasion itna leh midangte itna ahi hi. A lianpen mawhna nihte in itlohna ahi uhhi. Tomgen leng, Pasion it lopi leh midangte it lopi in thukhamte na zuihthei kei ding hi.

1John 4:20, 21 in: “mi khatpeuh in ‘Pasion ka it hi’ ci napi in, a sanggampa a muhdah leh, a zuaupi ahi hi; a muhtheih a sanggampa it theilo pipi in, a muh theihloh Pasion koibang in it thei ding hiam? Christ in eite thu hong piakna ah: Pasion a it mi in a sanggam it ding cih.”

**Pasion itna in midangte itna tawh kikhenkhia theilo cih koibang in na hilhcian thei ding hiam? Hih kizopna kitat theilo cih na koici telcian hiam?**

**TUESDAY**

*March 18*

**Pasion in Thutang It**

Laisiangtho sungah Pasion in thutang it in gitlohna mudah a (*Late 33:5, Isa. 61:8*), thutanglo in midikte a thutanlohna tawh bawlsia ahih manin Amah khasia mahmah hi. Laisiangtho alui athak sungah, aki tuancil aki nengniamte a dingin, thutang hehna tawh a neng niamte a tuancil te tungah khasia cih.

**Late 82 simin. Hih leitung a dingin Pasion in bangzah in thutang deihsak ci hiam? Tuni eite a ding bang khatna neithe ding hiam?**

.....

Mi tampi cihna bang hileh, hihmun ah leitung ukna neite' nungah huihlak a uk "dawite" in, amau' dawu vangliatna tawh leitung ki ukna leh thukhenna nunglam panin siahuai sakden ahih manin, tuate tungah Pasion in a thukhen ni ciangin leitung ukna aana neite in mawhpuk neipen uh cih. Ukna neite tungah "Note in a manlo in bang tanvei thu khen in, migilote angvan ding nahi uh hiam?" (Late 82:2) cih dotna om hi.

Tua banah, "Mizawngte leh tagahte kemcing unla; genthei leh tasam te tungah thutang un. Migilote' khutsung panin mizawngte leh tasam te honkhia un" (Late 82:3, 4) cih. Mundang ah zong Laisiangtholui kamsangte in thutang ding vive tangko uhhi. Puatham bek hilo hi; Laisiangtholui kamsangte leh Zeisu mahmah cilehsa tawh a paukhiat thute ahi uhhi.

Pasion ka it a Ama' thu ka mang aci peuhmah tungah hihthu hong kalhna pen thusim hi tuanlo hi. Micah 6:8 sungah langtang mahin hong kalh thu in: "Thuman thutang sem ding a, itna kip nei tawntung in, ki niamkhatna tawh Pasion' thu man ding ahi hi" cih. Hi bang lungsim puak pen Laisiangtho sung tawntung ah om kawikawi hi. Zeisu in zong "Note khatlehkhat na ki it le uhcin, mi khempuuh in Keima' nungzui nahihna uh hong thei ding uhhi" (John 13:35; 1John 4:8-16) cih.

**Micah 6:8 sunga kammal bang lianin gamta hon leng, innkuan sung pawlpi sung bang ci in na um hiam?**

**Nangma dinmun bangpeuh hi taleh, hih thukhun koici bangin a hoihzaw in zangthei ding nahi hiam?**

WEDNESDAY

March 19

**Thutang Phut dingin Cial**

Kamsangte in pawlkhopna sungah thutang ding Pasion in hong cial ci uhhi. Laisiangtho mahin thutanlohna leh nenniamna a dona panin ton kik ngei hetlo hi. Thukhen dingin Pasion aki cialna mahmah pen thutang phut dingin Pasion aki cialna mah hipah hi.

Etpak dingin, kamsang Isaiah in Israel mite hun a thutanglo peuhmah koihcip ngeilo hi. Thutang ding a sapna aw in tuni dongmah in gingtak in kiza lai hi. "Gamtat hoih ding kisin un. thuman in gamta unla, ki nenniamna khawl un. Pa neilote huu unla, meigong numei panpih un" (Isa. 1:17) cih. Tua banah "a cimawhte thutang kimlai, heikhia sakim, Keima' mite sungah a zaungte thuman sutkhia mite; gimna om henla" vauna: "Gimpiakni hun gamlapi panin suksiatna hong tun ciangin, kua kiangah huhna ngen dingin tai ding nahi uhhiam? Na neihsa uh koi ah koih ding nahi uh hiam" (Isa. 10:1, 2, 3) cih.

Tua mahbang in, kamsang Jeremiah in Pasion' thupuak khat "Thumanlo tawh inn lam a, zuauthu tawh inndei tungnung a lam mi, ama' na thaman pialo in a inn vengte a semsak mi - Na pa in an ne tuidawn a, thuman leh dikhatna tawh na a sep manin a maapai hilo ahi hiam? Amah in mizawng cimawhte thuman tawh thukhen a, nakhempeuh ahoih suksak hilo hiam? Tuabang in hihna pen Keimah nong theihna uh hilo hiam? Topa in cih" (Jer. 22:13, 15, 16).

**Mate 23:23-30 simin. Hihteng ah Zeisu in a thupipen bang hong hilh hiam? "Agikzaw nate" acihteh bang a cihnopna hithe ding naci hiam?**

.....

Khatpeuh in thutanglo pen Laisiangtholui kamsangte bek in awlmawh cikha ding hi. Zeisu' nasepna sung mun khempeuh ah, Christ in awlmawh penin nanei hi. *"Mihoih aki neihkhem no thukham hilh siate leh Pharisee te aw, gimna na thuak ding uhhi! Note in Pasion tungah lengmasel, masala, leh cumin singnamtui a kipan, meh namtui nam khem peuh sawm-a-khat pia napi in, thukham sunga "agikzaw nate" thutang leh hehpihna na awlmawh kei uhhi. A dangte nusia tuanlo in hih thute nazuih ding uh ahi h?" (Matt. 23:23). Luka sunga Zeisu' kahtamna sungah "thuman ding leh Pasion it ding na donkha kei uhhi" (Luka 11:42) cih.*

**Tuni in "agikzaw nate" bulpuh ding hileng, "lengmasel, masala, leh cumin singnamtui" langkhat ah na bulpuh theih ding bangpeuh omthei ding naci hiam?**

THURSDAY

March 20

**Ka Vengpa Kua Hiam?**

Luka laibu sungah, thukham lianpen nihte in Pasion itna leh vengpa itna a cikhit phet in, thukham siapa in amah mah ki tawzuut nuam in, Zeisu kiangah **'ka vengpa kua hiam'** (Luka 10:29) ci in dong hi. Tua a dawnna in, Zeisu in tualai a thulaang a lauhuai Samaria mihoihpa' gentehna tawh thuhilh hi.

**Luka 10:25-37 sungpan Samaria mihoihpa tangthu simin. Hih tangthu in mihing khang tawntung a kamsangte in a kiko den tawntung, minam khempeuh in a thuaksiat uh thutang leh hehpihna thu koibang in khuavak hong taan naci hiam?**

.....

Zeisu in thutang thu a gen bek hilo; Amah'n hong keng ding hi. Kamsangte in thutang deih in a kiko niloh teng a kicing sak dingin Amah hongpai ahi hi (Luka 4:16-21; Isa. 61:1, 2). Amah in, suahtak na'ng a lunggulh minam khempeuh' lungdeih ahi hi.

Pasian' vangliatna leh a tokhom a buluh nuam galte tawh kibanglo in, Zeisu in ki niamkhiat tawm in mawhneite, thutanglo leh nenniam thuak in mawhna baang te bangin hong omsuk in, thu um khempeuh siansuah dingpa in, thutang phut dingin Ama' pumpi aki piakna tawh galpa zocip hi. Thukham sunga a gikzaw nate don dingin Christ hong sapna awlmawh lopi in, Christ in sihna hong thuakna tawh a lapsang nop thukham pen koibang in awlmawh thei peuhmah ding ihi hiam?

Late 9:8, 9 sungah, *"Leitung mite thu a mantak leh a kilawm bangin thukhen hi. Topa in nenniam thuakte a dingin munkip hi a, haksat hun ciangin mun muanhuai ahi h?"* cih. Tua mahbang in, Late 146:7-9 in zong, Pasion in *"a ki nengniam te a dingin thumanna semkhia a, gilkiat te an a vak hi. Topa in thongkiate khahkhia hi. Topa in mittawte khua musak hi; Topa in niamsakna a thuakte sangto sak a; Topa in thuman mite it hi. Topa in peemtate kem a; pa neilote huh hi; ahi zongin migilote vaihawmna Amah in lumlet hi."*

Eima kimkot tasamte leh natna thuakte huhtheihna ding Pasion' kammal in hong sawlna bangzah takin kician zawtham nasa hiam?

**Ki tasam mite vaphak ding thu Zeisu' nuntakzia leh nasepna tungtawn in bang pilna kisin thei naci hiam? Amah bangin natna thuakte tungah lim lamdang i bawlthei kei phial zongin, eima huhna in koibang in "lim lamdang" tawh kibang saktei ding ihi hiam?**

FRIDAY

March 21

**Ngaihutbeh Ding: Read Ellen G. White, *The Desire of Ages* laimai 281-289 “The Sabbath” simin.**

“Thukan te in, amau thuakkhak ding haksatna kihta in mihonpi lakah Christ’ dotna dawng ngamlo uhhi. Amah’n thuman gen cih theilua uhhi. Amau’ tang-ngeinate palsat ding sangin, mikhat thuaksia paisuak saknuam zaw, a neipa nangawn in ganhing bangin a nutsiat uh pen omsuak zaw leh ci uhhi. Pasion’ lim suun in a ki piangsak mihing tanghial sangin ganhing peuh awlmawh zaw ahihna uh pulakna ahi hi. Hihthu in biakna maanlo te limpua ahi hi. Tuatate in Pasion tungsiyah ah kilaptoh nopna sungah bul nei himah taleh, amaute’ un ganhing nuai ah kiasuk zawsop uhhi.

Vanglian Pasion a langdo biakna peuhmah, hong ki Piansak lai a mihing’ minthanna teng, Christ in khatvei hong puahphat kik ding pen buluh sakna ahi hi. Biakna maanlo khem peuh in, mihing’ tasapna, thuaksiatna leh hamphatna ding khawng teng awlmawh lohna khawng hilhthei kha tak ding hi. Christ’ sisan tawh leisa ahah man in, Lungdamthu in ahah leh manpha sak mahmah a, mihing’ kisapna leh gimna te don ding cih hilh hi. Topa in “mihing pen kham hoihte sangin a hoihzaw, minamte pen Ophir kham sangin a hoihzaw in Ka bawl ding hi” (Isa. 13:12) cih.

“Sabbath ni apha bawl ding leh asia bawl ding, hotkhiat leh thah ding koi hoihzaw hiam cih dotna tawh Pharisee tetung a tuk ciangin, amau’ lungsim hoih lohna tengmah a talsikna ahi hi. Zeisu in mi tampite nuntakna honkhia in lungdamna apiak laitak in, amaute un zong huatna tawh Christ nuntakna beng uhhi. Amaute hihbang un, gim thuakte hot ding sangin, Sabbath ni in thah ding hoihzaw thei ding hiam? Pasion’ ni siangtho ni in, hehpihna thupha bawl

in mi khempeuh it-ding sangin, thatlum zawsop leng thumaan zaw ding maw?” —Ellen G. White, *The Desire of Ages*, pp. 286, 287.

**Kikupding Dotnate:**

**1. “Biakna maanlo khempeuh in, mihing’ tasapna, thuaksiatna leh hamphatna ding khawng teng awlmawh lohna khawng hilhthei kha tak ding hi” cihthu in banghang leh koibang in thumaan hithei hiam? Tuabang thute awlmawhlo takin omna pelh theihna ding pawlpi sungah koici bangin gamta thei ding ihi hiam?**

**2. Ka vengpa kua hiam? Nang vengpa kua hiam? Christ’ nungzui ihihna lahtheihna dingin gamgi khengval ah pai in itna a lakkhia Samaria mipa bangin koibang in semkhia takpi thei ding ihi hiam?**

**3. Pasion in thutang leh hehpihna it ahahleh, Pasion tawh kisai nate koibang in tam sep pen thei ding ihi hiam? Zeisu in “thukham sungah agikzaw nate” a cihte koibang in bulphuh thei ding ihi hiam?**

**Lesson 13***March 22–28***ITNA IN THUKHAM PICIN SAKNA****SABBATH NITAKLAM**

**Tukalsung Simding:** *Pai. 20:1–17; Rom. 6:1–3; Rom. 7:7–12; Jer. 31:31–34; Mate 23:23, 24; James 2:1–9.*

**Kamngah: “Khatlehkhat ki-it ding lobuang, leiiba neikei un. Midang a itte in thukham deihna a zuikhin ahi hi”**  
(*Rom. 13:8*).

**Pawlpi** church board sungah thubuai kikap laitak in, member khatin a pastor kiang ah “*Hehpihna bulphuh in thu khensakzo kei ni, Piang theilo*” cih. Hihpa in Pasion leh Pasion’ thukham koibang in tel ahi tammaw ci in Pastor pa lungkham hi. Hehpihna cihpen mi’tung ah ihih dan, a diakin khialhna tungtang hi diak hi. Hehpihna in itna kituun hi a, *Rom. 13:8* in zong, vengpa itna pen thukham picin sakna hi cih.

Itna in thukham picin sakna ahiehleh, tua thukham pen itna pan a kikhenkhia leh, itna pen thukham tawh a kizom mello khawngin ngaihsut khakloh ding kidawm ni. Laisiangtho sungah itna leh thukham tonkhawm hi. Sangpenpa in thukham piapa hi a, tua tawh kizui in, Pasion’ thukham in itna thukham ahi hi. EGWhite in zong Pasion’ omzia ciamtehna cih (*Christ’s Object Lessons, p. 305*).

Pasion’ thukham pen lungsim sungbek a om thukhunte hilo a, eima khantohna ding in hong thuhilhna

teng ahi hi. Pasion’ thukham in Pasion hong itna lahkhiatna, Pasion tektek in hong pulakna ahi hi.

**SUNDAY***March 23***Itna Thukham**

Pasion’ thukham sungah lungsim thukhun omlo; Pasion’ thukham in kizopna hong hihhna ahi hi. Thukham sawm sungah kician takin om sitset hi. Thukham sawmte bulphuh thukhunte in Eden huan ah zong om khinzo a, Pasion leh mi’ kikal, mi leh mi kikal ah kizopna ki ukna ding thukhunte ahi uhhi.

Thukham sawmte pen Paikhiatna 20 in suangpeek tungah kigelh a, Israel mite khat leh khat a kizopna dinguh thupiak ahi hi. Hih thupiak tengpen Egypt panin Israel mite a hotkhiat khit ciangin, Pasion hong itna tungah a kinga Ama’ kamciamte a kigelh ahi hi (*Pai. 6:7, 8 leh Siam. 26:12*). Thukham sawm teng zong khennih a phakna, Pasion leh mihing kizopna, mi leh mi kizopna aki ngiim ahi hi.

**Pai. 20:1–17 simin. Hihmun te in thukhun nih ahi, Pasion itna leh midang itna cihthu koibang in honglak hiam?**

.....

Amasa li tengpen mi leh Pasion kizopna hi a, azom guk tengpen milehmi mah a kizop na’ng ahi hi. Ei leh Pasion kizopna, ei leh midang kizopna pen Pasion’ thukham tung ah apai ahi hi.

Hih khennih apha thukham gel pen Zeisu in a lianpen thukham nihte naci hi. “*Na Topa na Pasion na*

*lungsim khempeuh tawh it in” (Mate 22:37; Pai. 6:5), Nangma’ pumpi na it bangin na vengpa zong it in” (Mate 22:39; Siam. 19:18) cih.*

Amasa thukham li teng pen eimah ihihna khempeuh tawh Pasion i itna hi a, azom guk teng ahieh, eimah i ki-it mahbang in khatlekhkhat ki-it thukna ahi hi. Zeisu in zong kitelcian takin hih a lianpen itna thupiak nihgel in thukham tawh kizom hi cih. *“Hih thukham nihte tungpan in thukham dang khempeuh leh kamsangte thuhilhna khempeuh hong mengkhia hi” (Mate 22:40) cih.* Tua hi a, Pasion’ thukham khempeuh in Pasion hong itna sungah zungkha uhhi. Pasion hong itna leh a thukham in kikhenkhia theilo hi.

Mite in, **Thukham zuih kul kei, Pasion it ding leh midangte it peuhleung**, a cih uh kiza den hi. Hibang ngaihnutna banghang in kizang theilo nasa hiam?

**Thukham sawm lakpan khat palsat sa pipi in, Pasion itna leh midangte itna koibang in lahkha thei ding ihi hiam?**

**MONDAY**

*March 24*

**Thukham Siangtho, Thumaan, Hoih**

Itna in Pasion thukham’ bulpi ahi hi. Pasion in thukham lamsang kawm in itna zong lamsang lai hi. Hihthu hangmah in mawhneite gumkhia ding in Zeisu hong sihna hi a, tua hileh thukham zong lamto thei ding a, hong hehpihna tawh zong hong baan thei hi. Amah in thutang in Amah a ummi khempeuh zong thutangsak thei hi (Rom. 3:25, 26). Itna lahkhiatna hiven! Thukham zong tatkhiatna nasepna tawh aki kipsak pan hilo a, akip khinsa ahi hi.

**Rom. 6:1–3 leh Rom. 7:7–12 sim inla, taang 12 uang sim phadeuh in. Hihmun te in Christ sihkhit ciang a thukham omzia bangteng gen hiam?**

.....

Pawlkhath in hehpihna leh tatkhiatna in thukham phiatsiang cih a up laitak un, Paul in, hehpihna a khan theihna dingin, mawhna sungah om-zom lo ding cih. Christ sungah a om mite pen *“Ama’ sihna sungah ki tui-phum”* a, mawhna sungah si in Christ a ding a nungta hih ding kizam hi.

Pasion’ thukham in mawhna hilo a, eima mawhneih zia hong kilang sak hizaw hi. Tua hi a, *“thukham siangtho, thutang in hoih” (Rom. 7:12) hi.* Tua mahin, Christ bekin hong piaktheih hotkhiatna, tat-khiatna thute honglak hi. Tua hi a, *“thukham a phiath ki hilo a, a kipsak semsem ihi zaw hi” (Rom. 3:31) cih.*

Christ in thukham paaikhia dingin hongpai hilo a, thukham leh kamsangte tunga kamciam khempeuh a picing sak dingin hongpai ahi hi. Tua ahieh manin Zeisu in *“vanlehlei abei zongin, hih thukham sunga laimal neupen nangawn mawkbei lo ding” (Mate 5:18) cih.*

Pasion’ thukham in Pasion’ siangthona – a picing Ama’ omzia, a dikna, a hoihna leh a thumaanna limpua ahi hi (Siam. 19:2; Late 19:7, 8; Late 119:142, 172). Tua a ding mahin Paikhiatna 31:18 sungah, Pasion tektek in a thukham sawm teng suangpeek tungah gelh cih. Suangpeek tunga kigelh hi a, hih thukham teng in, itna tungah a kiphut, kidona lianpi thulaigil hi a - kikhel hun a neilo Pasion’ omzia leh Ama’ ukna gam teci panna ahi hi.



**Thukham leh itna a kizopna in Zeisu' kammal "Kei nong it uhleh Ka thukham na zui ding uhhi" a cihpen koibang in hong telcian sak semsem thei ding hiam?** (*John 14:15*).

TUESDAY

March 25

**Thukham leh Hehpihna**

Thukham leh hehpihna in khatlehkhat ki kingkalh hetlo hi. Pasion hong itna leh a thutang sungah mun tuam ciat panin mapang uhhi. Tanglai Israel mite in thukham leh hehpihna a lamdan sakna ah, Pasion in hong hehpihna hong lahna dingin thukham hongpia cih upna ahi hi. Amau kimkot vua "**pasiente**" in kipkho lo in genkhol theih omlo, a bia mite a ding amau "pasiente" in bang deih cihzong a hilh mello hi a, Laisiangtho Pasion ahih leh, Ama' deihna mite tungah kitelcian takin a hilhcian sitset Pasion ahi hi. Amah a lungdamsak thute pen Amite a mimal ahi a, a pawl in ahi zongin a hoihna dinguh bawlana ahi hi.

Ahihhang, thukham in mawhna pan hong gum theilo a mi' lungsim khelsak theilo hi. Mawhna pen eima pianpih ahih manin, kha lungtang thak neihphat kul hi.

**Jeremiah 31:31-34 simin. Hihthu ah Pasion in lungtang thak hongpiak ding a kamciamna bang hong hilhcian naci hiam? Christ' in Nicodemus tunga a paukhiat thu John 3:1-21 sunga piankikna tawh kisai thute tawh saikak in** (*Heb. 8:10*).

.....

Thukham sawm teng pen Pasion tektek in suangpeek nih tungah gelh (*Pai. 31:18*) ngiat hi napi, tua thukham pen Pasion' mite lungtang tungah kigelh ding (*Late 37:30, 31*) ci leuleu hi. A cihnopna ah Pasion' hong

T-9

itna thukham pen a puatham bek hilo in a sunglam panin gamtatna ah hong kilang ding hi. Pasion bekma in Ama' thukham pen mi' lungtang tungah hong gelhsak thei a, hong hihsak ding zong a thuciam mite tungah kamciam piakhin hi (*Heb. 8:10*).

Thukham zuihna peuh tawh eimah ki honkhia tawm zolo hihang. Upna tungtawn in hehpihna tawh Pasion hong piakkhong ahi hi (*Eph. 2:8*). Gupna ngah theihna'ng peuh in thukham a zui ihi kei a; gupsa ihih manun a zui ihi bek hi. Hong it theihna dingin thukham a zui ihi kei a, hong it zo ahihman hizaw in, Pasion leh midang it nuam ihih man hizaw hi (*John 14:15*).

Tua kawm mahin, thukham in mawhna hong musak a (*James 1:22-25; Rom. 3:20; Rom. 7:7*), Tankhiapa kizam cih hong lak (*Gal. 3:22-24*), a hoihpen nuntakna lampi ah hong makaih in, Pasion hong itna hong lak hi.

**Thukhenna sungah bang lam-etna nanei hiam? Nang hong seel pen bel nangma pilna leh thukham zuihna maw, Christ dikna hizaw hiam? Pasion' thukham in a hihtheih leh theihloh koici bangin na dawng ding hiam?**

WEDNESDAY

March 26

**Itna in Thukham Picin sakna**

Itna leh thukham kikal kizopna pen uang theilo hi. Laisiangtho in itna in thukham kicing sak ci hi.

Rom. 13:8-10 ah, Paul in, "*midang a itte in thukham a kicing sak khin hi*" (*Rom. 13:8*) cih. Thukham sawm lakpan a nunung lam guk teng gualsuk diudeu in, Paul in "*hiteng khempueh pen 'nangma pumpi na it bangin na vengte it in' cih*

*in huam khin hī* (Rom. 13:9) cihi. Paul mahin “itna in thukham picin sakna hī” (Rom. 13:10) cihi. Galati 5:14 ah zong Paul mahin “thukham khempeuh thukhat in ki gawmkhawm thei a, ‘Nangmah na ki-it bangin na vengte it in’ cihtawh ki tomlak thei hī” (Gal. 5:14) cihi. Thukham kicing sak pen koibang thukham hipa diak hiam? Tuabang itna koici bang hi hiam?

**Mate 23:23, 24 simin. Thukham sungah “agikzaw nate” koibang te hiam? Thuhilhikna 5:12–15 leh Isaiah 58:13, 14 simin. Hihmun te in thukham (a diakin Sabbath thukham) leh Pasion’ deihbang in thutang leh suahtakna tawh koibang in kizom thei ding hiam?**

.....

Zeisu in thukham sunga “*agikzaw nate*” pen “*thutang, hehpihna leh upna*” cihi. Thukham khatmah ahi – Sabbath pen – Laisiangtho in suahtakna leh thutang tawh kizom cihi.

Thuhilhikna 5 sungah zong, Sabbath thupiak pen Pasion in Israel mite a hotkhiatna sungah bul kiphut hi. Sabbath in piansakna phawka bek hilo a, sila nenniamna pan suahtak phawka zong ahi hi. Mikhat nopsak theihna lelte panin, Sabbath pen Topa sungah nopsakna ci in (Isa. 58:13, 14), midangte itna, thutanna, a hoih bawlna leh gilkiat te anvak, inn neilote inn ah ciahpihna ahi hi (Isa. 58:3–10).

Hiteng bek hilo thuhilhna a dang tampi omkhin a, itna tungtawn in thukham a picing sak nuam peuhmah in, mawhna tawh ki-aapna in kipelh thei bek hilo, mawhna nutsiat kullai hi. Itna pen thukham picin sakna bek

thamlo, mawhna tawh ki-aap ziau ciang bek hilo; lawp takin a hoih bawlna – itna tawh nasepna sungah citak takin thumaan leh hehpihna sungah mainawtna ahi hi. Pasion tungah cihtakna pen thukham laimal palsat lohna ciang lelbek hilo hi.

**THURSDAY**

*March 27*

**Nakhempeuh Tungsinh ah, Khatlehkhat Ki-it un**

Itna in thukham picinna ahihleh, khatpeuh in khialhna bawllh manpeuh in Pasion thukham zui zolo ding hi. Itna thukham mahmah in Laisiangtho sungah om a, khiallo ding hong cibek hilo, Pasion hong itna pen midang tungah zong laksawn ding – eima’ pawlpi mite tungbek hilo, leitung bup ah Christian hihna pulakkhia ding hi.

**James 2:1–9 simin. Bang thupuak thupi om hiam?**

.....

Hiteng ah, James in, thutanlohna nakpi takin taigawp hi. A diakin mizawngte a simmawh bawl mihaute hi phadiak hi. Tua banah, itna thukham ahi vengpa it ding sawl a, hih thukham nazuih leh “*ahoih hipah*” (James 2:8) cihi.

Ellen G. White in: Mihing itna pen Pasion itna leitung ah pulakna hi. Minthang Kumpipa’ innkuan sungah a tate ihih theihna dingin hih itna po sak ding hihang. “*Keimah in note kahong it mahbang in, note khatlehkhat naki-it un*” (John 15:12) *acih mahbang in: Ama’ hong it bangin leitung it leng, eitung a Ama’ nasep a zo hipah hi. Eima lungsim sungah vantung nei ihih manin vantung tawh i kilawm ta hī*” — Ellen G. White, *The Desire of Ages* p. 641.

Christ in leitung a it mahbang in, e'n zong leitung it leng – *vantung tawh kilawm pah hihang*. Zeisu' nungzuite hamphat dan!

Zeisu in a nungzuite kiangah “*Keimah in note ka hong it mahbang in*” note zong “*khatlehkhat na ki-it un*” (John 13:34) cih. Tua hileh “*Note khatlehkhat ki-it le uhcin, Keima nungzui nahihna uh mikhempeuh in thei ding uhhi*” (John 13:35) cih. Pasion in itna ahah manin Christian upna sungah itna in a bulpi ahi hi (1John 4:8, 16). Pasion ka it hi aci mi peuhmah khatlehkhat ki-it ding uhhi (1John 3:11; 4:20, 21).

1Peter 4:8 in zong Christian te hong hanthotna ah: “*Itna in mawhna tampi kuhcip thei ahah manin, lungsim takpi tawh khatlehkhat ki-it ding na ngaihsun phapen un*” (Heb. 10:24; 1Thess. 3:12) cih.

**Christ in leitung a it mahbang in e'n zong leitung it ding cihthu lungngai in. Tua in Christian te picinna hi a, tawntung nunna tawh hong kilawm sak ahahna koibang in hong telcian sak naci hiam?**

FRIDAY

March 28

**Ngaihsutbeh Ding: Ellen G. White, *The Desire of Ages* laimai 637–641, “*The Least of These My Brethren*” simin.**

“*Midangte ading na asem te tungah Tuucing Mangpa in nasem ding hi. Amau un nuntakna tui dawn kha ding uh a, lungkim ding uhhi. Amau un gualnopna maimai te lung- gulh nawnlo ding uhhi. Amau' lunggulh bulpi in, a kisia kha te koici gupkhiat ding cih bek ahi hi. Mitawh zong kikhawl siam ding uhhi. Tankhiapa' itna in amau' lungsim uh kaikhawm ding hi.*”

“*Pasion' nasep khoppih ihih lam i kitheih ciangin, Ama' hong kamciam te in ciam maimai hi lello ding hi. I lungsim*

*sungah hong kuang ding a, i muk ah meikuang hong leet ding hi. Mihai, ukna omlo, langdo mite makaih dingin Moses a saplai in, Pasion in kamciam pia a, 'Nang tawh kongpia ding a, lungsim tawngak hun kongpia ding hi' (Pai. 33:14), 'Nang tawh Kong om taktak ding hi' (Pai. 3:12) cih. Hih kamciam pen Christ a dingin nasepna ah genthei thuaksia mi khempeuh ading ahi hi*” —Ellen G. White, *The Desire of Ages*, p. 641.

**Kikupding Dotnate:**

**1. 1Cor. 13:4–8 simin. 1Cor. 13 in bangci mihing hiding hong ci hiam?**

**2. Mate 25:31–46 sungah bang in tuu leh keel khenkhia hiam? Hotkhiatna in sepna pan hilo cih Zeisu' thuhilhna pan koibang in ki telcian thei hiam?**

**3. What does it mean to you that “*Amah in leitung a it mahbang in, e'n zong leitung it leng; eitung ah Ama' nasep ding teng azo hita; vantung lungsim nei ihih manin, vantung tawh i kilawm ta hi.*” cihthu in nang ading bang khiatna nei hiam? (Thursday sinna enkik in). Hihthu in, Pasion' omzia leh vantung omzia bang teng hong lak hiam? Hih leitung mahah vantung khuami mahbang in koibang in ki omthei ding a; Pasion hong itna thehthang sakna tawh nenniam thuakte tungah khuavak taanna hitheih ding hiam?**

## MORNING WATCH

January, 2025

1. Wednesday	Psalm	145:17
2. Thursday	Isaiah	1:18
3. Friday	Genesis	3:15
4. Sabbath	Revelation	13:8
5. Sunday	Genesis	4:4
6. Monday	Genesis	5:22, 24
7. Tuesday	Hebrews	11:7
8. Wednesday	Genesis	8:13
9. Thursday	Romans	1:20
10. Friday	Genesis	11:5
11. Sabbath	Genesis	12:1
12. Sunday	Romans	4:3
13. Monday	Genesis	22:8
14. Tuesday	1 Timothy	6:9
15. Wednesday	Amos	3:3
16. Thursday	Genesis	27:3, 4
17. Friday	Genesis	28:15
18. Sabbath	Genesis	32:26
19. Sunday	Matthew	7:21
20. Monday	Genesis	39:9
21. Tuesday	Genesis	45:4, 5
22. Wednesday	Acts	7:25
23. Thursday	Exodus	7:1
24. Friday	Exodus	4:22, 23
25. Sabbath	Exodus	14:31
26. Sunday	Psalm	78:15, 16
27. Monday	Exodus	19:6
28. Tuesday	Exodus	32:1
29. Wednesday	Isaiah	51:7
30. Thursday	Exodus	25:8
31. Friday	Isaiah	5:20

## MORNING WATCH

February, 2025

1. Sabbath	Exodus	19:5, 6
2. Sunday	Deuteronomy	1:15
3. Monday	Numbers	14:2
4. Tuesday	Numbers	16:1-3
5. Wednesday	Nehemiah	9:19-21
6. Thursday	1 Corinthians	10:4
7. Friday	John	6:37
8. Sabbath	Deuteronomy	3:2
9. Sunday	2 Peter	2:15, 16
10. Monday	Proverbs	7:26
11. Tuesday	Deuteronomy	3:25, 26
12. Wednesday	Deuteronomy	34:5, 6
13. Thursday	Joshua	1:5
14. Friday	Hebrews	11:30
15. Sabbath	Deuteronomy	11:19
16. Sunday	Joshua	9:15, 16
17. Monday	Joshua	10:40, 42
18. Tuesday	Joshua	23;3; 24:31
19. Wednesday	Leviticus	27:30
20. Thursday	Deuteronomy	15:1
21. Friday	Exodus	23:14
22. Sabbath	Judges	1:28
23. Sunday	Judges	14:3
24. Monday	1 Samuel	1:17
25. Tuesday	1 Samuel	2:22, 24
26. Wednesday	1 Samuel	7:12
27. Thursday	Proverbs	9:10
28. Friday	1 Samuel	8:19, 20

MORNING WATCH  
March, 2025

1. Sabbath	1 Samuel	12:13
2. Sunday	1 Samuel	16:1
3. Monday	1 Samuel	16:18
4. Tuesday	1 Samuel	22:2
5. Wednesday	1 Samuel	24:6
6. Thursday	1 Samuel	28:12
7. Friday	1 Chronicles	10:13, 14
8. Sabbath	2 Samuel	1:11, 12
9. Sunday	2 Samuel	5:10
10. Monday	1 Chronicles	19:13
11. Tuesday	Proverbs	14:12
12. Wednesday	2 Samuel	12:7, 9
13. Thursday	1 Chronicles	21:17
14. Friday	Jeremiah	9:23, 24
15. Sabbath	2 Chronicles	6:1, 2
16. Sunday	Deuteronomy	17:17
17. Monday	2 Chronicles	9:5, 6, 8
18. Tuesday	Ecclesiastes	2:10, 11
19. Wednesday	1 Kings	12:13, 14
20. Thursday	Ezekiel	33:11
21. Friday	2 Chronicles	14:11
22. Sabbath	2 Chronicles	7:13, 14
23. Sunday	1 Kings	17:9
24. Monday	1 Kings	18:21
25. Tuesday	1 Kings	19:7
26. Wednesday	1 Kings	19:18
27. Thursday	1 Corinthians	10:11
28. Friday	2 Chronicles	20:20
29. Sabbath	2 Chronicles	23:21
30. Sunday	2 Kings	2:8
31. Monday	2 Kings	2:21, 22